

Matiyu

Matiyu belen mere igin Yesu nin yitin kayyin

Yesuyen megen nin asem yago
(Luk 3:23-38)

- 1** ¹ Gabe Yesu Kristuyen asem wen Abraham hitte mat wan wan Israel marte doyan al kurun Dewit hitte, irde yen hitte mat wan wanbe Yesu forok yirin goyen asande katinbe gahade:
- ² Be, Abraham urminbe Aisak. Aisak urminbe Yekop.
Munan Yekop urmin wenbe Yuda, itin wenyabe kulin yagoya.
- ³ Yuda urmin waranbe Peresya kulin Seraya. Irde ire itinya gote milinbe Tamar.
Peres urminbe Hesron. Hesron urminbe Ram.
- ⁴ Be, Ram urminbe Aminadap. Irkeb Aminadap urminbe Nason.
Nason urminbe Salmon.
- ⁵ Salmon urminbe Boas. Boas milinbe Rahap. Bere gobe Yuda mar bere mon.
Boas urminbe Obet. Obet milinbe Rut. Bere gayen wor Yuda mar bere mon. Munan Obet urminbe Yesi.
- ⁶ Yesi urminbe Yuda marte doyan al kurun Dewit.
Dewit urminbe Solomon. Solomon milinbe Batseba. Bere gayen wor Yuda mar bere mon. Dewit belen un Uria mayke kamkeb tirin.
- ⁷ Solomon urminbe Rehoboam. Rehoboam urminbe Abia. Abia urminbe Asa.
- ⁸ Asa urminbe Yehosafat. Yehosafat urminbe Yehoram. Yehoram urminbe Usia.
- ⁹ Usia urminbe Yotam. Yotam urminbe Ahas. Ahas urminbe Heskia.
- ¹⁰ Heskia urminbe Manase. Manase urminbe Emon. Emon urminbe Yosaia.

11 Irkeb Yosaia urminbe Yehoiakinya kulin yagoya.

Yehoiakinya kulin wenya hinhanyabe Babilon nanare nin fulenja mar belej wan gasa yirde bul yirde metenj marminj yirnin yenj Babilon yukaminj.

12 Be, Babilon yukaminj go mulganj henj nanamde kwaminj. Irdeb Yehoiakinbe urminj Sealtiel minyanj hiriñ. Sealtiel urminbe Serubabel.

13 Serubabel urminbe Abiut. Abiut urminbe Eliakim. Eliakim urminbe Aso.

14 Be, Aso urminbe Sadok. Sadok urminbe Akim. Akim urminbe Eliut.

15 Eliut urminbe Eleasa. Eleasa urminbe Matan. Matan urminbe Yekop.

16 Irkeb Yekop urminbe Yosep. Yosepbe Maria unj. Maria binde matbe Yesu Kristu^a gogo forok yiriñ.

17 Ningeb Abraham hitte mat wan wan Dewit hitte hiriñ goyen asi basanminj yagobe tumnanj 14. Irde Dewit hitte mat wan wanbe Babilon nin mar belej gasa yirde Babilon yukaminde goyenter wor asi basanminj yagobe 14 po. Irdeb gor mat wan wan Yesu Kristu kawan hiriñde gor wor 14 po.

Maria belej Yesu kawan kiriyin

(Luk 2:1-7)

18 Be, Yesu Kristu kawan hiriñ gobe gahade: miliñ Mariabe Yosep nin tubul tenj untek yenj merem tiyaminj gega, Mariabe Yosep goya tumnanj ma henya bin yanj hiriñ. Irkeb Yosep belej keneñ bebak tiyyiñ. Goyenpoga diriñ gobe Holi Spirityen tareñde Maria binde forok yiriñ goyen ma nurdeb kukuwamnenj nuriñ. 19 Gega Maria goyen tetek al Yosep gobe al huwak uliñde merem monj geb, goyen keneñbe kawan po takira tike al budam nurkeb Maria go memya henj henj ge igiñ ma nurdeb bada henj daha mat kura balminj tubul timewonj yenj nurde hinhin. 20 Goyenbe goke dufay henj hikeyab Al Kurunyen miyonj belej mitere forok yenbe inyiñ. “Dewit asem Yosep, gebe Maria tenj tenj nin al belej daha wet kura ginenj ginenj nin kafura henj bada ma hawayiñ. Diriñ binde hi gobe Holi Spirityen tareñde forok yiyunj. 21 Ningeb binde hi gobe diriñ al diriñ kawan kiryen. Yenj belej gab alya bereyaminj mata bulun tenj hanj bana mat yumulganj tiyyen. Ningeb denjembe ‘Yesu’^b inayiñ,” inyiñ.

22 Be, mata kurunj gabe Doyan Al Kurunj belej mere basanj alminj momonj irke basanj henj tagalyiñ goyen gogo forok yiriñ. 23 Mere tiyyiñ gobe gahade: “Bere fonenj kura alya ma kun hitiñ belej bin henbe diriñ al diriñ kura kawan kiryen. Irkeb ‘Immanuel’ innayiñ,” inyiñ. Immanuel gote minbe ‘Al Kurunbe nenya hite’.

^a 1:16 Kristu gobe Hiburu mere matbe Mesaia. Gote minbe alya bereya Al Kurunj hitte Yumulganj tenj tenj Al. ^b 1:21 Deje gote minbe “Dumulganj tenj tenj Al”.

²⁴Be, Yosep go mite tiyyinde mat huwardeb Al Kurunyen miyon belen sanij po mere iriyin gwahade po Maria goyen ten yaminde kurin.
²⁵Goyenbe yenya ma ferde hinaryum. Kun kunbe Maria gobe dirin al dirin kawan kiriyin. Irkeb Yosep belen “Yesu” iniyin.

Nana yenen bebak ten ten mar Yesu kinnin yen wayamin

2 ¹Be, Yesube Herot Yudia nanare nin doyan al kurun hinhinya Yudia nana bana gon nin taun dirnen kura Betlehem gor kawan hirin. Be, dirin go kawan hirin kamereb nana wan wan belen nin mar kura Yerusaleme taunde wayamin. Mel gobe dinambe yenenbe kame da mata kura forok yiyyen goyen bebak ten hanyen mar. ²Be, mel go wanbe gusunan hamin. “Yudia nanare nin doyan al kurun hiyyen al gayamun ga forok yiyun gobe dare hi? Nana wan wan belen mat dinambemin kenenbe dolo irnin yen gago wayhet,” yamin.

³Be, Herot go mere goyen nurdeb, “Dirin gore kame kurun hen asogo nirde gasunne tiyyen,” yenbe kafura hirin. Yerusaleme taunde hinhan mar wor budam wor po mere go nurdeb dirin goke ten kanduk bulun kura forok yiyyen yen kafura hamin. ⁴Irkeb Herot belen Al Kurun dolo ird ird mata doyan marte karkuwan yabe Moseyen saba tagal tagal marya hoy yirdeb, “Mesaiabe damde kawan hiyyen?” yinen gusunan yiriyin. ⁵Irkeb wol henbe, “Yudia nanare nin taun Betlehem gor kawan hiyyen. Al Kurunyen mere basan al kura belenbe gahade kayyin:

⁶ ‘Be, den Betlehem nin mar,

den hitte al kura forok yen nere alya bereya Israel mar gote doyan al kurun hiyyen.

Irkeb dentin dirnen goyen kurun hiyyen.

Ningeb denbe Yudia nana bana gon nin al denem yan mar gote folek,’ yitin hi.

Maika 5:2

Ningeb Mesaiabe Betlehem forok yiyyen,” inamin.

⁷Irkeb Herot belen dirin gobe daha nana kawan hirin goyen bebak tiye yenbe nana wan wan belen nin al karwo dinambe yenen bebak ten ten mar goyen balminde hoy yirdeb, “Daha nana wor po dinambe goyen forok yiyun?” yinkeb gwaha nana kintin inen momon iramin. ⁸Irkeb Herot belen usi yirdeb, “Betlehem kunan. Kunbe dirin goke kenkela po nan kennayin. Kenenbe aran po wan momon nirnayin. Irkeb ne wor kunbe dolo iren,” yinyin.

⁹Be, mel gobe Herot belen gwaha yinkeb Betlehem kunin yen kwamin. Irkeb dinambe nana wan wan belen kenamin goyen nana kota mehen hen kunbe dirin hinhin ya turte gor bada hirin. ¹⁰Dinambe gore gwaha tike kenenbe mel go amanen nuramin. ¹¹Irdeb ya bana hurkun dirinja milinja goyen yenenbe dokolhon yugulun ten dirin goyen dolo iramin. Irdeb det kura dirin go unnin yen yawayamin goyen hol yirdeb

unamiŋ. Gol horaya det kura toropa yara kake hamiŋ teŋ hiyen gwahade goyabe guram hamneŋ igiŋ wor po yawayamiŋ goyen unamiŋ. ¹²Be, Al Kurunyen miyoŋ beleŋ mitere, “Mulgaŋ heŋ Herot hitte ma kunayiŋ,” yinenŋ hayhay yiriŋ. Irkeb beleŋ hoyan mat naŋam kwamiŋ.

Yosep beleŋ Yesuya miliŋ Mariaya yade Isip kuriŋ

¹³Mel go kukeb Al Kurunyen miyoŋ beleŋ mitere Yosep hitte forok yenbe, “Herot beleŋ diriŋ gayen maymeke kami yen naŋkenenŋ tiya. Niŋgeb huwarde diriŋya miliŋya gayen yade busaharde Isip naŋare kuŋ goŋ hinayiŋ. Irdeb ne po doyanŋ nirde hinayiŋ. Mulgaŋ henanŋ dinmeke gab mulgaŋ henayiŋ,” inyiŋ. ¹⁴Be, Yosep go biŋ bak yeke huwardeb wawuŋ goyen po ire miliŋya go yadeb busaharde Isip naŋare kwamiŋ. ¹⁵⁻¹⁸Irkeb Herot gobe doyanŋ hemanbe naŋa waŋ waŋ beleŋ niŋ mar gobe usi niraŋ yenŋ nurdeb biŋ ar wor po yiriŋ. Irkeb Betlehemya tiyuŋ mukneŋ biŋyanŋ bana goŋ niŋ al diriŋ diriŋenŋ damam irawa mat bam beleŋ gobe tumŋanŋ gasa yirke kamnanŋ yenŋ fuleŋa marmiŋ hulyanŋ yiriŋ. Gobe naŋa waŋ waŋ beleŋ niŋ mar beleŋ haŋkapyaya wor po naŋamde dinambe kenamiŋde gor mat gagasiya damaya kapyanŋ heŋbe gogo, “Diriŋbe damam irawa mat bam beleŋbe gasa yirnayiŋ,” yinyiŋ. Go tiyyiŋ gobe bikkeŋ Al Kurunyen mere basanŋ al Yeremaia beleŋ yiriŋ goyen forok yiriŋ. Meremiŋbe gahade:

“Al beleŋ al kura Rama taunde biŋ misiŋ kateŋ esenŋ obam teŋ epte ma teŋ hike nuramiŋ.

Esenŋ gobe Resel beleŋ diriŋenŋ weŋ kamde pasi hamiŋ goke esenŋ hinhin.

Niŋgeb al kura beleŋ yolŋa irke bada hetek moŋ,” yitiŋ hi.

Yeremaia 31:15

Be, Yosepya diriŋmiŋmiŋya go kuŋ Isip hike hikeb Herot go kamiŋ. Irke gab mulgaŋ hamiŋ. Go tiyamiŋ gobe Doyanŋ Al Kurunyen beleŋ, “Urnebe Isip naŋa tubul teŋ waŋ waŋ niŋ hoy irmiŋ,”^c yiriŋ goyen mere basanŋ almiŋ Hosea mere irke basanŋ heŋ tagalyiŋ goyen gogo forok yiriŋ.

Yosepya diriŋmiŋmiŋyabe Israel naŋare mulgaŋ hamiŋ

¹⁹Be, kame Herot go kamkeb Doyanŋ Al Kurunyen miyoŋ beleŋ Yosep Isip hinhinya goyen mitere forok yenbe, ²⁰“Yosep, diriŋ ga mayniŋ yen hinhan marbe kamaŋ. Niŋgeb huwarde ire miliŋya yade Israel naŋare mulgaŋ henayiŋ,” inyiŋ. ²¹Irkeb huwarde ire miliŋya goyen yade mulgaŋ heŋ Israel kwamiŋ. ²²Goyenbe al kura beleŋ, “Akelaus beleŋ naniŋde gasuŋ teŋ Yuda naŋare niŋ doyanŋ al kurunŋ Herot^d hiyuŋ,” yeke nurdeb

^c 2:15-18 Hosea 11:1 ^d 2:22 Herot gobe Israel doyanŋ irde hinhan doyanŋ mar karkuwanŋ gote denŋe.

kafura heŋ gor kutek ma iryiŋ. Irkeb sopte po mitere Al Kurunyen miyoŋ beleŋ, “Galili naŋare kunayiŋ,” inkeb Galili kwamiŋ. ²³Kuŋbe taun kura Nasaret iney haŋyende gor keperamiŋ. Gobe bikkeŋ Al Kurun beleŋ, “Nasaret niŋ al iney hinayiŋ,” yiriŋ goyen mere basan marminiŋ mere yirkeb basan heŋ tagalamiŋ gwahade goyen po forok yiriŋ.

Yon Baptais beleŋ mere tagalde hinhin

(Mak 1:1-8; Luk 3:1-18; Yon 1:19-28)

3 ¹Be, dama budam kukeb al kura Yon Baptais iney hinhan goyen Yudia naŋare sawsawa po kurun nana bana goŋ waŋbe saba tagal tagal miŋ uryiŋ. ²Saba teŋ hinhin gobe gahade: “Al Kurun beleŋ alya bereyamiŋ doyaŋ yirtek nalube bikkeŋ binde hihi. Niŋgeb yeŋ yufuk bana hitek yeŋ nurde haŋ kenem mata bulunŋtiŋ yubul teŋ yeŋ ge bitiŋ mulgaŋ henayiŋ,” yineŋ hinhin. ³Metey goyen teŋ hinhin al Yon Baptais goke bikkeŋ Al Kurunyen mere basan al Aisaia beleŋ gaha yiriŋ:

“Sawsawa po kurun nana bana goŋ al kura forok yeŋbe alya bereya beleŋ Doyaŋ Al Kurunyen mere nurde gama ird ird niŋ dufay gitik teŋ teŋ ge gahade kuware tagalde hiyeŋ:

‘Doyaŋ Al Kurunyen beleŋ kernaŋ.

Beleŋmiŋ sope irde huwa irnaŋ,’ yeŋ hiyeŋ,” yeŋ kayyiŋ.

Aisaia 40:3

⁴Be, al gote uliŋhorbe dapŋa kamel wuyneŋ beleŋ irtiŋ goyen hor irdeb dapŋa sikkeŋ gore po kaŋmiŋ irde uliŋhor goyen mal temdere giti irde hiyen. Irdeb biŋgemeŋbe gusuya yalaŋgu fimiŋya po nene hiyen.

⁵Irkeb Yudia nana bana goŋ niŋ taun kurun Yerusalemia nana bana goŋ niŋ taun hoyan hoyanyabe Yodan fe siŋa bana goŋ niŋ marya kurun goyen Yon hitte kuŋbe ⁶mata bulunmiŋ ge Al Kurun pohogay irkeb Yon beleŋ Yodan fe bana baptais yirde hinhin.

⁷Be, Yuda marte tikula sanŋ po gama irde haŋyen Farisi marya Sadusi marya budam Yon beleŋ al baptais yirde hinhinde gor wake yeneŋbe, “Deŋbe mata bulun po teŋ haŋ gega, mali baptais tiniŋ yeŋ wayhaŋ? Deŋ gab dufaytiŋ bulun wor po kunere dirneŋ weŋ yara. Goyenbe mali baptais tetek gab Al Kurunyen bearar ma kenteŋ yeŋ nurde haŋ? Ganun beleŋ gwaha dinun? Epte ma wor po busaharnayiŋ geb! ⁸Niŋgeb Al Kurunyen bearar bana ma hitek yeŋ nurde haŋ kenem mata bulunŋtiŋ yubul teŋ yeŋ ge bitiŋ mulgaŋ haŋ gote igineŋ Al Kurun diliŋde mata igiŋ huwak goyen po teŋ hinayiŋ. ⁹Irde dindikeŋ ge yeŋ, ‘Neŋbe Abraham dirneŋ weŋ,’ ma yeŋ hinayiŋ. Al Kurunbe igiŋ hora gayen yade Abrahamyen dirneŋ weŋ yiryen geb, mata bulunŋtiŋ ma yubul tinayiŋbe meretiŋ gobe miŋ miŋmon wor po hiyyen. ¹⁰Be, saporbe bikkeŋ he miŋde kerd kerd niŋ ep irtiŋ hi yara Al Kurun beleŋ mata bulunŋtiŋ gote murungem duntek binde wor po hi. Niŋgeb he kura igineŋ ma heŋ hiyeŋ gobe ilde kak alare temeynayiŋ

go gwahade goyen po, den gayen mata bulunjin yubul ma tinayinbe Al Kurun belen dakira ten kak alare dimiyyen.

¹¹ “Nebe mata bulunjin yubul ten Al Kurun nin bitin mulgan hekeb fe ulin po baptais dirde hime. Goyenbe harhokner al kura wayyen. Al gote tarenbe kurun wor po. Yenbe al turun yan wor po geb, ne gahade gare epte ma yen ge ten meten kurun titek hime. Kahan basanmin ten kun kun gobe meten kurun mon gega, goyen wor epte mon yen nurde hime. Yen belen gab Holi Spiritya kakya belen baptais diryen. ¹²Irde yenbe al kura wit iginen yawaren yen kutummin tukun iginenya sikkenya pota yirde iginenbe goyen yerd yerd ya bana yerde sikkenbe yade kumga tiyyen go gwahade goyen diryen. Ningeb al kame wayyen goreb meremin ma gama irde hinayin marbe kak huginen hitekde gor yimiyyen,” yinyin.

Yon Baptais belen Yesu baptais iryin

(Mak 1:9-11; Luk 3:21-22)

¹³ Goyarebe Yesu gob Yon belen baptais niri yenbe Galili nanare mat Yodan fete kurin. ¹⁴Wake kenenbe Yon belen pet tenbe, “Ge belen gab ne baptais nirtek gega, dani bul mat, ‘Yen belen baptais niri,’ yen ne hitte wayha?” inyin. ¹⁵Irkeb Yesu belen wol henbe, “Mekerke han kabe ne nurhem gwahade nira. Gogab Al Kurunyen dufay huwak wor po goyen tumnan deyya belen kawan forok iryen. Gwaha tiyen gab igin yen nurde hime,” inyin. Irkeb Yon belen fe alare tukun baptais iryin.

¹⁶Be, Yesu go baptais tenbe fe tubul ten sinare wayyin. Wakeb goyare goyen po nan kin hol yirin. Hol yekeb Holi Spiritbe Yesu hitte nu foy ten kattinen ten yen hende keperke yingen kinyin. ¹⁷Irkeb al melak kura nan kinde mat, “Al gabe urne bubulku ne wor po. Yen ge amanen wor po nurde hime,” yirin.

Ungura belen Yesu tunan uryin

(Mak 1:12-13; Luk 4:1-13)

4 ¹Be, baptais tirin go kamereb Ungura Satan belen tunan uri yenbe Holi Spirit belen bul irde sawsawa po kurun nana bana gon tukurin. ²Be, nan kahalya wawunya 40 gayen bing kutjare hinhin. Ningeb go kamereb bing bulun wor po iryin. ³Irkeb tunan urtek al belen wanbe, “Ge gayen Al Kurun Urmin kenenbe hora ga yinke beret hena,” inyin. ⁴Gwaha inkeb Yesu belen wol henbe, “Al Kurunyen asande, ‘Albe Al Kurun belen mere titin kurun goyen nurde sanin hen han yen. Munan bing hende po ma han yen,’ gwahade katin hi,” inyin.

⁵Go kamereb Ungura belen Yesu go Yerusalem Al Kurunyen taun inen han yende gor tukunbe Al Kurunyen ya balem kurun goyen hende hoyan wor pore kura gor tukuke huwaryin. ⁶Irkeb sopte po inyin. “Al Kurunyen asandebe gahade katin hi:

‘Al Kurun belen ge nin ten miyonmin hulayan yirke wan haniŋde
ganarkeb solok yawayin goyen

hora unkuŋen belen mun kura kahanŋe umulaw ma uryen,’ yitin
hi. *Tikin 91:11-12*

Ninŋeb ge gayen fudinde Al Kurun Urmin kenenbe solok yawa,” inyin.

7Irkeb wol heŋbe, “Goyen goke wor, ‘Al Kurunŋe tunan ma urayin. Yenbe
Doyan Al Kurun geb,’ yen asanŋe katin hi,” inyin.

8Be, kura goya po tunan ure yenbe Yesu goyen dugu kurunŋe kura gor
tukunbe megen nin doyan mar karkuwan belen nana doyan yirde han goya
tarenmin turun yanya kurun goyen tumnan ikala iryin. 9Ikala irdeb,
“Dokolhonŋe yugulun ten dolon nirke gab det kurun yenha gayen yubul ten
gunen,” inyin. 10Gwaha inkeb wol heŋbe, “Satan, hoyan kwa! Asanŋebe, ‘Al
Kurun po ga Doyan Al Kurunŋe geb yende yufukde po heŋbe yen po dolon
irde hayin,’ yitin hi gobe ma nurde ha?” inyin. 11Gwaha inkeb Unŋura go
tubul ten kurin. Irkeb Al Kurunyen miyon belen wan Yesu faran uramin.

Yesu belen Galili nanare metenmin min uryin

(Mak 1:14-15; Luk 4:14-15)

12Be, kamebe Yesu go Yon Baptais ten fere ten koyare keramin mere
momon goyen nurdeb mulgan heŋ Galili nanare kurin. 13Kun Nasaret
tiyunde hinhin. Mun kura hitnen tenbe Kapeneam taunde kurkun gor
hinhin. Kapeneam taun gobe Galili fe ala kurun goyen sinare Sebulunya
Naptaliyat megenŋe hinhin. 14Be, Yesu go Kapeneam kurkurin gobe Al
Kurun belen mere basan almin Aisaia momon irke basan heŋ tagalyin
goyen fudinde wor po forok yirin. Merebe gahade:

15 “Sebulun megenya Naptali megenyabe Galili makaŋde kurkun
kurkun belen kurunŋe har.

Yenbe Yodan fe sin kurhan har. Meŋen gabe Galili nana bana har.
Goŋbe Yuda mar mon al min hoyan manan goŋ han.

16 Go mar gobe Al Kurun ma nurde unen mata bulun bana po heŋ
kidoma bana hitnen ten hanŋen goyen hulsi kurun kura kennayin.
Al kidoma bana heŋ kamtin yara hanŋen gobe

hulsi goyen forok yeke gote ureŋ bana hinayin,” yitin hi. *Aisaia 9:1-2*

17Be, Yesu go Kapeneam henŋyabe saba tagal tagal metenmin min
uryin. Sabaminbe gahade: “Al Kurun belen alya bereyamin doyan yirtek
nalube binde hihi. Ninŋeb yen yufuk bana hitek yen nurde han kenem
mata bulunŋin yubul ten yen ge bitin mulgan henayin,” yen hinhin.

Komatmin kura hoy yiryin

(Mak 1:16-20; Luk 5:1-11)

18Be, Galili makaŋ ferenŋan goyen kun henŋyabe Saimon denem
kurabe Pitaya kulin Andruya makaŋde kaman temeyde hike yinyin. Ire

itinya gobe makaŋ dapŋa yad yad mar. ¹⁹Kuŋ yeneŋbe yinyiŋ. “Wayyi. Waŋ gama niryi. Irkeb al yade Al Kuruŋ hitte yukuŋ yukuŋ mar direŋ,” yinyiŋ. ²⁰Gwaha yinkeb goyare po kamaŋmiŋ yago yubul teŋ Yesu gama iraryum.

²¹Muŋ kura kutŋeŋ teŋbe ire itinya hoyan Yemsya Yonyabe naniŋ Sebediya hakware heŋ kamaŋmiŋ sope yirde hike ²²yeneŋbe hoy yiryiŋ. Irkeb ire itinya gore wor naniŋ Sebedi goyen hakware gor po tubul teŋbe Yesu gama iraryum.

Garbam mar sope yiryiŋ

(Luk 6:17-19)

²³Be, Yesu go Galili naŋa bana goyen kuŋbe Yuda marte gabu yayan saba teŋ Al Kuruŋ beleŋ alya bereyamiŋ doyan yird yird mere igiŋ goke tagaldeb alya bereya garbammiŋ kurayen kurayen manaŋ goyen guram yirke igiŋ heŋ hinhan. ²⁴Irkeb yeŋ mata tiyyiŋ goyen Siria naŋare niŋ mar wor nurtiŋ ala tiyamiŋ. Irdeb garbam kurayen kurayen goyen yukuteke sope yiri yeŋ Yesu hitte yawayamiŋ. Alya bereya uliŋ misiŋ kuruŋ miŋyaŋ, uŋguram yaŋ, bu tonen miŋyaŋ, tonaŋ kukuwa miŋyaŋyabe uliŋ kamtiŋya goyen yad wayamiŋ. Irkeb tumŋaŋ guram yirde sope yiryiŋ. ²⁵Be, Galili naŋa, Dekapolis^e naŋa, Yudia naŋa, Yodan fe siŋa bana goŋ niŋ marya Yerusalem taun kuruŋde gor niŋ marya budam waŋ Yesu gama iramiŋ.

Amaŋ heŋ hinayiŋ

(Luk 6:20-23)

5 ¹Be, Yesu beleŋ al buda kuruŋ go yeneŋbe doŋdoŋeŋde hurkuŋ kipiryiŋ. Komatmiŋ yago wor yeŋ hinhide gor hurkamiŋ. ²Irkeb sabamiŋ miŋ uryiŋ. Sabamiŋbe gahade:

³“Be, al kura nindikenbe epte moŋ yeŋ Al Kuruŋ niŋ po nurde hinayiŋ mar gobe Al Kuruŋ beleŋ alya bereyamiŋ doyan yirde hi bana goŋ hinayiŋ.

Niŋgeb goke amaŋeŋ nurde hinayiŋ.

⁴“Al Kura mata buluŋmiŋ ge kandukŋeŋ wor po nurde haŋ marbe Al Kuruŋ beleŋ biŋ yurum yiryen.

Niŋgeb goke amaŋeŋ nurde hinayiŋ.

⁵“Al kura neŋ harhet harhet ma teŋ haŋ marbe kame Al Kuruŋ beleŋ megeŋ kuruŋ gayen yunke yende hiyyen.

Niŋgeb goke amaŋeŋ nurde hinayiŋ.

⁶“Al kura Al Kuruŋ diliŋde mata huwak teŋ teŋ niŋ feya bingeya niŋ kamtiŋeŋ teŋ haŋ marbe Al Kuruŋ beleŋ mata huwak goyen yunen hiyen.

^e 4:25 Dekapolis gote miŋbe “10 taun haŋ.”

Ningeb goke amañen nurde hinayin.

7 “Al kura al hoyan nin buninen nurde yunen han mar gobe Al Kurun wor buninen nurde yunen hiyen.

Ningeb goke amañen nurde hinayin.

8 “Al kura binde dufay bulun ma kerde han marbe Al Kurun kenen hinayin.

Ningeb goke amañen nurde hinayin.

9 “Al kura fulenaya kandukya yisikamde awalikde hen hen mata forok irde han marbe Al Kurun belej dirigne wen yinyen.

Ningeb goke amañen nurde hinayin.

10 “Al kura Al Kurun dilinde mata huwak ten hike al hoyan belej bulun bulun yirke kanduk kurayen kurayen yenen han marbe Al Kurun belej alya bereyamin doyan yirde hi bana gon hinayin.

Ningeb goke amañen nurde hinayin.

11 “Be, ne gama nirde hike al belej goke igin ma nurde sukal dirde bulun bulun dirde mere bulun kurayen kurayen ultinde irde hinayin. Goyenbe goke ma nurde aman hen hinayin. 12 Kanduk ten hinayin gote murungembe Al Kurun belej kurun dunyen. Ningeb goke amañen nurde hinayin. Mata gobe tinen mon. Biken Al Kurunyen mere basan mar yirde hinhan gwahade goyen po, den wor gwaha dirde hinayin,” yinyin.

Hulsiya fawya

(Mak 9:50; Luk 14:34-35)

13 Irdeb sopte po yinyin. “Denbe al han kurun gate faw yara. Fawbe meten minyan. Goyenbe daha wet kura ten bulun hiyyenbe daha mat sopte igin irtek? Epte mon. Ningeb faw bulun hitin gobe wok irtek. Irkeb al belej ufurka ten kun hinayin.

14 “Irde denbe al megen han kurun gate hulsi yara. Taun kurun kura dondonde hi gobe epte ma banare hiyen. 15 Gwahade goyen po al kura epte ma hulsi usun urde ten koron po aw uryen. Gwahade yarab ten hende bingun irkeb al ya bin bana hinayin goyen tumnan hulsire hinayin. 16 Gwahade goyen po denbe hulsi yara hen Al Kurun dilinde mata wukken goyen al yikala yirde hinayin. Gogab matatin igin goyen yenenbe Al Kurun sanin minyan goyen isoka irde hinayin.

Al Kurunyen mere sanin ire yen wamirin

17 “Be, monggo ne gayen nenenbe dufaytindeb, ‘Yen belenbe Moseyen sabaya Al Kurunyen mere basan marte sabaya goyen walde pasi hewe yen wayyin,’ yen ma nurnayin. Nebe saba goyen wale yen ma wamirin. Gwaha titjenbe mere gote min wor po goyen ten kawan irmeke nurnan yen wamirin. 18 Fudinde wor po dinen hime. Megenya nanjingya hiriryen goya goyen sabamin gote mere bilmin katin goyen unjukan mun kura bana ma kuyen. Hen henbe sabamin gote iginen

tumŋaŋ forok yenayin. ¹⁹Niŋgeb al kura sabamiŋ kura gama irtek metenŋer mon wor po goyen pel irde go ma gama irdeb al hoyan wor go goya gama irde ma inyen al gobe Al Kurun belen alya bereyamiŋ doyan yird yird bana gon denem mon hiyyen. Munan al kura sabamiŋ gama irde al hoyan saba yiryen al gobe Al Kurun belen alya bereyamiŋ doyan yird yird bana gon denem kurun wor po hiyyen. ²⁰Fudinde wor po dinen hime. Den mata huwak ten hinayin goyen Farisi marya Moseyen saba maryat mata huwak goyen fole ma irnayinbe fudinde wor po epte ma Al Kurun belen alya bereyamiŋ doyan yirde hi bana gon hurkunayin.

Kanduk sope ird ird mata

²¹“Be, bikkenbe Moseyen sabareb taytin yagobe, ‘Al ma gasa yirke kamnayin. Munan al kura gwaha tiyyenbe merere huwarde murungem bulun tiyyen,’ yintin goyen denbe nurde hanŋen gogo. ²²Goyenpoga nebe go hende gaha dinen tihim: al kura kadom inen tiyyen al gobe merere huwaryen. Gwahade goyen po, al kura kadom, ‘Dufaygem mon,’ inyen wor merem yan hen Yuda marte doyan mar dilinde huwaryen. Irde al kura belen kadom kura, ‘Gebe kukuwa,’ inyenbe kak alare kuyen.

²³“Niŋgeb Al Kurun galak ire yen altare gor det yukun henŋab kadge kura belen bulun nurd guntin goyen bege bak yekeb ²⁴detge go alta dilin mar gor po yubul ten kun kadge goya kanduk go sope irde awalik hen gab mulgan hen Al Kurun galak irayin.

²⁵“Be, al kura merem yan girde merere gukun hikeyab aran po kanduktirin go belen kun henŋa sope iriryen. Monŋo kun merere huwarkeb mere nurd nurd al belen gade kimyan titmin haniŋde giryen. Irkeb kimyan titmin belen gade fere girde koyare gernayin geb. ²⁶Fudinde wor po dinen hime. Kat sinare kwen yenbe hora gwahade kerayin gintin goyen tumŋaŋ po kerde pasi irde gab sinare kwayin geb,” yinyin.

Al berem yanbe huwak po hinayin

²⁷Irde sopte yinyin. “Be, mere kurabe gahade yen hike nurde hanŋen: ‘Al berem yanbe bere hoyan ma duwan yirde hinayin. Irde bere wor al hoyan ma duwan yirde hinayin,’ yitin. ²⁸Goyenpoga nebe go hende gaha dinen tihim: al kura bere kura kenen gwaha irmewon yen bin huwaryen gobe bikken bere hoyanya duwan ten ten mata bulun goyen binde tiyyen. ²⁹⁻³⁰Monŋo ulge kurhan kura belen mata bulun tike ulge tumŋaŋ kak alare kwak geb, bulun tiyyen go po ten sina irayin. Delge yase belen mata bulun tikeb goyen marde temeyayin. Hange yase belen mata bulun tikeb go wor walde temeyayin.

Bere takira ten ten mata

(Mat 19:9; Mak 10:11-12; Luk 16:18)

³¹“Be, denbe ‘Al kura berem takira tiye yenbe takira ten ten asan kan haniŋde kerdebe takira tiyyen,’ gwaha yen hike nurde hanŋen.

³²Goyenpoga nebe go hende gaha dineŋ tihim: al kura berem go al hoyan ma duwan irde hikeya epte ma takira tiyyen. Takira tike bere go kuŋ al hoyan tiyyenbe bere goya uŋ gergen goya Al Kurun dilinŋe leplep mata ten har yen yinyen. Goyenbe Al Kurun belen uŋ bikkek gore yirke tahar yen uŋ bikkek go minŋe iryen.” yinyin.

Biŋa ten ten mata

³³Be, Yesu go sopte gaha yinyin: “Bikken Moseyen sabarebe taytin yago, ‘Biŋa ten henya usi ma ten hinayin. Al Kurun hitte biŋa tenbe biŋa tiyayin goyen po gama irayin,’ yintin goyen den wor nurde hanŋen gogo. ³⁴⁻³⁵Goyenpoga nebe go hende gaha dineŋ tihim: nanŋinbe Al Kurunŋen maroro gasun. Irde megenbe yende kahan kerd kerd gasun. Irde Yerusalemben Doyan Al Kurun gote taun. Niŋgeb biŋa tinin yen goya det goyen goya den ma yurnayin. ³⁶Tonanŋin yuwalŋen unŋuren kura goyen tareŋinŋe epte ma umŋam hoyan irnayin. Niŋgeb biŋa tenya tonanŋin ma den urnayin. ³⁷Huginŋen mere fudinŋe po yen hinayin. Niŋgeb mere kura fudinŋe kenem, ‘Fudinŋe,’ yenayin. Munan fudinŋe moŋ keneŋbe ‘Fudinŋe moŋ,’ po yenayin. Go hende mere kura sopte tinayinbe mere gobe Al Bulun hitte mat wayyen.

Wol hen hen mata

(Luk 6:29-30)

³⁸“Be, mere kurabe gahade yen hike nurde hanŋen: ‘Al kura belen delge upul tikeb ge belen wor wol hen dilin upul tiyayin. Irde misinŋe yufele tikeb ge belen wor wol hen misin yufele tiyayin,’ yitin. ³⁹Goyenpoga nebe go hende gaha dineŋ tihim: al kura bulun dirke goya matamin go wol ma hawayin. Al kura wan ulunŋe yase belen sen gurke goya wol ma hen kurhan wor tigiri ten unayin. ⁴⁰Irde al kura ulinŋhorge goke po ten merere geren tikeb buninŋen irde meŋe dibage manan unayin. ⁴¹Irde al kura parsay girde, ‘Kandukne ten 1 kilomita kwa,’ ginkeb faran ure yen nurde kandukmin ten teban 1 kilomita kwayin. ⁴²Irdeb al kura det kuran amu hen gusunan girkeb mali po ten unayin. Munan al kura wan detge kura belenŋen tewe ginkeya ga basin ma irayin.

Asogo

(Luk 6:27-28,32-36)

⁴³“Be, mere kurabe gahade yen hike nurde hanŋen gogo: ‘Kadin yago nin amanen nurd yunen hinayin. Irde asogotinbe bulun bulun yirde hinayin,’ yitin. ⁴⁴⁻⁴⁵Goyenpoga nebe go hende gaha dineŋ tihim: Al Kurunbe al iginya bulunya tumnanŋe nanaya kigarinya yunen hiyen. Niŋgeb asogotin ge amanen nurde yunen hinayin. Irde bulun bulun dirde hinayin mar gobe Al Kurun belen faran yuri yen Al Kurun gusunan irde

hinayin. Gogabe denbe Al Kurun taremin kurun wor po gote dirnen wen igin hinayin. ⁴⁶Be, al kura den ge amanen nurde dunen hinayin mar goke po amanen nurnayinbe Al Kurun belen gote murungem dunyen yen nurde han? Mon. Teks yad yad marbe mata bulun mar yinen hanjen goyen wor kadom ge amanen nurde igin igin yirde hanjen. ⁴⁷Yuda mar mon al min hoyan wor kadom mere gird ten igin igin yirde hanjen. Ningeb kadten yago po mere yirde igin igin yirde hinayinbe matatinbe mel gote folek yen nurde han? Mon. ⁴⁸Nanten Al Kurun tare minyan gobe huwak wor po geb, den dirnen wen wor gwahade go po huwak hinayin,” yinyin.

Al faran yurd yurd mata

6 ¹Be, Yesu belen sopte gaha yinyin: “Be, Al Kurun dilinde mata igin ten hini yenbe kenkela dufay hen ga mata ten hinayin. Al denke po ga mata ten hini ma yen hinayin. Gwaha tinayinbe Adotin Al Kurun sanin minyan gore matatin gote murungem ma dunyen. ²Usi marbe al belen denen turun dirnan yenbe al buninen faran yurnin yen gabu yayan, kurabe belenyan huwarde bigul fu irde ga mata ten hanjen. Goyenbe den goya gwaha ma ten hinayin. Fudinde wor po dinen hime. Matamin gote murungembe al belen turun yirde hinayin goya go po tenayin. Kamebe hubu wor po geb. ³Ningeb al buninen kura faran yurnin yenbe balmin po mata ten hinayin. Hanten yase belen mata igin kura tike goya hanten tapa belen go ma nuryen. ⁴Gwahade goyen po al buninen faran yurnin yenbe al ma denen hikeya faran yurde hinayin. Irkeb Nanten Al Kurun tare minyan gore al faran yurd yurd mata banare ten hinayin gote murungem dunyen.

Al Kurun mere ird ird mata

(Luk 11:2-4)

⁵“Be, usi marbe Al Kurun mere irnin yenbe al denen turun dirnan yen gabu yayan, kurabe belen kogorhonyan al budam kun wan ten hanjende gor huwarde Al Kurun mere irde hanjen. Goyenbe den goya gwaha ma ten hinayin. Fudinde dinen hime. Matamin gote murungembe al belen turun yirde hinayin goyare gog po tenayin. Kamebe hubu wor po. ⁶Ningeb Al Kurun mere irnin yenbe yatin bana hurkun yame tanbe Nanten Al Kurun banare hi goyen mere irde hinayin. Gogab Nanten belen banare hen balmin mata ten hinayin goyen denenbe gote murungem dunyen.

⁷“Yuda mar mon al min hoyan belen unguramin dolon yirde henya mereninin nurnayin yen mere sobamde po yen teban ten hanjen. Goyenbe denbe Al Kurun mere irnin yen goya gwaha ma ten hinayin.

⁸Adotin Al Kurunbe den belen gusunan ma irkeya bikken det goke nurde

haŋ yeŋ nurde hi. Ningeb mel go teŋ haŋ gwaha ma teŋ hinayiŋ. ⁹Ningeb Al Kuruŋ mere irniŋ yeŋbe gaha yeŋ hinayiŋ:

Adoniniŋ, gebe kuruŋ wor po.

Hugiŋeŋ turuŋ girde hitek.

¹⁰ Gere alya bereya doyaŋ yird yird mata goyen kawan forok irayiŋ.

Irdeb dufayger metey teŋ gote igineŋ ge hayende gor igiŋ wor po
forok yirde hayen gwahade goyen po,
megen gayen wor forok yirde hayiŋ.

¹¹ Irdeb haŋkayen biŋgebe gwaha mat nene ep nenayiŋ yeŋbe gwahade po duneŋ hayiŋ.

¹² Irdeb al hoyay beley buluŋ dirke mata buluŋmiŋ halde yuneŋ hityen gwahade goyen po,
mata buluŋniniŋ halde duneŋ hayiŋ.

¹³ Irdeb dubul tike tuŋay buluŋ bana ma kattek.

Irde Al Buluŋ haniŋde mat dumulgaŋ tiyayiŋ.

¹⁴ Ningeb al kura buluŋ dirkeb mata buluŋmiŋ goyen halde yunnayiŋ.

Gogab Adotiŋ tareŋmiŋ kuruŋ gore wor mata buluŋtiŋ halde dunyeŋ.

¹⁵ Munaŋ al kura buluŋ dirkeb halde ma yunnayiŋ gobe Adotiŋ tareŋmiŋ kuruŋ gore wor mata buluŋtiŋ go ma halde dunyeŋ.

Biŋge kutŋa ird ird mata

¹⁶ “Be, usi marbe biŋge kutŋa irde heŋyabe kimiŋ algup neke tupi sam tikeb al beley yeneŋ mel gabe gwaha teŋ haŋ yeŋ dennaŋ yeŋ nurde mata teŋ haŋyen. Goyenbe deŋ goya gwaha ma teŋ hinayiŋ. Matamiŋ gote muruŋgembe al beley turuŋ yirde hinayiŋ goya po tenayiŋ. Kamebe hubu wor po. ¹⁷Ningeb biŋge kutŋa irde heŋyabe fe gemde tonanŋtiŋ par teŋ kutŋare hite yara ma teŋ kuŋ hinayiŋ. ¹⁸Gogab biŋge kutŋare hinayiŋ goyen al beley gwaha teŋ haŋ yeŋ ma deney hinayiŋ. Goyenbe Adotiŋ banare hi gobe nurde hiyeŋ. Ningeb mata balmiŋde teŋ hinayiŋ goyen gote muruŋgem dunyeŋ.

Megen niŋ samuŋ

(Luk 12:33-34)

¹⁹ “Be, megen niŋ samuŋbe sisige beley walnayiŋ, kurab kawe mar beley kawe dirnayiŋ. Irde kurabe tiktuk irde buluŋ henayiŋ. Ningeb dindikeŋ ge nurde samuŋ yade buda ma yirde hinayiŋ. ²⁰Gwahade yarabe samuŋtiŋ goyen yade al faraŋ yurde hinayiŋ. Irkeb Al Kuruŋ beley gote muruŋgem igiŋ wor po goyen kame duneŋ yeŋbe gasuŋmiŋde yerde hiyeŋ. Gobe det kura beley epte ma buluŋ yirnayiŋ. ²¹Dufaytiŋ kuruŋbe samuŋtiŋ hiyeŋde gor po hiyeŋ geb, gago momoŋ dirde hime.

²² “Be, diltiŋbe ulitiŋde hulsu yara. Ningeb diltiŋ igiŋ hinayiŋbe hulsire haŋ yara Al Kuruŋyen samuŋ banare hi goyen keneŋ keŋkela bebak teŋ

hinayin geb, hej hentin igin wor po hiyyen. ²³Munan diltin bulunbe samunmin epte ma kenen bebak ten megen nin samun nin po nurde hinayin geb, hej hentin gobe kidoma belen po aw duryen. Ningeb Al Kurunyen samun banare hi goyen kenen bebak titek yarabe bebak ma tinayinbe hej hentinbe bulun wor po hiyyen. ²⁴Albe epte ma wawun unkurunde po doyan al irawa nin meten ten yunyen. Epte mon wor po. Gwaha titnenbe doyan al kurabe harhok unyen. Munan kurabe amangen nurd unen kenkela awalik irde hiyen. Ningeb gwahade goyen po, epte ma Al Kurunja horaya tumjannde meten ten yunnayin.

Hej henge nin ug po ma dufay hawayin
(Luk 12:22-31)

²⁵“Ningeb fudinde dinen hime. Megen gar henya daha mat bingeya feya netek, irde ulninindebe da yade umna ten hitek yenbe hej hentin ge ugun po ma dufay hej hinayin. Bingebe igin gega, gore po epte ma hej hentin igin iryen. Ultin umna manan gwahade po ultin igin ma iryen. ²⁶Be, nu nin nurnan. Yenbe bingge ma harde hanjen. Irde sak yeke yade bingge yadi yerd yerd yare ma yerde hanjen. Goyenbe Al Kurun belen paka yirde hiyen. Al Kurun sanin minyan belen nu wor gogo kenkela po doyan yirde hiyen. Munan denbe nu gote folek wor po geb, dahadem Al Kurun belen denen wasak tike bingge kamnayin? Epte mon geb. ²⁷Den gayen kura megen gar hej hej nin ugun po dufay henayinbe igin nalutin goyen mun kura singir irde ulyande hinayin? Epte mon.

²⁸“Irde dani geb ultin umna nin ugun po dufay hej hanjen? Yamun fuwalabe yenenmin igin mun wor po goke nurnan. Yenbe ulin umna nin meten ma ten ulinhor kura ma gada yirde hanjen. ²⁹Goyenbe fudinde wor po dinen hime. Biken Israelyen doyan al kurun Solomonbe ulin umna kusamun wor po yerde hinhin. Goyenpoga ulin umnamin igin wor po gore yamun fuwala goyen epte ma fole yirtek hinhan. ³⁰Yamun fugala gobe nalu sobamde ma hanjen. Hanke hinayin, gisebe al belen walde kakde yemeyde hanjen. Be, gwahade goyen po, yamun fugala gobe det kurun kura gogo mon gega, Al Kurun belen doyan yirde umna yirde hiyen geb, denbe dani ulninin umna ma gitik ten dunyen yen goke ugun po dufay hej han? Denbe Al Kurun nin heken wor po ma nurde han. ³¹Ningeb da bingge netek, da fe netek, irde da yade ulninin umna titek yen goke dufay ugun po ma hej hinayin. ³²Megen nin mar ne nin ma nurde han gore gab det budam kurun gwahade goyen yad yad nin ugun po dufay hej goke kanduknen nurde hanjen. Goyenbe Adotin Al Kurun sanin minyan gobe det goke nurde han yen biken denen hiyen. ³³Ningeb denbe Al Kurun belen doyan dird dirdya mata huwak ten tenya nin wa nurde hinayin. Irke gab Al Kurun belen den det kurun nurde hinayin kurun goyen wor dunen hiyen. ³⁴Ningeb sopte fay urkeb daha titek yen

goke dufay ugun po ma hej hinayin. Fay urke gab gwaha kura tiye yen nurnayin. Han̄kayen kandukbe han̄kayen po, munan̄ giseyenbe giseyen po geb,” yinyin.

Kadtiṅde mata goke bulun̄ mat ma yawayin

(Luk 6:37-38,41-42)

7 ¹⁻²Be, Yesu go sopte gaha yinyin: “Al kura kadam mata tike kenen̄be, ‘Nebe igin, munan̄ yen̄be bulun̄ ten̄ hi,’ yiyyen̄be al go wor Al Kurun̄ beleṅ gwaha po iryen. Al kadtiṅ kurate mata daha mat kennayin̄be Al Kurun̄ wor gwaha mat dinyen. Ningeb al kadtiṅ beleṅ mata kura tike goya den̄ beleṅ, ‘Nen̄be huwak,’ yen̄ nurde, ‘Al gobe danin̄ bulun̄ tiya?’ ma yen̄ hinayin. Mon̄go Al Kurun̄ beleṅ den̄ wor gwaha po diryen geb. ³Den̄be kadtiṅde mata bulun̄ muknen̄ mun̄ wor po mukun̄ yara goyen yenen̄ goke yen̄ han̄. Goyenbe dindiken̄de mata bulun̄be he parwek karkuwan̄ yara diltin̄ pet ten̄ han̄ goyen go ma po nurde han̄. ⁴He parwek gore huginen̄ diltin̄ pet titin̄ han̄ goyen ma yenen̄ya dahade ningeb, ‘Kadne, mukun̄ delger hi go ten̄ siṅa ire?’ innayin? ⁵Dulin̄ usi mar wor wor, mehen̄deb dindiken̄de diltin̄de nin̄ he parwek go wa yade siṅa yirnayin. Irde gab diltin̄ ken̄kela nan̄kenen̄be kadtiṅ dilinḡde mukun̄ goyen igin̄ yad siṅa yirnayin.

⁶“Be, den̄be det kura Al Kurun̄ untek goyen yade kulu ma yunen̄ han̄yen. Irde selwen̄ yara det damum hende hoyan̄ goyen yade bu binde ma yemeyde han̄yen. Gwaha yirkeḅ samun̄ igin̄ kura gogo yen̄ ma nurde mali yufurka tinayin. Ningeb gwahade goyen po, al kura Al Kurun̄yen merebe titmin̄en̄ min̄ min̄mon̄ yen̄ nurde han̄ mar gobe Al Kurun̄yen det mali mali ma yunen̄ hinayin. Mon̄go mel gore tigiri ten̄ buya kuluya beleṅ disen̄ sak dirtinen̄ dirnayin geb,” yinyin.

Al Kurun̄ gusun̄an̄ ird ird nin̄ bada ma henayin

(Luk 11:9-13)

⁷⁻⁸Irdeb sopte po gaha yinyin: “Be, al kura beleṅ det kuran̄ nurde Al Kurun̄ gusun̄an̄ irkeḅ unyen. Irde det kuran̄ nan̄kenen̄ kurut yekeḅ ikala iryen. Irde yen̄ beleṅ alya bereyamin̄ doyan̄ yirde hi bana gon̄ hurkun̄ hurkun̄ yame goyen mayde teban̄ irkeḅ yame hol ird unyen. Ningeb den̄ wor det kura nin̄ nurde Al Kurun̄ gusun̄an̄ irtin̄de po hikeḅ dunyen. Det goke nan̄kenen̄ kurut yitin̄de po hikeḅ dikala diryen. Irde yen̄ beleṅ alya bereyamin̄ doyan̄ yirde hi bana gon̄ hurkun̄ hurkun̄ yame mayde teban̄ irkeḅ yame hol ird dunyen.

⁹“Be, den̄ gayen al ganun̄be dirin̄min̄ beleṅ binḡe nin̄ yekeḅ hora ten̄ unyen? ¹⁰Irde makan̄ dap̄na nin̄ yekeḅ kunere ten̄ unyen? ¹¹Den̄ mata bulun̄ mar wor dirin̄tin̄ yago beleṅ det kuran̄ yekeḅ det igin̄ po yunnin̄ yen̄ nurde han̄yen. Ningeb Adotin̄ Al Kurun̄ san̄in̄ min̄yan̄ gobe den̄

megen niŋ mar gote folek geb, gusuŋaŋ irkeb det igiŋ wor po goyen dunyeŋ geb.

¹² “Gwahade niŋgeb mata teŋ hinayiŋ kuruŋ gobe al hoyaŋ beleŋ neŋ gwaha gwaha dirde hiwoŋ yeŋ nurde haŋ gwahade goyen po, deŋ wor gwahade po yirde hinayiŋ. Moseya Al Kuruŋyen mere basaŋ marya beleŋ saba teŋ hinhan gote miŋ wor pobe gago geb.

Yame dirŋeŋ bana hurkunayiŋ
(Luk 13:24)

¹³⁻¹⁴ “Be, kak alare kuŋ kuŋ yamebe kuruŋ, irde gor kuŋ kuŋ beleŋbe meteŋeŋ moŋ. Niŋgeb al budam yame goyen bana hurkuŋ haŋ. Munəŋ Al Kuruŋya hugiŋ heŋ heŋ gasuŋde gor kuŋ kuŋ yamebe dirŋeŋ muŋ wor po. Irde beleŋ manəŋ meteŋeŋ. Niŋgeb al yuŋkureŋ yuŋkureŋ beleŋ muŋ po gab yame goyen keneŋ bebak teŋ haŋ. Niŋgeb deŋbe yame dirŋeŋ bana gore hurkunayiŋ.

Heya he gote igineŋya

¹⁵ “Be, Al Kuruŋyen mere basaŋ mar falkuk niŋ keŋkela heŋ hinaŋ ko. Go mar gobe dapŋa fulenjam moŋ sipsip yara heŋ wanayiŋ. Mereminbe igiŋ yara gega, biŋ bana dufaymiŋbe buluŋ wor po geb, kulu duwi beleŋ al isitiŋ yara heŋ heŋtiŋ buluŋ wor po irnayiŋ. ¹⁶ Gwahade mar gobe matamiŋde po gabe fudinde Al Kuruŋyen mere basaŋ mar ma usi mar wet goyen yeneŋ bebak teŋ hinayiŋ. Al beleŋ wain igineŋbe kaŋ hoyaŋ hende ma yade haŋyen. Fik he igineŋ wor he mali hende ma yade haŋyen. ¹⁷ Gwahade goyen po, he igiŋbe igineŋ igiŋ po forok yirde hiyen. Munəŋ he buluŋbe igineŋ buluŋ po forok yirde hiyen. ¹⁸ Niŋgeb he igiŋbe igineŋ buluŋ ma forok yiryen. Munəŋ he buluŋbe igineŋ igiŋ ma po forok yiryen. ¹⁹ Niŋgeb he kura igineŋ igiŋ ma forok yiryen gobe ilde kak alare temeynayiŋ. ²⁰ Niŋgeb gwahade goyen po, matamiŋ beleŋ gab mel gobe gwahade mar yeŋ yeneŋ bebak tinayiŋ.

²¹ “Be, alya bereya megen heŋya, ‘Doyaŋ Al Kuruŋ, Doyaŋ Al Kuruŋ,’ ninen haŋ gega, al yuŋkureŋ beleŋ po Al Kuruŋyen alya bereya henayiŋ. Adone Al Kuruŋ saŋiŋ miŋyaŋ gote dufay goyen keŋkela nurde go po gama irde haŋ mar po gab Al Kuruŋyen alya bereya henayiŋ. ²² Nalu funaŋde goyenterbe al budam beleŋ, ‘Doyaŋ Al Kuruŋ, Doyaŋ Al Kuruŋ, neŋbe saŋiŋger merege basaŋ heŋ tagalde hinhet. Irde tareŋger ungura yakira teŋ mata tiŋeŋ kurayen kurayen yirde hinhet. Niŋgeb neŋbe gere alya bereya,’ ninnayiŋ. ²³ Goyenbe ne beleŋ kawan po, ‘Mata buluŋ mar, nebe go ma wor po nurd dunen hime. Hoyaŋ kunaŋ!’ yinen.

Al irawayen ya ird ird mata
(Luk 6:47-49)

²⁴ “Be, gwahade niŋgeb al kura merene nurde gama iryen al gobe ya ire yeŋbe tola metemiŋ dukuŋ po talde hora po daluŋ unyen go gwahade

goyen. ²⁵Kigarij kuruj katej figilu tenen yan kuyen. Irde menen sanij yare gor kuyen gega, tolambe sanij po yimiytin geb, epte ma tobo tike katyen. ²⁶Goyenbe al kura merene nurde ga gama ma iryen al gobe al kukuwa kura mulowo hende ya iryen go gwahade goyen. ²⁷Ningeb kigarij kuruj katej figilu tenen yan kuyen, irde menen sanij yare gor kukeb tolambe mulowo hende yimiytin geb, ya gobe katej bulun wor po hiyyen,” yinyin.

²⁸⁻²⁹Be, Yesu go sabamin pasi irkeb gor hinhan mar gore meremin go tonnen yan wor po nuramin. Irdeb hurkunjat tenbe, “Ey, sabamin gabe Moseyen saba marte saba yara mon be!” yamin.

Al busuka minyan sope iryin

(Mak 1:40-45; Luk 5:12-16)

8 ¹Be, sabamin go pasi irdeb dugure gor mat katej kun hikeb al budam gama irde kun hinhan. ²Irkeb busuka minyan al kura gore wan kimin mar dokolhon yugulun tenbe, “Doyan Al Kuruj, dufayger wilaknen nurdeb sope nirke igin hewen,” inyin. ³Irkeb al go ulinde hani kerdeb, “Igin guram giren. Ningeb igin hawa!” inyin. Irkeb goyare po busuka go tubul tike igin hiri. ⁴Irkeb, “Igin haha gake al kura momon irak yo. Gwaha titnenbe Al Kuruj dolon ird ird mata doyan mar hitte kun sikkenge yikala yirke kenenbe fudinde igin haha ginnayin. Irke gab Mose bejen bikken yirin mata goyen gama irde dapna kura mel go yunnayin. Irkeb ge nin ten Al Kuruj nin dapna go kumga tinayin. Irkeb al tumnan fudinde igin hihi yen gennayin,” inyin.

Fuleja marte doyan alyen dufaymin taren

(Luk 7:1-10)

⁵Be, gwaha tenbe Yesu go Kapeneam taunde kurin. Irkeb Roma gabmanyen fuleja marte doyan al kura gore faran nuri yen wayyin. ⁶Irdeb, “Doyan Al Kuruj, meten alne kura ulin kamke ulin misin kuruj wor po katej yare ferde hi,” inyin. ⁷Irkeb Yesu bejen, “Kun sope iren,” inyin. ⁸Irkeb al gore wol henbe, “Doyan Al Kuruj, ge bejen ne al gahade gate yare kutek mon. Ningeb dulin mere po tikeb meten alne igin hiyyen. ⁹Ne wor doyan alner yufukde hen yende mere po gama irde himyen. Irde ne wor fuleja mar kura doyan yirde hime geb, al goyen kura, ‘Kwa,’ inmekeb kuyen. Munan kurabe, ‘Waya,’ inmekeb wayyen. Irde meten alne manan, ‘Det ga ira,’ inmekeb gwaha po tiyyen,” inyin. ¹⁰Irkeb Yesu bejen al gote mere go nurde tulfut yirin. Irdeb gama irde kun hinhan mar goyen fulan kanbe, “Fudinde wor po dinhem. Israel bana ga ne nin dufaymin sanij irtin al kura gahade ma kenen himyen. Hubu wor po. ¹¹Ga nurnan ko. Kame kame Al Kuruj bejen alya bereyamin doyan yirde hi bana

^f 8:5 Fuleja marte doyan al gabe fuleja mar 100 doyan yirde hyen.

gorŋ dula mata kurun forok yiyyen. Goyenterbe Yuda mar mon al min hoyan beleŋ megeŋ kurun ga hike kwa gayen kurhan mat mat wanbe Yuda marte asem yago Abraham, Aisakya Yekopya irde gasunminyan gasunminyan keperde dulan ten hinayin. ¹²Goyenbe Yuda marbe Al Kurun beleŋ basiŋa yirtin gega, ne nin dufaymin sanin ma irnayin mar gobe yakira tike sinare kidoma bana gorŋ hinayin. Irde esenbe misin yisen hinayin,” yinyin. ¹³Irdeb fulen marte doyan al goyen, “Iginge kwa. Ne nin dufayge sanin irde ha geb, gwahade forok yewon yen nurha gwahade po forok yiyyen,” inyin. Irkeb meten alminbe Yesu beleŋ mere tiyyin nalu goyenter po igin hirin.

Yesu beleŋ al budam sope yirin

(Mak 1:29-34; Luk 4:38-41)

¹⁴Be, Yesu go Pitayen yare kunbe Pita tenak aygan minyan ferde hike kinyin. ¹⁵Irde kun haninde tanarkeb aygan go tubul tiyyin. Irkeb bere gore huwarde binde kan yunin.

¹⁶Be, kun hako ga kidoma hen hikeb ungura ketal yurtin mar budam yawayamin. Irkeb Yesu beleŋ ungura go merere po yakira tiyyin. Irde al garbam minyan manan tumande sope yirke igin hamin. ¹⁷Gwaha ten hinhin goke bikken Al Kurunyen mere basan al Aisaia beleŋ asande mere kura gahade kayyin:

“Al gobe nende mata bulunya garbamniniya pasi yiryen,” yitin hi.

Aisaia 53:4

Ningeb mere gote iginenbe mata gogo forok yirde hinhin.

Yesu gama irninbe det kura yubul tinayin

(Luk 9:57-62)

¹⁸Be, Yesu gob al budam wan gabu irke yenenbe komatmin yago goyen, “Fe ala kurun ga sin iron mat kunin,” yinyin. ¹⁹Irkeb Moseyen saba tagal tagal al kura gore wanbe, “Tisa, nebe ge kun hen taha kurun gobe gama po girde kun hen,” inyin. ²⁰Irkeb wol hen, “Kulu duwibe ferd ferd gasun minyan. Nu wor hagam yan. Goyenpoga ne Al Urmin⁸ gabe gor kura ferde usan hetek gasunnem mon,” inyin. ²¹Irkeb komatmin hoyan kura goreb, “Doyan Al Kurun, nebe gama giren gega, kun adone wa ten mete ten gab wan gama giren,” inyin. ²²Irkeb Yesu beleŋ, “Wan gama nira! Al kamtin gobe tubul tike al ne nin ma nurde Al Kurun dilinde kamtin yara han mar gore gab ten mete tinayin geb,” inyin.

Yesu beleŋ mege kurun masi irke tik yirin

(Mak 4:35-41; Luk 8:22-25)

²³Be, gwaha tenbe hakwa kura go hende hurkurin. Irkeb komatmin yago wor go hende hurkunbe yenya kwamin. ²⁴Irke gwahade forok

⁸ 8:20 Al Urmin gote minbe alya bereya Al Kurun hitte Yumulgan ten ten Al. Daniel 7:13 gorbe denem Al Urmin goyen hi.

yewen tiya yen ma nurkeya bemel po meŋe kurun huwaryin. Irkeb duba karkuwan karkuwan funde wan hakwa mayde binde hurkun ala hen hinhin. Goya goyenbe Yesube firtinge hinhin. ²⁵Irkeb komatmin belen kun isan henbe, “Doyan Al Kurun, fe nene kamnin tihit geb, faran dura!” inamin. ²⁶Irkeb huwarde, “Danin geb ne nin heken ma nurde kafura hen han?” yinyin. Irdeb meŋeya makanya bulun wor po hiriŋ goyen masi yirke kamaryum. ²⁷Irkeb mel go hurkunat tenbe, “Da albe gago? Meŋeya makanya wor yende mere nurhar!” yen kadam gusunan gird tiyamin.

Gadara marte nanare kurin

(Mak 5:1-20; Luk 8:26-39)

²⁸Be, meŋe kamke mel go kun kunbe Galili fe ala sina kurhan Gadara marte nanare forok yamin. Irkeb al irawa kura ungura ketal yurtin bembayan hen kun haryen gore Yesu hitte wayaryum. Al irawa gobe misinen yan wor po geb, albe yen haryenyan gor kutek mon. ²⁹Be, irem gore Yesu hitte wanbe, “Al Kurun Urmin, daha diren wayha? Nalu hako hikeya bulun dire yen wayha?” inen kwep iraryum. ³⁰Be, goya goyenbe bu buda kurun kura sorte yarham po hen dulan ten hinhan. ³¹Ungura gore Yesu goyen esen mere irdeb, “Dakira tiye yen nurdeb dad derke kun bu buda iro ketal yurtek,” inaryum. ³²Irkeb, “Kunan!” yinkeb ungura buda go al irawa goyen yubul ten kun bu buda kurun go ketal yurkeb kun hamulare mat fe alare katen fe nene kamamin. ³³Irkeb bu doyan yirde hinhan mar gobe busaharde taunde kunbe al irawa unguram yanja bu budaya hitte mata forok yirin kurun goyen goke al momon yiramin. ³⁴Irkeb al taunde nin gobe tumnan Yesu kinnin yen gir yen wayamin. Irde wan kenenbe, “Nananininde gar ma hayin. Dubul ten kwayin,” inen esen mere iramin.

Al ulin kamtin sope iryin

(Mak 2:1-12; Luk 5:17-26)

9 ¹Be, gwaha irkeb Yesu go hakwa hende hurkunbe mulan hen meten ten hiyen taunde Kapeneam kurin. ²Irkeb al ulin kamtin kura goyen sapir hende tawayamin. Irkeb Yesu belen mel gote dufaymin yen ge tareŋ irtin go yenenbe al goyen, “Dirin, kanduknen ma nurayin. Mata bulunge halhem geb,” inyin. ³Gwaha yekeb Moseyen saba mar kura belen go nurdeb, “Ey, Al Kurun belen po ga alyen mata bulun halde yunen hiyen gega, al gare gwaha tihim yen hi geb, al gabe Al Kurun sukal irde hi,” yen dufay hamin. ⁴Irkeb dufaymin yenen bebak tenbe, “Danin geb bitinde dufay bulun kerde han? ⁵Daminbe metenen yen nurde han? ‘Mata bulunge halde gunhem,’ yihim goyen ma ‘Huwarde kwa,’ yewen goyen? ⁶Dufaytindebe al garbam sope ird ird gobe metenen yen nurde

haŋ. Ningeb nebe deŋ beleŋ metenŋ nurde haŋ goyen ireŋ tihim. Irmeke gab megen garbe ne Al Urmiŋ gabe alyen mata buluŋ halde halde saŋiŋ miŋyaŋ yeŋ nenenŋ bebak tinayiŋ,” yinyiŋ. Irdeb al uliŋ kamtiŋ goyen, “Huwarde gasunŋe teŋ yager kwa,” inyiŋ. ⁷Irkeb al go huwarde yamiŋde kuriŋ. ⁸Irkeb al buda gor gabu iramiŋ goyen mata go kenenbe hurkuŋkat tiyamiŋ. Irdeb Al Kuruŋ beleŋ al guram yird yird tarenŋ al yuntiŋ goke Al Kuruŋ turuŋ iramiŋ.

Yesu beleŋ Matiyo hoy iryiŋ

(Mak 2:13-17; Luk 5:27-32)

⁹Be, gwaha teŋ Yesu go gor mat hoyanŋde kuŋ heŋyabe al kura deŋem Matiyo goyen teks yad yad gasunŋde hike kinyiŋ. Irdeb, “Waŋ gama nira,” inyiŋ. Irkeb al gore huwarde Yesu gama iryiŋ.

¹⁰Be, Yesuya komatmiŋya Matiyuyen yare heŋ biŋge nene hikeb teks yad yad marya^h al kura Moseyen saba keŋkela ma gama irde hike, “mata buluŋ mar” yinenŋ hanŋen mar goya waŋ yeŋya heŋ dulaŋ teŋ hinhan.

¹¹Irkeb Farisi mar beleŋ go yenenbe Yesuyen Komatmiŋ gusuŋaŋ yirdeb, “Daniŋ geb tisatiŋbe teks yad yad marya ‘mata buluŋ mar’ yinenŋ hityen mar goya biŋge nene haŋ?” yinamiŋ. ¹²Irkeb mere go nurdeb Yesu beleŋ, “Al uliŋde igiŋ po hiyeŋbe guram al niŋ ma nuryeŋ. Al garbam miŋyaŋ beleŋ gab guram al niŋ nuryeŋ. ¹³Nebe neŋ al huwak yeŋ nurde haŋ mar goyen hoy yire yeŋ ma wamiriŋ. Goyenpoga neŋbe mata buluŋ mar yeŋ nurde haŋ mar goyen hoy yire yeŋ wamiriŋ. Goke teŋbe Al Kuruŋ beleŋ, ‘Nebe al beleŋ galak nird nird niŋ ma nurde hime. Kadom buniŋeŋ gird gird mata goke amanŋeŋ nurde hime,’ yitiŋ goyen kuŋ miŋ gwahade yeŋ keŋkela dufay heŋ nurnaŋ ko,” yinyiŋ.

Biŋge kutŋa mata niŋ Yesu gusuŋaŋ iramiŋ

(Mak 2:18-22; Luk 5:33-39)

¹⁴Be, gwaha yinenbe gor hinhan. Irkeb Yon Baptaisyen komatmiŋ beleŋ waŋbe, “Neŋya Farisi maryabe biŋge kutŋa irde hityen gega, dahade geb komatge weŋbe gwaha ma teŋ haŋ?” inenŋ gusuŋaŋ iramiŋ. ¹⁵Irkeb Yesu beleŋ wol heŋbe, “Albe tikiŋ mere miŋ aly tumŋaŋ heŋyabe daniŋ esenŋ hinayiŋ? Epte moŋ. Goyenbe tikiŋ mere miŋ al goyen asogom beleŋ waŋ teŋ kuke gab yeŋ ge nurde biŋge kutŋa irde hinayiŋ,” yinyiŋ. ¹⁶Irde yeŋbe saba gergeŋ tagalde hi goyen goke maya mere mat gaha yinyiŋ: “Al kura amil gergeŋ walde teŋ uliŋhor bikkek erek yitiŋ goyen ma pet teŋ gada iryeŋ. Gwaha irkeb amil parwek gergeŋ gore uliŋhor bikkekde niŋ

^h **9:10** Teks yad yad marbe Israel mar niŋ ma metenŋ teŋ hinhan. Roma gabman niŋ teŋ teks yade hinhan. Irde teks hora kurabe yiŋgeŋ ge yade hinhan geb, mel goke Israel mar beleŋ igiŋ ma nurde yuneŋ hinhan.

kaŋ goyen yuluŋ teŋbe erek yitiŋ yameŋ gobe sopte buluŋ wor po iryeŋ. ¹⁷Gwahade goyen po, al wain fimiŋ gergeŋ yade dapŋa sikkeŋ po wain fimiŋ heŋ heŋ irtiŋ bikkeŋ bana goŋ ma unnayiŋ. Gwaha irnayiŋbe wain fimiŋ gergeŋ goreb dapŋa sikkeŋ bikkeŋ go kumga tikeb erek niyyeŋ. Irkeb wain fimiŋ wok yiyyeŋ. Dapŋa sikkeŋ go mananŋ gog po buluŋ hiyyeŋ. Albe gwaha ma teŋ hanŋyen. Wain fimiŋ gergeŋbe wain fimiŋ heŋ heŋ dapŋa sikkeŋ gergeŋ bana po unenŋ hanŋyen. Irkeb det irawakde buluŋ ma hiriryenŋ,” yinyiŋ.

Bere dirŋeŋ kamtiŋya bere kura danduku miŋyaŋya goyen sope yiryiŋ
(*Mak 5:21-43; Luk 8:40-56*)

¹⁸Be, Yesu go saba yirde hikeyab gor niŋ doyaŋ al kura waŋ Yesu diliŋ mar dokolhoŋ yuguluŋ teŋbe, “Wernebe gayamuŋ ga kama. Goyenbe kuŋ hange uliŋde kerkeb sopte huwaryenŋ,” inyiŋ. ¹⁹Irkeb Yesu go huwarde al goya kwaryum. Komatmiŋ yago wor gama irde kwamiŋ.

²⁰⁻²¹Be, hako kuŋ hikeyab bere kura dama 12 gayen danduku mananŋ hiyen gore dufaymiŋde po, “Kuŋ meŋere niŋ uliŋhormiŋ po sisanŋ ureŋbe igiŋ heweŋ,” yeŋ nurdeb kame beleŋ mat waŋbe Yesuyen meŋe diba uliŋhor goyen muruŋde sisanŋ uryiŋ. ²²Be, bere gore gwaha tikeb Yesu beleŋ fulgaŋ kaŋ kinyiŋ. Irdeb, “Werne, kandukŋeŋ ma nurayiŋ. Dufayge ne niŋ saŋiŋ irha gore sope girke igiŋ haha geb,” inyiŋ. Irkeb goya goyen po igiŋ hiriŋ.

²³Be, Yesu go kuŋbe doyaŋ al waŋ tupi teŋ kwaryum al gote yare forok yeŋbe ya biŋde hurkuriŋ. Hurkuŋbe doloŋde niŋ buleluŋ fuk yird yird marya eseŋ marya gabu irde hinhan go yinyiŋ. ²⁴Irdeb, “Bere gabe ma kama. Duliŋ ferde hi. Niŋgeb kat siŋare kunaŋ!” yinyiŋ. Irkeb mel goreb hinmaŋ faykeŋ iramiŋ. ²⁵Be, al buda go yakira tike megen kuŋ pasi hamiŋ. Irkeb Yesu po hurkuŋ bere go haniŋde tanarkeb kamiŋde mat huwaryiŋ. ²⁶Irkeb gote mere momoŋmiŋbe al naŋa bana go hinhan gobe nurde tukutiŋ ala tiyamiŋ.

Diliŋ titmiŋya mohoŋ katŋiŋya guram yiryiŋ

²⁷Be, Yesu mel go yubul teŋ kuŋ hikeb diliŋ titmiŋ al irawa beleŋ kuware, “Dewit Urmiŋ, bunineŋ dirde faraŋ dura be,” inenŋ gama iraryum. ²⁸Goyenbe Yesube nurd nurd yare hurkuriŋ. Irkeb al irawa goyen mananŋ gama irde kukeb, “Der gayen epte sope diryeŋ yeŋ ne niŋ dufaytiriŋ saŋiŋ irde har?” yinenŋ gusuŋaŋ yiryiŋ. Irkeb, “Gwahabe, Doyaŋ Al Kuruŋ,” inaryum. ²⁹Gwaha yekeb Yesu beleŋ diliŋyaŋ sisanŋ yurdeb, “Ne niŋ dufaytiriŋ tareŋ irhar geb, nurhar gwahade po forok yiyyeŋ,” yinyiŋ. ³⁰Irkeb diliŋ wuk yeke naŋkenaryum. Irkeb, “Sope dirhem gake al kura ma po momoŋ yiriryenŋ,” yinenŋ saŋiŋ po utaŋ yiryiŋ. ³¹Gega irem go siŋare kuŋbe Yesu beleŋ sope yiryiŋ goyen tagalde tukukeb al naŋa bana goŋ niŋ gobe nurde pasi hamiŋ.

³²Be, Yesuya komatminya goyen sinjare heŋ kuŋ hikeb ungura ketal urke mohon kattiŋ al kura goyen Yesu hitte tawayamin. ³³Irkeb Yesu belen ungura go takira tikeb al mohon kattiŋ goyen mere tiyyin. Irkeb al buda kurun gobe hurkunŋat tenbe, “Israel nanja bana gaŋ mata gahade kura ma kenen hityen!” yamin. ³⁴Goyenbe Farisi marbe, “Ungurayen kurunmin gote tarende ungura yakira ten hi,” yamin.

Al Kurunyen meten marbe budam mon

³⁵Be, Yesu go taunyaŋya tiyunyaŋya kurun goyen kunbe Yuda marte gabu yayan mere igin Al Kurun belen alya bereyamin doyan yird yird goke saba yirde hinhin. Irde al garbam min kurayen kurayen goyen sope yirde hike igin heŋ hinhan. ³⁶Gwaha ten kuŋ henjab al buda go yinyin. Irdeb al buda gobe sipsip kura yewek minmon heŋ buninen buninen ten yingen gwaha mat kura sanin hetek mon yara yenenbe buninen wor po nurd yunyin. ³⁷Irde komatmin yago siraw mere mat, “Bingebe sak yen ep haŋ gega, binge goyen yad yad meten marbe budam mon. ³⁸Nin geb binge meten gote Doyan Al Kurun gusunŋan irkeb meten mar budam yad yerke metenminde gor kuŋ binge yade hinayin,” yinyin.

Yesuyen mere basan mar 12

(Mak 3:13-19; Luk 6:12-16)

10 ¹Be, Yesu belen komatmin 12 goyen yinke kuŋ gabu irkeb garbammin kurayen kurayen sope yird yirdya ungura yakira ten ten tarenya yunyin. ²Yesuyen mere basan mar 12 gote denembe gago: mehenbebe Saimon denem kurabe Pita. Irde kulin Andruya, Sebedi urmin waran Yemsya kulin Yonya. ³Filipya Batolomiyuya Tomasya teks yad yad al Matiyuya. Irde Tadiusya Alfius urmin Yemsya. ⁴Irde Saimon Selotyabeⁱ Yesu asogom haniŋde kiryin al Yudas Iskariotya.

Mere basan marmen meten yunyin

(Mak 6:7-13; Luk 9:1-6)

⁵Yesube go mar 12 goyen yad yerke kunin tiyamin. Kunin tikeb saba gahade yiryn: “Al min hoyan Yuda mar mon hitte ma kunayin. Irde Samaria marte taun kura bana ma po kunayin. ⁶Israel marbe Al Kurunyen sipsip gega, meremin ma nurde duwi hamin geb, yen hitte kunayin. ⁷Kuŋ henjab, ‘Al Kurun belen alya bereyamin doyan yird yird nalu gobe binde hihi,’ yinen tagalde hinayin. ⁸Irde garbam mar sope yirde, al kamtin yisan heŋ, al busuka minyanbe sope yirde, al unguram yanbe ungura go yakira ten kuŋ hinayin. Taren gobe dulin tahan geb,

ⁱ 10:4 Yesu hinhin goyenterbe Roma gabman asogo irde hanjen mar kura hinhan. Go mar gobe Selot yinen hinhan.

gwahade goyen po den wor murungem mon dulin al faran yurde hinayin. ⁹⁻¹⁰ Irkeb meten ten hinayin goke al beleh faran durde hinayin. Ningeb kunin yenbe hora unjkuren mun kura ma po ten kunayin. Irde kalwa ma yawarnayin. Ulinhorbe ulinde han gog ep geb, hoyan ma yawarnayin. Kahanbasanya genunya wor hoyan ma yawarnayin. ¹¹ Taunyaanya tiyunyaanya kunbe al kura gargar dirtek al goke nankenen yenenbe yenya hinayin. Yenya hen kun kun metentin pasi irhet yen nurdeb yubul ten hoyande wor kunayin. ¹² Be, al gote yare kunbe ya min mar goyen, ‘Al Kurun beleh bitin yisikamke ga hinayin,’ yinnayin. ¹³ Irke mel go den ge igin nurke yenenbe bin kamke hen hen mata goyen gor po tubul tike hiyen. Munan igin ma denke yenenbe bin kamke hen hen mata gobe den hitte mulgan hiyyen. ¹⁴ Al kura gargar ma dirde meretin ma nurkeb mel gore Al Kurunyen mere pel irhet yen bebak tina yenbe kahanntinde nin tupi go busan hen gab ya wet ma taun wet kura goyen tubul ten kunayin. ¹⁵ Fudinde wor po dinen hime. Taun goyenter nin marbe kame Al Kurun beleh al iginya bulunya pota yiryen nalureb mata bulunmin gote murungem bulun wor po tenayin. Bikken Sodomya Gomoraya taunde nin mar beleh mata bulun ten hinhan gote murungem tamin gote folek wor po tenayin geb,” yinyin.

Kanduk kurayen kurayen forok yenayin
(*Mak 13:9-13; Luk 21:12-17*)

¹⁶ Be, Yesu go sopte gaha yinyin: “Den kunayin bana gonbe bulun dirtek marbe budam han. Ningeb sipsip yad yermeke kulu duwi kahal bana kutnen tinin tahan. Ningeb den meten ten kun henyabe kunere beleh kenkela dufay hen ga mata ten hanjen go gwahade goyen po ten hinayin.^j Kalyingibe bulun gog kura tiya yen ma nurde hityen. Ningeb den wor matatin gwahade po ten kun hinayin. ¹⁷ Irdeb al nin nurde ga meten ten hinayin. Mel gore merem yan dirke merere huwarnayin. Irde kurabe gabu yayan dukun dusulak tinayin. ¹⁸ Ne nin bulun nurde han mar beleh dukun megen nin doyan mar kurayen kurayen dilinde merere derde hinayin. Irkeb ne nin gusunan dirkeb mel goya Yuda mar mon al min hoyanya goyen momon yirnayin. ¹⁹⁻²⁰ Ningeb wan dade merere dukun gusunan dirkeb daha yinin tihit yen barbar ma yenayin. Goyenter daha mat mere ten ten dufay dunen dunen albe den mon. Goyarebe Holi Spirit beleh dufay dunke mere tinayin geb, goke kanduknen ma nurde hinayin.

²¹ “Be, goyenterbe ire itinya igin ma hen kura beleh al hay heke wan gasa yirke kamde hinayin. Irde nanih beleh wor dirnen wen gwahade

^j **10:16** Yesu beleh kunere nin yirin gobe bulun mat ma yirin. Kunerebe kenkela dufay hen ga mata ten hanjen goke nurde yirin.

po yirnayiŋ. Irde diriŋ beleŋ huwarde naniŋya miliŋyat mere ma nurde asogo yirde gasa yirke kamnayiŋ. ²²Al tumŋaŋ ne niŋ igiŋ ma nurde haŋ mar beleŋ asogo dirde hinayiŋ. Goyenbe gwaha dirde hike goke kafura ma heŋ saŋiŋ po heŋ hinayiŋ. Kuŋ kuŋ funaŋdebe Al Kuruŋ beleŋ dawaryeŋ. ²³Niŋgeb ne niŋ teŋ buluŋ buluŋ dirkeb busaharde hoyanŋde kuŋ hinayiŋ. Fudinde wor po dineŋ hime. Deŋbe Israel naŋa bana niŋ taun kuruŋ gayen meteŋ teŋ kuŋ pasi ma irkeya ne Al Urmiŋ gayen mulgaŋ heweŋ.

²⁴⁻²⁵“Be, diriŋbe saba almiŋ gote dufay epte ma fole iryeŋ. Dufaymiŋbe kuŋ saba almiŋ gote dufayya tuŋande heŋbe gor po bada hiyyeŋ. Be, meteŋ al wor doyaŋ almiŋde meteŋ goyen fole ma iryeŋ. Meteŋmiŋbe kuŋ doyaŋ almiŋ beleŋ meteŋ teŋ hi gwahade po teŋbe gor po bada hiyyeŋ. Gwahade goyen po, deŋbe nere yufukner haŋ. Niŋgeb al beleŋ ne buluŋ nirde ungunayen kuruŋmiŋ Belsebul nineŋ haŋ kenem deŋbe daha dirnayiŋ? Buluŋ wor po dirnayiŋ. Al mali deŋtiŋ ga moŋ yeŋ nurde duneŋbe mere buluŋ mat wor po dirde hinayiŋ.

²⁶“Goyenpoga gwaha dirnayiŋ mar goke ma kafura henayiŋ. Dufayya mataya kura epte ma po banare hinayiŋ. Banare hitiŋ kuruŋ gobe kame kawan po forok yeke al tumŋaŋ nurnayiŋ. ²⁷Niŋgeb kamebe deŋ momoŋ dirde himyen gayen kawan po tagalde hinayiŋ. Balmiŋde mere dirde himyen goyen wor kawan tagalde hinayiŋ. ²⁸Al mudunke kamnayiŋ mar goke kafura ma heŋ hinayiŋ. Yeŋbe ulitiŋ go po buluŋ irnayiŋ. Munan go kamere tontiŋbe epte ma daha wet kura irnayiŋ. Gwahade yarabe ulitiŋya tontiŋya kak alare yemeytek albe unŋkureŋ go po gab kafura irde hinayiŋ.

²⁹“Fiŋfuŋbe nu mukŋeŋ wor po gwahade kura yeŋ yentek moŋ gega, Al Kuruŋbe biŋ sir ma yirde hiyen. Niŋgeb nu goyen kura daha wet kura tiyyeŋ gob Al Kuruŋbe nurde hike ga tiyyeŋ. ³⁰Tonaŋtiŋ yuwalŋeŋ epte ma kapyan hetek goyen wor Al Kuruŋbe gwahade haŋ yeŋ keŋkela nurde hi. ³¹Niŋgeb deŋbe Al Kuruŋ diliŋdeb fiŋfuŋ buda damum gote folek wor po yeŋ deneŋ hi geb, heŋ heŋtiŋ ge kafura ma heŋ hinayiŋ,” yinyiŋ.

Yesu niŋ tagalde hinayiŋ

(Luk 12:8-9,51-53; 14:26-27; Mak 9:41)

³²Be, Yesu go sopte gaha yinyiŋ: “Al kura al hoyan diliŋ mar dufaymiŋ ne niŋ saŋiŋ irde hiyeŋ goyen tagalyeŋbe ne wor Nanne saŋiŋ miŋyaŋ gote diliŋ mar, ‘Al gabe nere,’ ineŋ. ³³Munan al kura ne niŋ yeŋ al hoyan diliŋ mar, ‘Nebe ma nurde unhem,’ yinyeŋ al gobe ne wor kame Nanne saŋiŋ miŋyaŋ gote diliŋ mar, ‘Al gobe ma nurde unhem,’ ineŋ.

³⁴Be, ga nurnaŋ ko. Nebe fuleŋa mata isikamde kamde niŋ ma megen gar katmiriŋ. Ne wamiriŋ gake teŋbe fuleŋare hinayiŋ. ³⁵Nebe megen haŋ mar beleŋ mata gaha teŋ hinayiŋ yeŋ wamiriŋ. Mata gobe gahade: ‘Urmiŋ beleŋ naniŋ asogo iryeŋ.

Wirin belen miliñ asogo iryen.

Bere belen huwarde unde miliñ asogo iryen.

³⁶ Gwahade goyen po al asogo wor po yirtek marbe yingen min bana
gore po asogo yirnayin.’ *Maika 7:6*

³⁷ “Irde al kura miliñya naniñya nin uguñ po nurde ne ma gama niryen
al gobe epte ma komatne hiyyen. Irde al kura urmiñya wiriñya nin uguñ
po nurde ne ma gama niryen al goyen wor epte ma komatne hiyyen.

³⁸ Irde ne nin tej kanduk yeneñ kamde kamde nin bada henayin marbe
epte ma komatne henayin. ³⁹ Irde al kura megen heñ heñmin ge uguñ po
dufay heñ hiyenbe Al Kurunya epte ma hiriryen. Goyenpoga ne nin tej al
kura heñ heñmin ge ma nurde gama nirde hiyen al gobe Al Kurunya heñ
heñ gobe yende hiyyen.

⁴⁰ “Be, deñ meten tej kuñ hikeya igin dirde gargar dirde hinayin gobe
ne gayen nirde hañ yen nuren. Gwaha niryen gobe ne po moñ. Nanne nad
nerke wamirin al goyen manañ igin igin iryen. ⁴¹ Irde al kura, ‘Al gabe
Al Kuruyen mere basañ al,’ yen keneñ igin irde gargar iryen al gobe
mere basañ alyen murungem tiyyen. Irde al kura, ‘Al gabe al huwak,’
yen keneñ igin irde gargar iryen al gobe Al Kurun belen al huwakyen
murungem unyen. ⁴² Irde al denem moñ gar hañ gayen kura komatne yen
keneñ bebak tej fe kura unke melak bida iryenbe gote murungembe soñ
ma hiyyen,” yinyin.

Yesu belen Yon Baptais nin yirin

(Luk 7:18-35)

11 ¹ Be, komatmin 12 goyen saba yirde yirdeb yubul tike kwamin.
Irkeb Yesube gor mat Galili nana bana goñ nin taun hoyanyañ
wor Al Kuruyen saba yirde meremin tagale yen kurin.

² Gwaha tej kuñ hikeb Yon Baptais koyare hinhide gor po heñbe
Yesu Kristuyen mere momoñ goyen nuriñ. Irdeb komatmin kura hulyan
yiriyin. ³ Irkeb kuñbe, “Ge gayenbe Yon belen al kura kame wayyen yeke
nurde hityen al goyenbe ge gago ma al hoyan nin doyan heñ hitek?”

inen gusunañ iramin. ⁴ Irkeb, “Mulgañ heñ kuñbe dindiken mere nurde
hanja mata tej hime neneñ hanja kurun goyen Yon momoñ irnayin.

⁵ Al diliñ titminbe nankenen hañ. Kahan titminbe tareñ heñ harde kuñ
hañ. Al busuka minyanbe ulin igin heñ hañ. Irde kirmin titminbe mere
nurde hañ. Al kamtiñ manañ sopte huwarde kuñ hañ. Irde Al Kurun
belen megen nin alya bereya faran yurd yurd mere igin gobe al buninen
wor nurde hañ gayen kuñ momoñ irnayin. ⁶ Irdeb, ‘Al kura ne nin tej Al
Kurun nin dufaymin tareñ irtin goyen go ma katyenbe Al Kurun belen
guram irde sanin iryen,’ yihi innayin,” yinyin.

⁷ Gwaha yinkeb Yonyen komatmin go mulgañ heñ kwamin. Kukeb Yesu
belen Yon nin momoñ yire yenbe gaha yinyin: “Denbe sawsawa po kurun

naja bana gonbe da kinnin yey kwan? Dulin yamuƙ kura meƙe belen tama yurtin goyen yinnin yey kwan? ⁸Goyen moƙ kenem da wor po kinnin yey kwan? Al kura umƙa iƙin titin kura kinnin yey kwan? Moƙ. Al horam yaƙ umƙa iƙin teƙ iƙin iƙin niƙ po nurde haƙ marbe meƙen niƙ doyaƙ mar karkuwaƙyen yayaƙ po haƙ. ⁹Goyenbe da kuƙ kinnin yey kwan? Al Kurunyen mere basaƙ al? Gwaha, fudinde. Gega yeybe Al Kurunyen mere basaƙ mar hoyaƙ goyen yara moƙ. Yeybe gote folek. ¹⁰Al goyen goke teƙbe Al Kurunyen asaƙde gahade katin hi:

‘Mere basaƙ alne teƙ kermeke yey wa meheƙ heƙ kuyey.

Meheƙ heƙ kuƙbe beleƙe sope irde guney,’ yitin hi. *Malakai 3:1*

¹¹Be, yitin gwahade po metey tiyuƙ al gobe al hoyaƙ moƙ. Yon Baptais beleƙ tiyuƙ. Ningeb fudinde wor po, bere beleƙ kawaƙ yirtin haƙ kuruƙ gayen Yonyen metey goyen fole irtek epte moƙ hinhan. Yey beleƙ metey tiyuƙ gobe metey hoyaƙ kuruƙ gote folek wor po tiyuƙ. Goyenbe yeybe ne gayen neƙkela ma heƙ hi. Ningeb al kura deƙem moƙ gega neƙkela heƙ bebak teƙbe Al Kuruƙ beleƙ yende alya bereya doyaƙ yirde hi bana goƙ hiyeƙ al gobe Al Kuruƙ dilinƙdeb Yon folek yey kinyey.

¹²⁻¹³“Be, Moseyen sabaya Al Kurunyen mere basaƙ marte sabaya asaƙde katin gobe Al Kuruƙ beleƙ yende alya bereya doyaƙ yird yird goyen tagalke waƙ waƙ Yon Baptais wor tagaluƙ. Ningeb Yon hitte mat waƙ waƙ gayen nalu hitere gabe Al Kuruƙ beleƙ alya bereyamin doyaƙ yird yird mata kawan forok yey hike yeneƙbe al budam bana goƙ kuniƙ yey nurde kurut wor po yey haƙ. Goyenbe tareƙminde teƙ hikeb Al Kuruƙ beleƙ alya bereyamin doyaƙ yird yird goyen buluƙ irde haƙ. ¹⁴Yonbe bikkeƙ Elaia beleƙ metey teƙ hinhin gwahade metey tiyuƙ. Ningeb al kura kame Elaia wayyey yey Moseyen sabaya Al Kurunyen mere basaƙ mar beleƙ tagaltin goyen fudinde yey nurde haƙ keneƙbe Yon Baptais gobe al gogo yey nurnayin. ¹⁵Al kirmin minyaƙbe mere gayen keƙkela nurnaƙ ko.

¹⁶“Be, gayenter niƙ marbe al matam dahade haƙ yewey? Be, go mar gobe dirin kura gabu gasunde heƙ kari teƙ heƙya yingey ulin kadom mohonde teƙ hanƙen go gwahade. Dirin gobe kari teƙ heƙya kadom gineƙ teƙbe, ¹⁷‘Neƙ beleƙ buleluƙ fuk irde tikiƙ heƙ dunhet gega, gege ma tahaƙ. Irde esinayin daw yey al hakwa ambo irde irdere niƙ tikiƙ heƙ dunhet gega ma esahaƙ,’ yineƙ kwep kwep yirde hanƙen go gwahade. ¹⁸Ningeb dirin teƙ hanƙen gwahade goyen po, mel gobe mere fudinde nurtek ma yirde hi. Ningeb Yon Baptais beleƙ beretya wainya ma neke keneƙbe, ‘Al gobe unguram yaƙ,’ ineƙ hinhan. ¹⁹Munaƙ ne Al Urmin gabe biƙgeya wainya nemeke neneƙbe, ‘Al gabe dulare niƙ al wor po. Irde yeybe teks yad yad marya Moseyen saba keƙkela ma gama irde hike “mata buluƙ mar” yineƙ hityen mar gote kadom,’ nineƙ hanƙen. Goyenpoga al kura dufay wukkeƙ minyaƙbe matamin beleƙ gab kawan forok irde hiyeƙ geb,” yinyin.

Biŋ mulgaŋ ma heŋ haŋ mar
(Luk 10:13-15)

²⁰Be, Yesu go gwaha yineŋbe Al Kurunyen tarende mata tiŋen kurayen kurayen budam teŋ hike ga bebak ma teŋbe mata buluŋmin yubul ma teŋ Al Kurun hitte biŋ mulgaŋ ma hamiŋ mar goyen goke igiŋ ma nurde gaha yiriŋ: ²¹“Be, deŋ Yuda mar Korasin taundeya Betsaida taundeya haŋ marbe ne beleŋ mata tiŋen kurayen kurayen teŋ himeke neneŋ bebak titek yara gega, gwaha ma teŋ asogo nirde haŋ. Niŋgeb deŋ Yuda marte mata gwahade goke Al Kurun beleŋ biŋ ar yeke gote murunŋem buluŋ wor po dunyeŋ geb, goke buniŋen nurd duneŋ hime. Ne beleŋ Yuda mar moŋ al miŋ hoyan haŋyen taunde Tairya Saidonya gor kuŋ mata tiŋen forok yirmiriŋ manhan mel gob araŋ po bebak teŋ mata buluŋmin ge kandukŋen wor po nurde amil erekke hor yirde tupi sam teŋ mata buluŋmin go yubul teŋ Al Kurun niŋ biŋ mulgaŋ hewoŋ. ²²Fudinde wor po diŋen hime. Tairya Saidonya taunde niŋ marte mata buluŋ gote murunŋembe kurun yarham. Goyenbe deŋ Yuda mar merene gama ma irde haŋyen gote murunŋembe yende folek, buluŋ wor po tenayiŋ geb. ²³Irde deŋ Kapeneam taunde niŋ mar, deŋbe dindikeŋ ge yeŋ, ‘Neŋbe deŋniniŋ yaŋ,’ yeŋ turuŋ turuŋ teŋ Al Kurun niŋ bitiŋ ma mulgaŋ heŋ haŋ? Al Kurun beleŋ kak ala bana demeyke kurkunayiŋ geb. Mata tiŋen kurayen kurayen deŋ hitte forok yeŋ hike yeneŋ haŋ gayen Sodom taunde forok yeŋ hinhan manhan gor niŋ mar beleŋ mata goyen yeneŋbe mata buluŋmin yubul teŋ Al Kurun niŋ biŋ mulgaŋ hewoŋ. Irkeb buluŋ ma irkeb gaha naŋa gayenbe taun gobe hiwoŋ. ²⁴Fudinde diŋen hime, kame Al Kurun beleŋ al igiŋya buluŋya pota yiryen natureb Sodom niŋ marbe mata buluŋ teŋ hinhan gote murunŋem buluŋ tenayiŋ. Goyenbe deŋ Kapeneam taunde niŋ marbe Sodom niŋ mar beleŋ kanduk tenayiŋ gote folek wor po tenayiŋ geb,” yinyiŋ.

Kanduk miŋyaŋ marbe Yesu hitte wanayiŋ
(Luk 10:21-22)

²⁵Be, goya goyenbe Al Kurun mere irde, “Adone, gebe naŋkiŋya megeŋya gote Doyaŋ Al Kurun. Gebe al yingŋen dufaymiŋ wukkeŋ yeŋ nurde haŋ marya megeŋ niŋ alyen saba karkuwan yawartiŋ marya hittebe meten teŋ hime kurun gate miŋ goyen bana kerde hayen. Goyenbe diriŋ beleŋ naniŋ miliŋ hitte tawuŋ hitiŋ yara al kura yingŋende saŋiŋde epte moŋ yeŋ nurde Al Kurun beleŋ gab faraŋ duri yeŋ haŋ mar hitte yikala yiraŋ goke amaŋen wor po nurde turuŋ girde hime. ²⁶Fudinde, buniŋengebe kurun geb, mata gwahade forok iraŋ,” yiriŋ. ²⁷Irdeb, “Adone beleŋbe det kurun gayen doyaŋ yird yird meten gobe ne nunyiŋ. Nebe yende Urmiŋ wor po geb, yeŋ po gab keŋkela nurde

nunen hi. Al hoyanbe gwahade ma nurd nunen hanj. Irde Nannebe neya al kura ne belej basija yirde hime marya po ga nurd unen hite. Al hoyanbe gwahade monj. ²⁸Ningeb den kanduk kurayen kurayen yenen goke bitin misin nurde hanj marbe ne hitte wananj. Irkeb faranj durmeke bitin yurum heke hinayin. ²⁹Nebe delne kamtin, irde dufayne manaj kipirtin. Ningeb wanj sabane nurde gama nirnayin. Irkeb faranj durmeke bitin yurum hekeb hinayin. ³⁰Sabane nurde gama irnayin dinen hime gobe metenjen monj. Ne belej kanduk dunen hime gobe hipirkejen geb, ne hitte wananj,” yinyinj.

Yesube Sabat nalu gote minj al

(Mak 2:23-28; Luk 6:1-5)

12 ¹Be, Yesu go Sabat nalu goyenter komatminj yagoya wit meten kahalyan kun hinhan. Kun henjabe komatminj yago goyen binge yirkeb wit bilminj kura yade iginen nene hinhan. ²Irkeb Farisi mar belej yenenbe, “Mel ga yena! Mel gabe Sabat nalure mata gwaha ma ten hinayin yen bisam irtin goyen ten hanj!” inaminj. ³Irkeb Yesu belej wol henbe, “Denbe Al Kurunyen asande Dewitya kadam yagoya binge kamde mata tiyaminj gote baranminj goyen ma wor po kapyan hen nurde hanjen? ⁴Dewitbe Al Kurunyen ya balem bana hurkunbe beret Al Kurun untin himam, Al Kurun doloj ird ird mata doyanj marte kudinenj goyen kadomya yad naminj. Dewitbe Mose belej gwaha ma ten hinayin yitin goyen wor gogo tiyyin gega, goke kanduk kura ma kinyin. ⁵Irde Al Kurun doloj ird ird mata doyanj marbe Sabat nalure Al Kurunyen ya balem bana hen meten ten henbe Moseyen saba bulun irde hinhan. Goyenbe gote kanduk kura ma kenen hinhan goyen Al Kurunyen asande katinbe ma kapyan hen hanjen? ⁶Fundinde dinhem. Mel gobe Sabat nalure Al Kurunyen ya balem bana meten ten hikeb mata bulun tahanj ma yinen hanjen. Munaj nebe ya gote folek geb, komatne yago neya tumnanj hen Sabat nalure mata tahanj gabe mata bulun monj geb. ⁷⁻⁸Ne Al Urminj gabe Sabat nalu gote Doyan Al Kurun. Ningeb Al Kurunyen mere asande, ‘Nebe al belej galak nird nird nin ma nurde hime. Kadam buninenj gird gird goke gab amanen nurde hime,’ yitin goyen den belej mere gote minj nurde han manhan ulinde merem monj mar gayen bulun bulun ma yirde hiwonj,” yinyinj.

Sabat nalure al hanij simsimam kura sope iryin

(Mak 3:1-6; Luk 6:6-11)

⁹Be, gwaha yinenbe gor mat kun Yuda marte gabu yare kurin. ¹⁰Bana gonbe al kura hanij simsima hitin goyen gor hinhin. Irke Farisi mar gore da misinde kura ulinde merem yan irnin yenbe Yesu gusujanj iraminj. “Sabat nalurebe al kura garbam minjanj goyen sope irtek gobe Moseyen

sabarebe igin yitiŋ ma dahade?” inamiŋ. ¹¹ Gwaha inkeb, “Deŋ gayen sipsiptiŋ kura Sabat nalure mete titmiŋ bana kurkuyenbe igin keneŋ wasak tinayiŋ? Moŋ, kuŋbe teŋ isaŋ heŋ siŋare kernayiŋ geb. ¹² Al Kurun diliŋdeb sipsipbe det diriŋeŋ, munaŋ albe det kurun wor po. Niŋgeb Sabat nalurebe mata igin igin po ga teŋ hitek,” yinyiŋ. ¹³ Irde al go, “Hange giŋ ira,” inyiŋ. Irke haniŋ giŋ irkeb haniŋ kurhan igin hiyen go gwahade igin wor po hiriŋ. ¹⁴ Goyenbe Farisi mar gobe siŋare kuŋ yingen uliŋ daha mat Yesu mayteke kami yeŋ mere sege iramiŋ.

Yesube Al Kurun belen basaŋa irtiŋ

¹⁵ Be, Farisi mar belen mata tiniŋ teŋ hinhan goyen bebak teŋbe gasun go tubul teŋ hoyande kuriŋ. Kukeb al budam po gama irde kwamiŋ. Irkeb garbam miŋyaŋbe tumŋaŋ sope yirke igin hamiŋ. ¹⁶ Gwaha yirde al buda go guram dirhem gake al hoyan ma momoŋ yirnayiŋ yeŋ hayhay yiryiŋ. ¹⁷ Mata kurun tiyyiŋ gobe Al Kurun belen mere basaŋ almiŋ Aisaia mere irke asande kayyiŋ gote igineŋ kawan forok yiriŋ. Merebe gahade:

¹⁸ “Al gabe nere metenŋ al, basaŋa irmiriŋ goyen.

Yeŋbe bubulkunne wor po yeŋ nurde unenŋ hime.

Irde yeŋ ge amaneŋ wor po nurde hime.

Holi Spirit teŋ kermeke ketal uryeŋ.

Irkeb ne belen al iginya bulunya pota yirde gote murungem yunen yunen goyen megen al hike kwa kurun gayen momoŋ yirde tukuyeŋ.

¹⁹ Yeŋbe al kuraya kadam mohonde teŋ kwep kwep ma tiyyeŋ.

Irde belenyaŋ mere kuware ma teŋ hike nurnayiŋ.

²⁰ Al kura bisike kokaŋ go gwahade, bulun hiniŋ teŋ hinayiŋ goyen bulun ma yiryenŋ.

Irde al kura bulun heŋ hulsu aymuk irtiŋ yara hinayiŋ goyen wor bulun ma yiryenŋ.

Matamiŋ gobe bada ma hiyyeŋ.

Gwahade po teŋ teŋbe alya bereyamiŋ tumŋaŋ yumulgaŋ teŋ pasi iryeŋ.

²¹ Irke al miŋ hoyan Yuda mar moŋ gore yeŋ ge hekkeŋ nurde faran yurd yurd niŋ doyaŋ irde hinayiŋ,” yitiŋ hi.

Aisaia 42:1-4

Yesuya Belsebulya

(Mak 3:20-30; Luk 11:14-23; 12:10)

²² Be, gwaha yeŋ hikeyabe al kura ungura ketal urtiŋ goyen teŋ wayamiŋ. Al gobe diliŋ titmiŋ irde mohon manaŋ kattinŋ. Be, al gobe Yesu belen sope irkeb nankenenŋ mere teŋ tiyyiŋ. ²³ Irkeb gabu iramiŋ mar belen mata go keneŋ hurkunŋkat wor po teŋbe, “Mesaia Dewit Urmin kame wayyen yeŋ hanŋyen gobe al gago wet?” yamiŋ. ²⁴ Goyenbe Farisi

mar belenj mere go nurdeb, “Monj, ungurayen kurunminj Belsebulyen tarende ungura gogo yakira tej hi,” yaminj. ²⁵Irkeb Yesu gobe al dufay hej hinhan goyen yenenj bebak tenbe gaha yinyinj: “Tiyun kurun kura bana al belenj yingenj ulinj kadam asogo gird tej bur yenayinj gobe saninj ma hej bulun henayinj. Irde al minj dirnenj kura wor gwahade po, yingenj ulinj kadam asogo gird tej bur yenayinjbe tumnanj saninj ma hej hinayinj. Taunde ninj al wor gwahade po, awalikde ma hinayinjbe epte ma saninj hej hinayinj. ²⁶Ningeb gwahade goyen po Satan belenj yey yufukde hanj ungura buda goyen haram yirde yakira tiyyenbe dahadem saninj henayinj? Hubu geb. ²⁷Goyenbe denj belenj Belsebulyen tarende ungura yakira tej hi ninenj hanj. Munanj denj gama dirde hanj mar wor ungura yakira tej hanjen goyenbe ganunyen saninde mata go tej hanj yey nurde hanj? Belsebulyen tarende ma Al Kurunyen tarende? Mel gobe ungura yakira tej tej saninjbe Al Kurun hitte mat wanj hi yey nurde hanj geb, denj belenj ne ninenj hanj gobe usi wor po irde hanj yey nurd dunnayinj. ²⁸Ningeb nebe Al Kurunyen saninde ungura yakira tej himyen geb, Al Kurun belenj doyanj dird dird gobe bikkenj denj hitte gago forok yihi.

²⁹“Be, daha matbe al kura gore kunj al hoyanj tarej minjanj gote yare hurkunj samunminja detminja yade kuyenj? Gwaha tiye yenbe al gore kunj saninj minjanj al go wa tej fere tej gab epte yaminde ninj detya samunminja goyen yawaryen.

³⁰“Be, al kura ne ninj ma hej hanj marbe asogone. Irde al kura Al Kurun hitte al yukunj yukunj ninj faranj ma nurde hanj marbe al bur yirde meten go bulun irde hanj yey nurenj. ³¹Ningeb al kura mata bulunja sukal mereyaminj ge tej Al Kurun pohogay irkeb iginj halde unyenj. Goyenpoga al kura Holi Spirit sukal iryenj gobe Al Kurun belenj epte ma wor po halde pasi ird unyenj. ³²Al kura ne Al Urminj gayen asogo nirde mere bulun tiyyenbe pohogay nirke iginj halde pasi irde unenj. Goyenbe al kura Holi Spirit belenj meten tej hi yey nurd nurd ga asogo irde mere bulun tiyyenj gobe epte ma wor po mata bulunminj goyen halde unyenj. Megen gar henja, ma kame Al Kurunyen nalure gor wor epte ma halde unyenj.

³³“Hebe iginenj belenj gab dikala dirke he iginj ma he bulun yey hanjen. Ningeb iginenj iginj forok yewonj yey nurdeb he go sope irde haranj henayinj. He goyen sope irde haranj ma henayinjbe iginenj bulun bulunenj forok yenayinj. ³⁴Denjbe kunere duwi yara bulun wor po geb. Meretinja matatinyabe bulun ala po. Ningeb denj gwahade belenj mere kura iginj ma po tinayinj. Hubu wor po. Bitinj bana dufay bulun belenj makinj hitinj gore mohontinde mat kat kunj hiyen. ³⁵Ningeb al iginbe binde dufay iginj hinayinj goyen yade kawan yirde hiyenj. Munanj al bulunbe binde dufay bulun hinayinj goyen kawan yirde hiyenj. ³⁶Goke tenbe fudinde wor po dinenj hime, Al Kurun belenj al iginja bulunja pota yiryenj nalure gorbe melaktinj sonj heke ne ninj mere bulun mat yitinj kurunj goke merere

huwarde danin gwaha yamin goyen Al Kurun momon irnayin. ³⁷Ningeb mohontinde mat mere kat kuyen gore gab nalu goyenter mere ten hanjen gote murungem igin dunyen ma bulun dunyen goyen nurnayin,” yinyin.

Al Kurunyen saninde det kura irke kinni inamin

(Mak 8:11-12; Luk 11:29-32)

³⁸Be, Farisi mar kuraya Moseyen saba marya bele, “Tisa, Al Kurunyen saninde mata tinen kura irke kinni yen nurde hite,” inamin. ³⁹Irkeb Yesu bele wol henbe, “Dufay bulun kerde mata manan bulun ten han mar goreb mata tinen Al Kurun bele po ga irtek goke po gusunan hen hanjen. Goyenbe bikken Al Kurunyen mere basan al Yona bele mata ten mere tiyyin goyen po ga nurnayin. Mata tinen hoyan kura ma kennayin. ⁴⁰Yonabe makan dapna kurun binde wawun karwo gon hinhin gwahade po, ne Al Urmin gayen wor megen binde nan kahalya wawunya karwo hen. ⁴¹Irde Niniwe taunde nin mar gobe Yona bele kun Al Kurunyen mere basan hen tagalkeb mata bulunmin yubul ten Al Kurun nin bin mulgan hamin. Goyenbe alya bereya gayenter gayenbe ne saba ten hime gabe Yonayen saba gote folek gega, go ma nurde han. Ningeb Al Kurun bele al iginya bulunya pota yiryen nalurebe Niniwe nin mar bele huwardeb merene ma nurde han mar gayen minge yirnayin. ⁴²Bikken Solomon bele Israel nana doyan irde hinhinyabe nana gisaw nin doyan bere kurun kura Siba bele Solomonyen dufaymin wukken goyen nure yen wayyin. Goyenbe alya bereya gayenter nin gayenbe ne Solomonyen dufay folek gare saba yirde hime gega ma nurde han. Ningeb kame Al Kurun bele al iginya bulunya pota yiryen nalureb doyan bere Siba bele huwardeb merene ma nurde han mar gayen merem yan yiryen.

⁴³“Be, ungura kura al ulinde takira tike kat kuyen gobe mali nana al ma hitek bana gon kun usan hen hen gasun nin nankenen kun hiyen. Goyenbe gasun kura ma kinyen. ⁴⁴Irdeb, ‘Bikken hinhem gasunde gor mulgan hewen,’ yiyyen. Irdeb mulgan hen wanbe gasun bikkek gobe Al Kurunyen mere binde ma kiryin geb, halde haran hen sope irtin yara kinyen. ⁴⁵Irdeb kunbe sopte ungura 7 yende sanin folek goyen yupi ten tumnan wanbe al goyen ketal urnayin. Gwaha tikeb al gobe han kapa hinhin gwahade mon, bulun wor po hiyyen,” yinyin.

Yesuyen kulin ya hayminya

(Mak 3:31-35; Luk 8:19-21)

⁴⁶Be, Yesu go hako po al buda kurun goyen mere yirde hikeb milin ya kulin ya bele mere irnin yen wan sinare hen doyan irde hinhan. ⁴⁷Irkeb al kura bele go yenenbe kun Yesu goyen, “Momkeya kolge wenya ginni yen wan sinare ga han,” inyin. ⁴⁸Irkeb wol henbe, “Ganunbe mamne? Ganunbe kolne yago?” inyin. ⁴⁹⁻⁵⁰Irdeb komatmin yago yenen hen yabe,

“Al kura Nanne Al Kurun sanin minyan gote mere nurde go po gama irde han marbe kolne, hayneya mamne yagoya. Ningeb mamneya kolne wenyabe gago han,” inyin.

Yasun ten ten gote maya mere

(Mak 4:1-9; Luk 8:4-8)

13 ¹Be, go nana fay goyenter po Yesube hiyen ya go tubul ten kun fe ala kurun sinare kura gor kipiriyin. ²Irkeb sopte al buda karim ma wan gabu iramin. Irkeb bada hej hakwa kura hinhin hende gor hurkun kipiriyin. Keperde hikeb al buda kurun gob fe sinare huwarde hinhan. ³Hakware gor henyabe saba budam maya mere mat al buda go saba yiriyin. Maya meremin kurabe gahade: “Yasun al kura det muyken tur ire yen kurin. ⁴Metende kun tur irde tukurin. Irkeb kurabe belenyan katamin. Irke nu belen wan yenenbe namin. ⁵Kurabe hora heren megen halgayinyan katamin. Megej tolok mon geb, aran po kawan hamin. ⁶Goyenbe nana forok yen temeykeb filginin sanin mon geb, gwilgwai irde kamamin. ⁷Det muyken kurabe yamun hirwanen yan hinhan bana gon katen kawan hamin. Goyenbe yamun duwi gore hurkun awrum yurke nonbo hamin. ⁸Munan det muyken kurabe megen igin wor poyan katen kawan hamin. Irde muyken unkuende matbe 100 iginen gwahade hamin. Muyken kurabe 60, munan kurabe 30 gwahade ala iginen hej tukamin. ⁹Al kirmin minyanbe mere gayen kenkela nurnan ko,” yirin.

Danin maya merere saba yird hinhin?

(Mak 4:10-12; Luk 8:9-10)

¹⁰Irkeb komatmin yago goyen kunbe, “Danin geb maya mere mat alya bereya saba yirde ha?” inen gusunan iramin. ¹¹Irkeb, “Al Kurun belen alya bereyamin doyan yird yird gote minbe banare hi geb, al hoyan belen epte ma bebak titek. Goyen denbe Al Kurunyen tarende min goyen igin bebak tinayin. ¹²Ningeb kenkela wor po merene palna irde nurde hinayin. Al kura binde mat fudinde wor po Al Kurunyen mere nurde hikeb Al Kurun belen meremin igin goyen unen teban irde hiyen. Munan al kura gwahade mon gobe Al Kurunyen mere binde mun kura hiyen goyen wor ten sin iryen. ¹³Al gwahade gobe det yennayin gega, epte ma det gote min nurnayin. Irde merebe nurnayin gega, epte ma mere gote min bebak tinayin. Ningeb gwahade po ten hinayin yenbe gago maya mere mat saba yirde himyen.

¹⁴Al gwaha ten han gokeb Al Kurunyen mere basan al Aisaia belen Al Kurunyen mere nurde asande kayyin gobe gago forok yen hi. Merebe gahade:

‘Denbe merene nurde hinayin, irde kenen hinayin gega, bebak ma po ten hinayin.

15 Fudinde wor po, mel gate binbe sanjij wor po.

Kirmijbe migisun yurtin, irde dilinbe mala titin.

Mon manhan kirmijnde nurde, dilinde yenenbe binde matbe bebak wor po tej ne hitte mulgan hej wake sope yirmewon,' yitin hi.

Aisaia 6:9-10

16-17 Ningeb fudinde wor po dinen hime. Bikken Al Kurunyen mere basan marya al huwak bikken hinhan gobe daha wor den beley mata kurun yenen han gayen yentewon yen nurde hinhan. Goyenbe go ma yenenya kamamin. Mere den nurde han gayen wor nurtewon yen nurde hinhan. Goyenbe ma nuramin. Munan denbe nalu iginde forok yan geb, diltin det igin yenen, kirmintinde mere igin igin nurde han gago. Ningeb goke amanen nurde hinayin.

18 "Gwahade geb yasun alyen maya mere gote min momon diren tihim geb, kenkela nurde bebak tinan ko. 19 Muyken beleyan katamin gote minbe da? Gobe al kura Al Kurun beley yende aly bereya doyan yird yird saba gote min nurde bebak ma tiyyen. Irke ungura beley wan saba go tej sin irde bin sam irke mere goke ma nuryen go gwahade. 20 Megen halgayinya hora arat heren det muyken katamin gote minbe gahade: al kura Al Kurunyen saba tinenya nurdeb aran po igin igin yen gama iryen. 21 Goyenbe mere go kenkela ma binde kurkun kipiryen geb, ulyande ma Al Kurunyen mere goyen gama iryen. Al Kurunyen saba nurde gama irde hiyen gega, al beley bulun bulun irke gote kanduk kenenbe bada hej aran po Al Kurunyen saba go tubul tiyyen. 22 Yamun duwi forok yitin bana det muyken katamin gote minbe gahade: al kura Al Kurunyen saba nurde gama irde hiyen. Irde megen nin mata tej tenya megen nin samun yad yad dufay beley tulun tikeb Al Kurunyen saba goyen iginen minmon hiyyen. 23 Goyenpoga megen iginyan wor po katamin gote minbe gahade: al kura Al Kurunyen saba nurde bebak tej gama irde hiyen gob gote iginenbe budam wor po forok yenayin. Muyken kurabe iginen 100 forok yiryen. Kurabe 60, munan kurabe 30 forok yiryen go gwahade. Muyken buda gob iginen kurayen kurayen forok yenayin," yinyin.

Yamun bulunyen maya mere

24 Be, Yesu go gwaha yinen saba yire yenbe maya mere hoyan gahade yinyin: "Al Kurun beley yende aly bereya doyan yird yird gobe gahade: al kura wit muyken goyen metenminde yukun tur yiryin. 25 Goyenbe wawunbe al tumnan firtinde hikeb al gote asogom beley kun yamun duwi muyken goyen wit muyken tur irtinyan goyen tur yirde yukunbe kurin. 26 Kame wit go kawan hej kun iginen hini tej hikeb yamun duwi goyen manan forok yen tukamin. 27 Irkeb meten gote min alyen meten mar beley wanbe, 'Doyan al, gebe wit muyken haran gega, yamun duwi gob daha mat forok yan?' inamin. 28 Irkeb, 'Asogone kura beley mata ga

tiyuṅ geb,' yinyiṅ. Irkeb meten marmin beḷen, 'Ningeb kuṅ wasiniṅ?' inen gusuṅaṅ iramiṅ. ²⁹Irkeb, 'Goṅmin. Mongo wasehet yen wit manan tumṅaṅ wasinak ge. ³⁰Yubul tike tumṅaṅde karkuwaṅ henayiṅ. Sak nalure gab wasitek. Goyare gab meten marne yamuṅ duwi wa walde kunga ten ten niṅ yad fere ten yernayiṅ. Munan witbe yade yukuṅ yadi yerd yerd ya kurunde gor yernayiṅ,' yinyiṅ," gwahade Yesu beḷen mel go momoṅ yiryiṅ.

Mastet bilminya yisyat maya mere
(*Mak 4:30-32; Luk 13:18-21*)

³¹Be, Yesu go maya mere hoyan wor yinyiṅ. "Al Kurun beḷen alya bereyamin doyan yird yird gobe mastet he bilmin dirṅen muṅ wor po go gwahade. Al kura beḷen mastet bilmin goyen tenbe metenminde haryiṅ. ³²Det hoyan muykenbe karkuwaṅ, munan mastet he muykenbe dirṅen muṅ wor po gega, kawaṅ hen kurun henbe metenḡe gor det haryiṅ goyen fole yiryen. Irkeb nu beḷen waṅ haniṅ hereṅ hagam yirde gor hinayiṅ," yinyiṅ. ³³Irdeb sopte po siraw mere hoyan yinyiṅ. "Al Kurun beḷen yende alya bereya doyan yird yird gobe Bere kura yis ten palawa kurunya tigiri ten tubul tikeb palawa go ditdi nene kurun hiyyen go gwahade goyen," yinyiṅ.

Maya mere mat po saba yirde hinhin
(*Mak 4:33-34*)

³⁴Yesu beḷen al buda mere gwahade yirde hinhin gobe maya mere mat po yirde hinhin. Mere kenkelak mat ma yirde hinhin. Maya mere mat po yirde hinhin. ³⁵Ningeb Yesu beḷen maya mere mat saba tagalde hinhin gobe Al Kurun beḷen mere basan almin mere irke asanḡe kayyiṅ gote iginenbe gogo forok yiriṅ. Merebe gahade:

"Sabanebe maya mere mat po tiyen.

Irde det banare hitiṅ al kura bebak titek moṅ goyen tagalen," yitiṅ
hi.

Tikiṅ 78:2

Yamuṅ bulunyen siraw mere gote min

³⁶Be, Yesu gobe al buda kurun go yubul ten ya hiyende gor mulgan hiriṅ. Irkeb komatmin yago kuṅbe, "Yamuṅ duwi niṅ maya mere mat tagalha gote min goyen momoṅ dira," inamiṅ. ³⁷Irkeb gaha yinyiṅ: "Wit muyken igiṅ kuṅ haryiṅ al gobe ne Al Urmin gayen. ³⁸Meten gobe megen kurun gayen gake yihim. Munan wit muyken gobe Al Kurunyen dirṅen wen. Yamuṅ duwi gobe Al Bulunyen dirṅen wen. ³⁹Irde yamuṅ duwi muyken tur iryiṅ al gobe ungura. Sak nalu gobe nalu funan, irde binḡe gabu ird ird mar gobe Al Kurunyen miyoṅ. ⁴⁰Yamuṅ bulun wasen kak alare yemeyke humga kunayiṅ go gwahade goyen po, nalu funanḡebe

al hitte mata gwahade forok yiyyen. ⁴¹Ne Al Urmin gare miyonne yad yemeke kuŋ nere alya bereya haŋ bana goŋ mata buluŋ teŋ haŋyen marya mata buluŋ tinaŋ yineŋ al biŋ yade haŋyen marya go yukuŋ gabu yirnayin. ⁴²Irde mel go yade kak ala buluŋ wor po bana goŋ yemeynayin. Irkeb goŋ po heŋ esen misin yisen hinayin. ⁴³Goyabe Al Kurun dilingde alya bereya huwak haŋyen gobe Al Kurun beleŋ doyaŋ yirde hiyen de gor naŋa temeyke wuk yitin yara wukkek igin wor po hinayin. Al kirmin minyanbe mere gayen kenkela nurnan ko,” yinyin.

Samunyen maya mere

⁴⁴Be, maya mere hoyan wor yinyin. “Al Kurun beleŋ yende alya bereya doyaŋ yirde hi gobe gahade: samun kura damum hende hoyan wor po megen binde bana kirtin hinhin. Kurareb al kura samun gwahade gan hi yen ma nurdeya megen goyen talde taldeb kinyin. Keneŋbe sopte aw uryin. Irdeb aman wor po heŋ kuŋ detmin kurun goyen al yunke damu tikeb gote murungem tukunbe megen goyen damu tiyyin go gwahade. ⁴⁵Al Kurun beleŋ alya bereyamin doyaŋ yirde hi gote maya mere kurabe gahade: al kura beleŋ selwen yara kura damum hende wor po goyen goke nankenen kuŋ hinhin. ⁴⁶Kuŋ kuŋ igin mun wor po kura keneŋbe mulgan heŋ yende samun kurun goyen al yunke damu tikeb murungem teŋ tukun det kusamun wor po go damu tiyyin go gwahade,” yinyin.

Kaman kurunyen maya mere

⁴⁷Be, Yesu beleŋ sopte po gaha yinyin: “Al Kurun beleŋ yende alya bereya doyaŋ yirde hi gobe gahade: makan dapna yawarnin yen kaman kurun temeyamin. Irdeb dapna min kurayen kurayen yawaramin. ⁴⁸Dapna makin hihi yen nurdeb tuluŋ teŋ tukun sinare irde dapna iginbe tiriyan yeramin. Munan bulunbe yemeyamin go gwahade. ⁴⁹Nalu funande wor pore gorbe al hitte mata gwahade go forok yiyyen. Al Kurunyen miyon beleŋ wan al huwakya al mata buluŋ teŋ hitin marya goyen pota yirnayin. ⁵⁰Irde mata buluŋ mar gobe yade kak ala kurun bana goŋ yemeyke esen misin yisen hinayin,” yinyin. ⁵¹Irdeb, “Maya mere kurun dirhem gote min kenkela nurhan we?” yinke, “Gwaha,” inamin. ⁵²Irkeb, “Bebak tihit yahan geb, denbe Moseyen saba al kura saba bikkek po mon sabane gergen manan nurde tumnan yanarde han al go gwahade denen hime. Ningeb denbe al kura yamin bana mat samun bikkekya gergenya yade sinare katyen go gwahade goyen po saba bikkekya gergenya tumnan nurde han,” yinyin.

Nasaret taunde kurin (Mak 6:1-6; Luk 4:16-30)

⁵³Be, maya mere buda goyen momon yirdeb gasun go tubul teŋ kurin. ⁵⁴Kunbe taun gor heŋ kurun hiriŋde gor forok yenbe gor nin Yuda marte

gabu yare kuŋ al saba yirke hurkuŋkat teŋbe, “Ey, al gabe damde kuŋ Al Kurunyen dufay wukkenya mata tiŋeŋ kurayen kurayen ird ird tareŋya gayen yawaruŋ!” yamiŋ. ⁵⁵Irdeb, “Al gabe kapenta urmiŋ moŋ? Yeŋbe Maria urmiŋ. Kuliŋ yagobe Yems, Yosep, Saimonyabe Yudasya moŋ? ⁵⁶Haymiŋ yagob gar ma tumŋaŋ hityen? Gega al gabe damde kuŋ dufayya tareŋya yawaruŋ?” yamiŋ. ⁵⁷Irdeb buluŋ nurd unamiŋ. Goyenbe Yesu beŋe, “Al Kurunyen mere basan marbe taunmiŋde niŋ marya tayŋeŋya beŋe palap ma yirde meremiŋ ma nurde hanŋen,” yinyiŋ. ⁵⁸Irdeb yeŋ ge hekkeŋ ma nurde hinhan geb, gorbe mata tiŋeŋ budam ma forok yiryiŋ.

Herot beŋe Yon Baptais mayke kamiŋ

(Mak 6:14-29; Luk 9:7-9)

14 ¹Be, Yesu beŋe mata kurun teŋ kuŋ hinhin goyen Galili naŋa gote doyaŋ al kurun Herot beŋe mere momoŋmiŋ nuryiŋ. ²Irdeb meteŋ marmiŋ go, “Yon Baptais maymeke kamuŋ al go goyen sopte huwaruŋ geb, mata tiŋeŋ ird ird saŋiŋ miŋyaŋ meteŋ teŋ kuŋ hi gogo,” yinyiŋ.

³⁻⁴Be, Yon mayke kamiŋ gote baraŋmiŋbe gahade: Yon diliŋ gergeŋ hinhinyabe Herot beŋe kuliŋ Filip berem Herodias goran iryiŋ. Irkeb Yon beŋe kawan po, “Mata gob buluŋ wor po tiyaŋ geb,” inkeb Herot beŋe goke igiŋ ma nuryiŋ. Irdeb fuleŋa marmiŋ yinke Yon fere teŋ tukuŋ koyare keramiŋ. ⁵Irde maymeke kamwoŋ yeŋ nurde hinhin gega, al beŋe Yon gob Al Kurunyen mere basan al yeŋ nurd uneŋ hinhan geb, Yon mayde mayde niŋ kafura heŋ hinhin. ⁶Be, Herot gobe miliŋ beŋe kawan kiryiŋ nalu go forok yekeb Herotya kadam weŋya gabu irde dulaŋ teŋ hinhan. Irde tikiŋ hekeb Herodias wiriŋ beŋe gor gabu iramiŋ mar goke gege tiyyiŋ. Irkeb Herot gobe aman wor po hiriŋ. ⁷Irdeb, “Det kuraŋ nurde gusaŋaŋ nirkeb igiŋ gunen,” ineŋ diliŋ mar biŋa tiyyiŋ. ⁸Irkeb miliŋ beŋe gwaha inayiŋ inyiŋ gwahade po Herot inyiŋ. “Haŋka ga po Yon Baptais tonan koronde kerde tawaŋ nuna,” inyiŋ. ⁹Irkeb doyaŋ al go kandukŋeŋ nuryiŋ gega, bere go hitte biŋa tiyyiŋ goya al buda gor hinhan mar gore daha wet kura ninnak yeŋ nurdeb biŋa tiyyiŋ go po gama irde bere gore yiriŋ goyen po irde unyiŋ. ¹⁰Irde fuleŋa marmiŋ hulyaŋ yirke koyare kuŋbe Yon biŋiŋ walamiŋ. ¹¹Irdeb Yon tonan gobe koronde kerde tawaŋ bere go unkeb yeŋ beŋe tukuŋbe miliŋ unyiŋ. ¹²Be, Yon komatmiŋ beŋe mere go nurdeb waŋ hakwam goyen tukuŋ mete tiyamiŋ. Gwaha teŋ kuŋbe Yon kamiŋ goyen Yesu momoŋ iramiŋ.

Yesu beŋe al 5,000 biŋge paka yiryiŋ

(Mak 6:30-44; Luk 9:10-17; Yon 6:1-14)

¹³Be, Yon kamiŋ mere momoŋ goyen nurdeb Yesube komatmiŋya hakwa teŋ naŋa almemeŋ moŋde duŋkureŋ balmiŋ hiniŋ yeŋ kwamiŋ.

Irkeb nanja bana go niŋ taunyaŋ niŋ marbe Yesube goŋ kwa yeŋ nurdeb makaŋ fereŋ gama irde kwamiŋ. ¹⁴Be, Yesu go kuŋ kuŋ fe siŋa kurhan forok yeŋbe al buda kuruŋ goyen yeneŋbe bunineŋ yinyiŋ. Irde garbam miŋyaŋ marbe guram yirke igiŋ hamiŋ.

¹⁵Be, wawuŋ heweŋ teŋ hikeb komatmiŋ yago beleŋ Yesu goyen, “Nanja bana gab tiyuŋ binde miŋmoŋ. Irde heŋ ga moŋ kidoma heweŋ tiya geb, al buda kuruŋ ga yinke tiyuŋyaŋ kuŋ yinŋeŋ biŋge kura damu teŋ nenanŋ,” inamiŋ. ¹⁶Irkeb Yesu beleŋ, “Moŋ, daniŋ kunayiŋ? Deŋ beleŋ det kura yunke nenanŋ,” yinyiŋ. ¹⁷Irkeb, “Gwaha dinha goyenbe neŋbe beret siptesoŋoŋya makaŋ dapŋa yadi iraw po haŋ,” inamiŋ. ¹⁸Irkeb, “Yawaŋ nunnanŋ,” yinyiŋ. ¹⁹Irdeb al buda kuruŋ go, “Yamuŋyaŋ kepernanŋ,” yinke keperde tukamiŋ. Irkeb beret siptesoŋoŋya makaŋ dapŋa yadi irawaya goyen yade kotaŋ kaŋ naŋkinde naŋkenen Al Kurunyaŋ saŋinde guram yirde yubala teŋ al yunnaŋ yineŋbe komatmiŋ yago yunyinŋ. ²⁰Al buda kuruŋ gob biŋge go nen nen ep po namiŋ. Irkeb komatmiŋ beleŋ biŋge dikneŋ buda iramiŋ gobe tiri 12 gwahade maŋiŋ yirtek hamiŋ. ²¹Be, biŋge namiŋ mar al parguwak po kapyan hamiŋbe 5,000 hiriŋ.

Yesu fe yuwalneŋ hende huwarde kuriŋ

(Mak 6:45-52; Yon 6:15-21)

²²Be, gwaha teŋbe komatmiŋ yago, “Araŋeŋ hakwa hende hurkuŋ fe ala siŋa kurhan kunaŋ,” yinke hakwa hende hurkuŋbe yeŋ wa meheŋ heŋ fe ala siŋa kurhan kwamiŋ. Irkeb Yesube gor heŋ al buda kuruŋ goyen, “Tiyuŋtiŋyaŋ tiyuŋtiŋyaŋ kunaŋ,” yinyiŋ. ²³Al buda go gwaha yineŋbe Al Kurunya mere tiyye yeŋbe dugu dabayiŋde kura gor hurkuriŋ. Kuŋ yeŋ uŋkureŋ goŋ hikeb kidoma hiriŋ. ²⁴Munaŋ komatmiŋ yagobe megeŋ tubul teŋ fe ala kuruŋde hamiŋ. Goyenbe meŋe huwarke fe goyen makaŋ duba yara karkuwaŋ karkuwaŋ huwaramiŋ. Irkeb hakwa gobe muŋ kura ma sor iryiŋ. ²⁵Be, nanja miŋge heŋ hikeb Yesu go fe yuwalneŋ hende huwarde komatmiŋ yago hitte kuriŋ. ²⁶Mel gore fe hende huwarde waŋ hike keneŋ kafura wor po heŋbe, “Gabe uŋgura!” yeŋ uliŋ barbar yeke daha tiniŋ tiniŋ tiyamiŋ. ²⁷Goyenbe araŋ po Yesu beleŋ, “Kafura ma yo. Ne waŋ hime geb. Tareŋ henayiŋ,” yinyiŋ. ²⁸Irkeb Pita beleŋ, “Doyaŋ Al Kuruŋ, gabe fudinde ge keneŋbe ninke fe hende huwarde ge hitte kweŋ,” inyiŋ. ²⁹Irkeb, “Igiŋge waya,” inyiŋ. Gwaha inkeb Pita go hakwa hende mat solok yeŋ fe hende harde Yesu hitte kuriŋ. ³⁰Goyenbe kuŋ heŋyabe meŋe keneŋ kafura heŋbe hako ga dolok yeŋ keneŋbe, “Doyaŋ Al Kuruŋ, faraŋ nura!” yeŋ kekew tiyyiŋ. ³¹Irkeb goyare po Yesu beleŋ haniŋ temeyde tanardeb isaŋ hiriŋ. Irdeb, “Daniŋ dufay budam heŋ ne niŋ hekkeŋ ma nurde ha?” inyiŋ. ³²Gwaha teŋbe hakwa hende hurkaryum. Irkeb meŋe kamiŋ. ³³Irke gab hakwa biŋde hinhan mar gore keneŋ bebak teŋbe doloŋ irde, “Fudinde wor po gebe Al Kuruŋ Urmiŋ,” inamiŋ.

Genesaret niŋ garbam mar sope yiriyiŋ
(Mak 6:53-56)

³⁴Be, gwaha teŋ kuŋ kuŋbe Genesaret naŋa beleŋ goŋ forok yamiŋ. ³⁵Irkeb al gor niŋ beleŋ Yesu keneŋ bebak teŋbe mere kerke naŋa goyen bana niŋ mar yinke garbam mar tumŋaŋ Yesu hitte yawayamiŋ. ³⁶Irdeb, “Garbam mar gayen yubul tike meŋe diba ulger niŋ gote muruŋ po sisan urdeb igiŋ henaŋ,” ineŋ eseŋ mere iramiŋ. Niŋgeb al garbam miŋyaŋbe Yesu go sisan urde tumŋaŋde igiŋ hamiŋ.

Yesu beleŋ asem yagot mata walde yunyiŋ
(Mak 7:1-13)

15 ¹Be, naŋa goyen bana meten teŋ kuŋ hikeyabe Yerusalem taun kurunđe mat Farisi mar kuraya Moseyen saba mar kuraya goyen Yesu hitte waŋbe, ²“Daniŋ geb komatge yagobe asininiŋ yagot mata ma gama irde haŋ? Yeŋbe dula tiniŋbe mali po biŋge nene haŋ. Haniŋ ma haldeya gwaha teŋ haŋ,” inamiŋ. ³Irkeb wol heŋbe, “Munaŋ deŋbe daniŋ geb asetiniŋ yagot mata niŋ po teŋbe Al Kurunyen merebe pel irde buluŋ irde haŋyen? ⁴Al Kurun beleŋbe, ‘Nantiŋya mamtiŋyabe palap yirde hinayiŋ,’ yitiŋ hi niŋgeb, ‘Al kura naniŋya miliŋya mere buluŋ yiryen gobe mayke kamyen,’ yitiŋ hi. ⁵Goyenbe deŋbe saba goyen tigiri teŋbe, ‘Al kura naniŋya miliŋya det kura faraŋ yurtek goyen ma yuneŋbe, ‘Igiŋ faraŋ durmewoŋ gega, Al Kurun unen yeŋ basiŋa irmiŋ geb, go ma faraŋ dureŋ,’ yinyen gobe mata buluŋ moŋ,’ yeŋ al saba yirde haŋyen. ⁶Niŋgeb al gwaha mat saba yirke Al Kurunyen mere ma gama irde naniŋya miliŋya palap ma yirde duliŋ haŋyen. Deŋbe gwahade goyen po asetiniŋ yagot mata niŋ teŋbe Al Kurunyen mere buluŋ irde haŋyen. ⁷Usi mar wor wor, Al Kurunyen mere basaŋ al Aisaia beleŋ asaŋde kayyiŋ gobe fudinde wor po deŋ gake kayyiŋ. ⁸Merebe gahade:

‘Mel gabe mohoŋde po turuŋ nirde haŋ.

Gega biŋdebe ne niŋ ma nurde haŋ.

Hoyaŋde wor po haŋ.

⁹Mel gabe megen niŋ marte saba po gama irde al saba yirde haŋ.

Mel gabe biŋ hende hende po doloŋ nirde haŋ,’ yitiŋ hi geb,”

yinyiŋ.

Aisaia 29:13

¹⁰Be, Yesu gob mel Farisi marya Moseyen saba marya goyen gwaha yinenbe al buda kurun gor hinhan go yinke yeŋ binde wayamiŋ. Irkeb, “Mere ga nurde bebak tinaŋ ko. ¹¹Det kura al mohoŋde mat biŋde kurkuyeŋ gore Al Kurun diliŋde al go buluŋ ma iryen. Goyenbe det kura mohoŋde mat kat kuyeŋ gore po gab Al Kurun diliŋde al go buluŋ iryen,” yinyiŋ. ¹²Gwaha yinkeb komatmiŋ yago beleŋ waŋbe, “Farisi marbe mere taha goke igiŋ ma nurde haŋ goyen yeneŋ bebak taha?” inamiŋ.

¹³Irkeb wol heŋbe, “He kura Nanne Al Kurun tareŋmin kurun gore ma haryin gobe filginin manan tumnan wasiyen. ¹⁴Ningeb diling titmin buda gobe yenen wasak tinan. Mel gobe saba fudinde goyen ma bebak tenbe al mata bulun yekun han. Al kura diling titmin beken kadom yingen yara goyen beken ikala irde tukun hime yiyyen gobe tumnande kun mete titminde katiryen,” yinyin. ¹⁵Irkeb Pita beken, “Maya mere gote min momon dira,” inyin. ¹⁶Irkeb, “Den manan dufaytin mun kura ma wuk yen han? ¹⁷Det kura al mohan de mat binde kurkuyen gobe kamebe kat kuyen gobe ma nurde han? ¹⁸Goyenbe det mere kura al mohan de mat forok yen han yen gobe binde mat wan han yen geb, gore gab Al Kurun dilingde al go bulun yirde han yen. ¹⁹Dufay bulun, al gasa yirke kamde kamde mata, al kura berem yan gore bere hoyanya duwan ten ten mata, alya bereya fonen de lelep mata, kawo mata, merere huwarde usi mat mere ten ten matayabe mere bulun mat ten ten mata kurun gobe al binde mat pul yen han yen. ²⁰Det gwahade gore gab Al Kurun dilingde al bulun yirde han yen. Hanin hal hal mata kenkela ma gama irde dula tinayin gore al bulun ma yiryen,” yinen saba yiryin.

Kenan marte bere gote dufay sanin
(Mak 7:24-30)

²¹Be, Yesu go nana hinhin goyen tubul ten Saidon taunya Tair taunyat nana bana gon komatmin yagoya kwamin. ²²Irkeb taun iraw goyen bindere tiyun kura hinhinde gor mat Kenan mar bere kura gore Yesu hitte wanbe, “Doyan Al Kurun, Dewit Urmin, buninen nirde faran nura. Wernebe ungura beken wan heren irtin hi geb, bulun bulun wor po irde han,” inen esen uryin. ²³Goyenbe Yesube meremin goyen mun kura haywan ma hirin. Irkeb komatmin yago beken, “Esen durde gama dirtinde po hi geb, takira tike kwi,” inamin. ²⁴Irkeb wol heŋbe, “Nebe Israel mar Al Kurunen sipsip meremin ma nurde duwi hitin goke po wamin geb,” yirin. ²⁵Irkeb bere gore wan palap irde dokolhon yugulun tenbe, “Doyan Al Kurun, faran nura,” inyin. ²⁶Irkeb wol heŋbe, “Dirinde bingen epte ma goran yirde yad kulumin yago yunke nenayin,” inyin. ²⁷Gwaha inkeb bere gore wol heŋbe, “Doyan Al Kurun, mere gobe fudinde ninha gega, dirinde bingen diknen katnayin gob kulu wor nene han yen. Ningeb faran nurayin,” inyin. ²⁸Irkeb Yesu beken, “Bere, ne nin heken wor po nurha geb, gusanan nirha gote iginen forok yiyyen geb,” inyin. Be, wirin gobe goyare go po igin hirin.

Al garbam kurayen kurayen sope yiryin

²⁹Be, Yesu go nana goyen tubul ten mulgan hen Galili fe ala kurun feren kun kenbe dugu dabayinde kura gor hurkurin. ³⁰Irkeb al budam wor po yen hitte wayamin. Wan henyabe al kahan nonbo hitin, diling

titminj, ulinj albo yirtinj, mohonj kattinjyabe garbam hoyanj minjyand marya goyen sope yirke iginj henanj yenj nurde yawanj kahanj minjde yeraminj. Irkeb sope yiryinj. ³¹Al gabu iraminj mar belenj mohonj kattinj mere tike yenaminj. Ulinj albok hitinj goyen iginj henj, kahanj bulunj hitinj goyen huwarde kunj wanj tenj, dilinj titminj nanjkenenj tike yenenjbe hurkunjkat tenjbe Israel marte Al Kurunj go turunj irde kasor iraminj.

Al 4,000 bingge yunke naminj
(Mak 8:1-10)

³²Be, Yesu belenj komatminj go yinke wakeb, “Al buda kurunj gabe tumjanjde hiteke kunj kunj yerejkek hihi. Goyenbe det go kura netek minjmonj hahanj. Bingge ma nene tiyuntminj kunayinjbe belenjanj kamnayinj geb, buninjenj yenenj hime,” yinyinj. ³³Irkeb komatminj belenj wol henjbe, “Tiyunj binde minjmonj nanja gahade gab bingge damde ninj yade al buda kurunj gahade gayen yunteke nenayinj?” inaminj. ³⁴Irkeb, “Beretbe dahade hanj?” yinkeb, “Beretbe 7ya makanj dapnja muknenj yadi kura goya po hanj,” inaminj.

³⁵Be, al buda gabu iraminj go megen keprnanj yinke keperde tukaminj. ³⁶Irkeb beretya dapnjaya go yadeb Al Kurunj iginj nurde unenjbe beretya dapnjaya go yubala tenjbe komatminj yago al yukunj yunnanj yenj yunyinj. Irkeb gwaha po tiyaminj. ³⁷Al buda kurunj gobe bingge go nene ep wor po naminj. Irkeb Yesuyen komat belenj bingge diknenj al belenj ep nene yubul tiyaminj goyen yade tiri 7 gwahade makinj yirtek iraminj. ³⁸Bereya dirinja ma kapyanj henj al parguwak po kapyanj haminjbe 4,000 hiriinj. ³⁹Bingge yunke neke gabe, “Tiyuntinjanj tiyuntinjanj kunayinj,” yinyinj. Irdeb komatminjanj hakwa hende hurkunjbe nanja kura Magadan taun binde belenj gonj kwaminj.

Mata tinjenj kura ira inenj gusunjanj iraminj
(Mak 8:11-13; Luk 12:54-56)

16 ¹Be, Yesu go gonj hikeb Farisi marya Sadusi marya belenj Yesu hitte wanjbe tunanj urninj yenj, “Mata tinjenj Al Kurunj belenj irtek goyen kura irke kinninj,” inaminj. ²Irkeb Yesu belenj, “Denjbe wawunjbana henj nanja buk yekeb, ‘Kadila hewenj tiya,’ yenj hanjenj. ³Irde wampotbe, ‘Nanja bulunj hihi geb, kigariinj katenj tiya,’ yenj hanjenj. Denjbe nanjinj kenenj gab kadila hewenj tiya ma kigariinj katenj tiya goyen kenjela nurde hanjenj. Goyenbe gayenter ninj mar goke tenjbe Al Kurunj belenj mata forok yirde hi goyen daniinj geb yenenj bebak ma tenj hanj? ⁴Denj gayenter ninj marbe mata bulunj tenj Al Kurunj harhoktinj unenj hanj geb, mata tinjenj

kurayen kurayen goke po nan'kenen' hanj. Goyenbe kura kinnin yekeb Yona hitte mata forok yirin^k go gwahade goyen po kame dikala diren," yinen'be mel goyen yubul ten hoyande kurin.

Farisi marya Sadusi maryat saba bulun
(Mak 8:14-21)

⁵Be, fe ala kurun go warde sija kurhan kwamin'ya goyenbe komatmin go bin sir yekeb beret kura ma yade ga kwamin'. ⁶Be, Yesu belen Farisi marya Sadusi marya goke komatmin goyen, "Kenkela hen hina ko. Mongo mel gote yis belen bulun diryen geb," yinyin. ⁷Gwaha yinkeb komatmin belen, "Beret kura ma yad wayhet geb, gogo dina," yen yingen ulin kadam mere gird tiyamin'. ⁸Komatmin go mere kusa irde hike yenen'be, "Danin dindiken ulin beretninin minmon yen han? Denbe ne nin ma hekker nurde han? ⁹Mun kura ma po bebak ten han? Beret siptesonon al 5,000 namin gote diknen'be tiri dahade makin yirtek hamin? ¹⁰Goyen mon kenem beret 7 goyen al 4,000 nan gote diknen yade tiri dahade makin yirtek han? ¹¹Farisi marya Sadusi maryat sababe yis belen palawa bana hilyan kutin yara al hoyan kurun gote dufay bulun yirde hi goke dinen hime. Beret nin ma yen hime gayen danin geb bebak ma ten han? Ningeb sopte dinen hime, Farisi marya Sadusi maryat yis belen bulun diryen'kek geb, kenkela hen hinayin," yinyin. ¹²Be, gwaha yinke gab, "Yis beret bana irde han'yen goke ma dinen hi. Farisi marya Sadusi maryat sababe yis yara goke hayhay dirde hi," yen nuramin'.

Yesu, gebe Mesaia
(Mak 8:27-30; Luk 9:18-21)

¹³Be, Yesu go komatmin'ya nana bana go tubul ten kun Sisaria Filipai taun binde binde hen henbe gusunan yiriyin. "Ne Al Urmin gayen gake al hoyan belen ganun yen han?" yinyin. ¹⁴Irkeb wol henbe, "Al kura belen gebe Yon Baptais yen han. Munan kura marbe Elaia ginen han. Kurabe Yeremaia ma Al Kurun'yen mere basan mar hoyan kura goyen ginen han," inamin'. ¹⁵Irkeb, "Munan den gayenbe nebe ganun yen nurd nunen han?" yinyin. ¹⁶Irkeb Saimon Pita belen, "Gebe Mesaia, Al Kurun gwahader hitin al gote Urmin," inyin. ¹⁷Gwaha inkeb, "Mere gobe Nanne Al Kurun sanin minyan al gore ginke gab gago yaha. Al kura belen ma mere goyen momon gira. Ningeb Al Kurun belen guram girde sanin giryen. ¹⁸Gebe ne nin dufayge hora yara tare' irha geb, Pita ginen hime. Ningeb hora go hendebe nere alya bereya yeren. ¹⁹Irde Al Kurun'yen alya bereya doyan yird yird sanin goyen ge gunen. Ningeb ge belen igin yawayin'be

^k **16:4** Yonabe wawun karwo makan dapna kurun milin gote bin bana henbe sopte sinare katyin. Gobe Yesu kamyinde mat yeren'kek heke sopte huwaryin gote tunan'en.

Al Kurun wor igin yiyyen. Irde ge belen bulun yawayinbe Al Kurun wor bulun yiyyen,” inyin. ²⁰Gwaha inenbe tumnande komatmin goyen, “Al hoyan kura hitte ne nin yen, ‘Yenbe Mesaia,’ ma yinnayin,” yinen utan yiriyin.

Kamde kamdemin ge kawan tagalyin

(Mak 8:31–9:1; Luk 9:22–27)

²¹Be, goyenter mat komatmin yago goyen kawan po, “Nebe Yerusalem kwen. Kumekeb Yuda marte doyan mar parguwakya Al Kurun dolon ird ird mata doyan marte karkuwan yabe Moseyen saba marya belen bulun bulun nirde mununke kamen. Goyenpoga kamen goyen yerenkek hekeb huwarej,” yinyin. ²²Irkeb Pita belen mere go nurdeb yen mun po tapat irdeb inen tenbe, “Doyan Al Kurun, gwaha ma tiyayin. Mata gobe ge hitte ma po forok yiyyen geb,” inyin. ²³Irkeb fulgan kan Pita kenenbe, “Satan, hoyan kwa! Gebe belejne pet ten ha geb. Dufay gobe Al Kurunyen mon, alyen dufay po geb,” inyin.

^{24–25}Gwaha tenbe komatmin yago goyen gaha yinyin: “Al kura gama nirde kanduk yenen yingen ge kafura hen harhok nunyen al gobe kame tonenbe kanduk kinyen. Munan al kura ne gama nirde kamde kamde nin ma kafura hen kanduk kurun ten ulin misin katen hiyen al gobe tonenbe igin hiyen. Ningeb al kura ne gama nire yenbe megen nin dufayya mataya harhok yunyen. Irdeb kanduk yenen hiyen gega, yingen ge ma nurde gama po nirde hiyen. ²⁶Al kura megen nin samun budam yade denem yan hiyyen gega, al gobe Al Kurun dilindeb kamtin yara hiyyen gobe daha tiyyen? Gobe igin mon, bulun wor po. Ningeb megen nin samun kura ten gore Al Kurunyen bearar bana hiyen al gob epte ma damu ten tumulgan titek. ²⁷Ne Al Urmin gab kamebe Nanne Al Kurunyen sanin turun yan goyen manan katen. Goya goyenbe miyonminya kattek. Irdeb aly bereyat matamin dahade dahade goyen gote murungembe gwahade po yunen. ²⁸Goyenpoga den gar han gayen kurabe ma kamdeya ne Al Urmin gare Al Kurunyen tarende aly bereyamin doyan yirde hen goyen kennayin. Mere gabe fudinde wor po dinen hime,” yinyin.

Yesu ulin hoyan hiri

(Mak 9:2–13; Luk 9:28–36)

17 ¹Be, nana fay 6 kamereb Yesu belen Pita, Yemsyabe kulin Yonya po yade dugu kurunde kura gor hurkamin. ²Gor henbe Yesu go mel gote dilin mar po ulin hoyan hiri. Dinsokdebe nana timiytin yara hiri. Ulin umna kerde hinhin go wor faykek wor po hiri. ³Gwaha tikeyab dilin mar po Moseya Elaiaya forok yen Yesuya mere ten hinhan. ⁴Irkeb Pita belen Yesu goyen, “Doyan Al Kurun, gar gabe nen hitek gasun igin mun wor po. Ningeb ge belen ok yekeb den al karwo hitek hen hen

gasuŋ kura yireŋ. Kurabe ge niŋ, kurabe Mose niŋ, munanŋ kurabe Elaia niŋ,” inyiŋ.

⁵Mere gwaha teŋ hikeyabe kigariŋkiŋ faykek wor po kura gore waŋ aw yuriŋ. Irkeb al melak kura gagap bana goreb, “Al gabe Urne. Yeŋbe bubulkuŋne wor po, yeŋ ge bener mat amanenŋ wor po nurde hime. Niŋgeb yende mere po nurde gama irde hinayiŋ,” yiriŋ.

⁶Be, Yesuyen komatmiŋ beleŋ mere go nurdeb kafura wor po heŋ biŋ tadam mat megen katamiŋ. ⁷Gega Yesu beleŋ waŋ yanardeb, “Kafura heŋ ma, huwarnanŋ!” yinyiŋ. ⁸Gwaha yinke nanŋkenenŋbe Yesu unŋkurenŋ po hike kenamiŋ. Al hoyanŋbe hubu.

⁹Be, dugure gor mat kateŋ heŋyabe Yesu beleŋ mel go saba yirde, “Hanŋka det kenhanŋ gayen gake al hoyanŋ kura momonŋ ma yirnayiŋ. Ne Al Urmiŋ gayen kamenŋde mat sopte huwarmeke gab igiŋ tagalnayiŋ,” yinyiŋ. ¹⁰Irkeb mel gore, “Daniŋ geb Moseyen saba mar beleŋ Elaia wa wake gab Mesaiaabe kame wayyenŋ yeŋ hanŋyen?” yeŋ gusuŋanŋ iramiŋ. ¹¹Irkeb, “Elaia wa mehenŋ heŋ det sope irke gab Mesaia wayyenŋ yeŋ hanŋyen gobe fudinde. ¹²Niŋgeb Elaiabe bikkenŋ wayuŋ. Goyenpoga alya bereyabe kenenŋ bebak ma tiyanŋ. Irde yinŋenŋde dufay po gama irde buluŋ buluŋ irde mayke kamuŋ. Mel goreb yeŋ iranŋ gwahade goyen po ne Al Urmiŋ gayen wor gwahade po nirnayiŋ,” yinyiŋ. ¹³Irke gab, “Yon Baptais niŋ dineŋ hi,” yeŋ bebak tiyamiŋ.

Diriŋ unguram yaŋ sope iryiŋ

(Mak 9:14-29; Luk 9:37-43a)

¹⁴Be, mel go dugure mat kateŋ al gabu kurunŋ iramiŋde gor forok yekeb al kura gore Yesu hitte waŋ diliŋ mar dokolhonŋ yuguluŋ teŋbe, ¹⁵“Doyanŋ Al Kurunŋ, urne buninenŋ irde faranŋ ura. Bu tonenŋ minyanŋ geb, uliŋ misiŋ kurunŋ kateŋ hiyen. Kurareb kak alare kateŋ hiyen. Kurareb fe alare kateŋ hiyen. ¹⁶Komatge yago hitte tawayhem gega, sope ma irhanŋ,” inyiŋ. ¹⁷Irkeb, “Deŋ gayenter niŋ marbe dahade niŋgeb Al Kurunŋ niŋ dufaytiŋ muŋ kura saŋiŋ ma irde hanŋ? Tonanŋtiŋ saŋiŋ wor po, saba dirmanŋ dirmanenŋ. Gayak ga ma denŋa hityen gega, hako po hanŋ. Diriŋ go tawananŋ,” yinyiŋ. ¹⁸Irdeb diriŋ go teŋ wakeb ungura diriŋ bana hinhin go inenŋ teŋ takira tike kat kuriŋ. Irkeb goyare po igiŋ hiriŋ.

¹⁹Be, go kamereb yeŋ yunŋkurenŋ po heŋ gab komatmiŋ beleŋ, “Daniŋ geb nenŋbe ungura go ma takira tihit?” inamiŋ. ²⁰⁻²¹Irkeb, “Deŋ ungura takira ma tahaŋ gobe Al Kurunŋ niŋ hekkenŋ nurde hanŋ gobe kurunŋ monŋ. Niŋgeb fudinde wor po dinhem. Al Kurunŋ niŋ dufaytiŋ hek irde hanŋ goyen mastet he bilmiŋ dirnenŋ muŋ gwahadebe megen gar det kura irnayiŋbe metenenŋ ma diryenŋ. Niŋgeb dugu gayen ‘Gar mat siŋgir teŋ iror kwa!’ inkeb gwahade po tiyyenŋ,” yinyiŋ.¹

¹ 17:20-21 Asaŋ hoyanŋdebe gahade hi: ²¹ Goyenbe ungura gwahade goke dindikenŋ bingge kutŋa irde Al Kurunŋ gusuŋanŋ irde takira tike gabe kat kuyenŋ.

²²Be, Yesuya komatminya gabu heŋbe tumŋaŋ Galili naŋa bana kwamiŋ. Irdeb Yesu beleŋ, “Ne Al Urmiŋ gabe mununtek al haniŋde nernayiŋ. ²³Irke mununkeb kamen gega, yereŋkek hekeb Al Kuruŋ beleŋ sopte nisaŋ heke huwareŋ,” yiniŋ. Gwaha yinkeb komatmiŋbe kandukŋeŋ wor po nuramiŋ.

Al Kurunyen ya balem gote teks

²⁴Be, gwaha teŋ kuŋ kuŋbe Kapeneam taunde forok yamiŋ. Irkeb Al Kurunyen ya balem niŋ teŋ teks yad yad mar beleŋ Pita hitte waŋbe, “Tisage gayen Al Kurunyen ya balem niŋ teŋ teks kura yerde hiyen?” inamiŋ. ²⁵Irkeb, “Gwaha,” yiniŋ.

Be, gwaha yinenbe Yesu hinhin ya go biŋde hurkukeb goyare po Yesu beleŋ, “Saimon, megen niŋ doyaŋ mar karkuwaŋ yuntek teks kurayen kurayen gobe ganuŋ mar beleŋ gab yerde haŋyen? Urmiŋ yago beleŋ yerde haŋyen ma al hoyaŋ beleŋ yerde haŋyen? Gebe dahade nurde ha?” inen gusuŋaŋ iryiŋ. ²⁶Irkeb Pita beleŋ wol heŋbe, “Al hoyaŋ beleŋ yerde haŋyen,” inyiŋ. Irkeb, “Gwaha, doyaŋ mar karkuwaŋ gote dirŋeŋ weŋbe naniŋ yagoŋ teks ma yerde haŋyen geb. ²⁷Goyenpoga teks ma yertekeb dufaymiŋ buluŋ henak geb fete kuŋ funal temeyayiŋ. Irde dapŋa meheŋde wor po tawayiŋ gobe mohon takila teŋ teks yertek hora kura kenayiŋ. Hora go tukunbe neya geyat teks kerayiŋ,” inyiŋ.

Ganuŋbe deŋem kurun wor po hiyyeŋ?

(Mak 9:33-37; Luk 9:46-48)

18 ¹Be, goya goyenbe komatmiŋ hoyaŋ beleŋ Yesu hitte waŋbe, “Ganuŋbe Al Kurun beleŋ alya bereyamiŋ doyaŋ yirde hire gor niŋ deŋem yaŋ wor po hiyyeŋ?” yeŋ gusuŋaŋ iramiŋ. ²Irkeb diriŋ diriŋ kura inke komatmiŋ yago hinhande gor waŋ huwariŋ. ³Irkeb Yesu beleŋ, “Fudinde wor po dinen hime. Diriŋ gahade gayenbe yingen al deŋem yaŋ heŋ heŋ niŋ ma nurde haŋyen. Gwahade goyen po al kura yingen al deŋem yaŋ heŋ heŋ niŋ ma nurde haŋ marbe Al Kurun beleŋ yende alya bereya doyaŋ yirde hi bana gon igiŋ hurkunayiŋ. ⁴Ningeb al kura diriŋ gahade ga hinayiŋ marbe Al Kurun diliŋde deŋem yaŋ wor po yeŋ yinyeŋ. ⁵Irde al kura deŋem mon diriŋ gahade gayen ne niŋ teŋ gargar iryenbe ne gayen niryen.

⁶“Goyenbe al kura diriŋ saŋiŋ miŋmon gahade gayen ne niŋ dufaymiŋ tareŋ irtiŋ goyen al kura beleŋ mata buluŋ tike keneŋ gama irde buluŋ tiyyeŋbe mata buluŋ miŋ uryeŋ al gobe murungem buluŋ wor po tiyyeŋ. Ningeb al hoyaŋ gama ma irkeya mata buluŋ miŋ uryeŋ al gobe hora kurun kura teŋ biŋiŋde feŋ teŋ makaŋ alare temeyke kamyen. Gogab gote murungem buluŋ wor po goyen ma tiyyeŋ.

⁷“Mata buluŋ titek dufaybe al biŋyaŋ hugiŋeŋ forok yeŋ tunan yurke kateŋ haŋyen. Ningeb megen niŋ mar dufay buluŋ go teŋ haŋ gobe Al

Kurunyen bearar bana han geb goke buninen nurde hime. Dufay bulun gobe huginen al binyan forok yen hiyen gega, al kura dufay go gama irde mata tinayin mar gobe Al Kurunyen bearar bana hinayin geb goke buninen nurde yunen hime. ⁸Ningeb hange kura bele girke mata bulunde katayinbe hange go walde temeyayin. Monggo hange unjkuren gore girkeb ulge tumnan kak huginen hitinde gor kutek goke tenbe hange gore bulunde gukutek go po walde temeyayin. Irdeb igin hange kurhan titmin manan gasun iginde kwayin. Irde kahan ge wor gwaha girkeb go wor gwahade po irayin. Irdeb iginde kwayin. ⁹Irde delge kurhan bele girke mata bulunde katayinbe delge go marde temeyayin. Monggo delge unjkuren gore girkeb ulge tumnan kak alare kutek goke tenbe delge gore bulunde gukutek go po marde temeykeb igin delge kurhan titmin manan gasun iginde kwayin,” yinyin.

Sipsip duwi hitin gote maya mere
(Luk 15:3-7)

¹⁰⁻¹¹ Irde sopte po gaha yinyin: “Be, al kura denem mon dirin gahade gayenbe Al Kurunyen miyon bele doyan yirde han. Irde miyon gobe Al Kurun sanin minyan gote dilin mar huginen hanjen. Ningeb al gahade goyen denem mon yen ingogaha ma yirde hinayin.”

¹² Be, ga nurnan! Al kura sipsipmin 100 hinayin. Irke unjkuren kura kadom yubul ten hoyande kuyen. Irkeb gonmin yen tubul tiyyen? Mon! Sipsipmin 99 go yukun dondonde kura gor yubul tenbe kun nanकिन. ¹³ Fudinde wor po dinen hime. Unjkuren mun goke nankenen kun kenen tenbe aman wor po hiyyen. Munan 99 goke gwahade wor po ma nuryen. ¹⁴ Gwahade goyen po, Nantin Al Kurun sanin minyan al gobe al kura dirin gahade gayen unjkuren kura Al Kurun tubul ten kanduk bana kun kun gokeb igin ma nurde hi,” yinyin.

Kadge kura bulun girkeb daha tiyayin?

¹⁵ Irde sopte po, “Be, kadge kura bulun bulun girkeb kun yen po hikeya gabe mata bulunmin goke momon irayin. Irke mere go nuryenbe al gob sopte kadge Al Kurun urmin gigen yara hiyyen. ¹⁶ Goyenbe merege ma nurke kenem al hoyan unjkuren ma iraw gwahade yade ga kwayin. Gogab al irawa ma karwo gore merege goyen tumnan fudinde yenayin. ¹⁷ Al hoyan yukayin gote mere wor ma nurke kenenbe mata bulunmin goyen Al Kurunyen dirnen wen hoyan goyen momon yirayin. Yende mere wor ma po nurkeb al gobe Al Kurunyen dirin mon, mata bulun al yen kenen hinayin.

^m **18:10-11** Asan hoyandebe gahade hi: ¹¹ *Ne Al Urmin gabe alya bereya Al Kurunyen dirnen wen gega, mere ma nurde duwi hitnen tiyan goyen yumulgan tiye yen wamin.*

¹⁸Fudinde wor po dinenj hime. Al Kurunyen alya bereya doyanj yird yird sanij goyen denj dunenj. Ningeb denj belej iginj yenayinbe Al Kurun wor iginj yiyyen. Irde denj belej bulun yenayinbe Al Kurun wor bulun yiyyen.

¹⁹Sopte dinenj hime. Der al iraw kura megen gar henja det kuranj nurde dufaytirinj unjkurenj po irde Nanne Al Kurun tarenj minyanj al goyen gusunanj iriryenbe yenj belej epte irde dunyen. ²⁰Gwahade ningeb al irawa ma karwo gwahade kura, ‘Nenbe Yesuyen alya bereya,’ yenj wanj gabu irnayinbe ne mananj wanj yenja hitek,” yinyinj.

Metenj al buninenj minmonyen maya mere

²¹Be, gwaha yinkeb Pita belej wanbe, “Doyanj Al Kurun, kadne kura belej bulun nirkeb wawun dahadere mata bulunminj go halde unenj? Wawun 7 ma dahade?” yenj gusunanj iryinj. ²²Irkeb, “Wawun 7 po monj. Bulun girde hikeb huginenj halde po unenj hayinj,” inenbe ²³mata goke maya mere mat gaha yirinj: “Ningeb Al Kurun belej yende alya bereya doyanj yirde hi bana gonj ninj matabe gahade: doyanj al kura belej metenj marminj horaminj yawaraminj go wol henanj yinyinj. ²⁴Irkeb al kura doyanj alminj hitte hora kurunj wor po tirinj al goyen doyanj alminj hitte tawayaminj. ²⁵Gega al gobe hora kurunj go epte ma wol hetek hirinj geb, doyanj alminj gore, ‘Al gote beremya dirinminj wenja detminja goyen tumnanj yukun al hoyanj yunke damu tinanj. Irkeb hora gobe ne tewenj,’ yirinj. ²⁶Irkeb metenj al go dilinj mar gor po dokolhonj yugulunj tenbe, ‘Bemel nirde ma. Horage kurunj gobe wol henj gunenj geb,’ inenj esenj mere iryinj. ²⁷Irkeb buninenj kenenbe, ‘Hora go wol henj henj ge ma nurayinj,’ inenj tubul tike kurinj. ²⁸Goyenbe kunj metenj al kadom hora dirnenj munj kura unke ma wol hitinj al goyen kinyinj. Irde hapekde tenbe, ‘Aranen horane wol hawal’ inyinj. ²⁹Irkeb kadom go kiminj mar dokolhonj yugulunj tenbe, ‘Bemel nirde ma yo. Horage wol henj gunenj geb,’ inyinj. ³⁰Goyenbe al go buninenj ma irde kadom go tagal unenbe, ‘Horane wol heke gab tenj sinj irnayinj,’ yinke tukunj koyare keraminj.

³¹“Be, metenj mar kadom belej mata go kenenbe binj ar yaminj. Irdeb kunj doyanj alminj go mata kurunj al gore tiyyinj goyen momonj iraminj. ³²Irkeb doyanj al belej metenj alminj go hoy irke wakeb, ‘Geb metenj al bulun. Horane epte ma wol hetek geb, esenj mere nirkeb buninenj girde gonminj ginminj. ³³Ne belej buninenj girde kandukge kurunj go pasi irde gunminj gwahade goyen po, ge belej wor daninj geb kadge gwaha ma iran?’ inyinj. ³⁴Doyanj al go binj ar wor po yekeb, ‘Al go koyare kernal’ yinyinj. Irdeb, ‘Horane tumnanj wol heke gab tubul tike kuyenj,’ yinyinj. ³⁵Nanne Al Kurun sanij minyanj gore denj wor mata gwahade goyen po diryenj. Ningeb kadtinj yago bulun dirnayinj goyen bitinje mat wor po halde yunenj hinayinj. Mali hende hendem ma tinayinj,” yinyinj.

Al beleŋ bere yakira teŋ teŋ mata
(*Mak 10:1-12*)

19 ¹Be, Yesu go mere gwahade mat al saba yirdeb Galili naŋa tubul teŋ Yodan fe gama irde Yudia naŋare kuriŋ. ²Kuŋ hikeb al budam gama irde kuŋ hinhan. Irke al garbam miŋyaŋbe sope yirke igiŋ heŋ hinhan. ³Gwaha teŋ hikeyabe Farisi mar kura beleŋ tuŋaŋ urniŋ yeŋ waŋbe, “Al kura miŋ goke kuram moŋ berem takira tiyyeŋ gobe Moseyen sabarebe igiŋ yitiŋ we?” inamiŋ. ⁴Irkeb wol heŋbe, “Haŋkapy a wor po tikula kerdyabe Al Kuruŋ beleŋ al irde, bere irde iryiŋ goyen Al Kuruŋyen asaŋde katiŋ hi gobe ma kapy a heŋ haŋyen?” ⁵Al Kuruŋ beleŋ gwaha yiryiŋ geb, goke teŋbe albe naniŋya miliŋya yubul teŋ kuŋ beremya gabu hiriryen. Irke al beleŋ yeneŋmiŋ iraw goyen Al Kuruŋ diliŋdebe uŋkureŋ po yinyeŋ. ⁶Niŋgeb irem gobe hoy aŋ hoy aŋ ma hiriryen. Uŋkureŋ po hiriryen. Gwahade geb Al Kuruŋ beleŋ alya bereya yade gabu yiryen gobe al beleŋ epte ma bur yirnaŋiŋ,” yinyiŋ. ⁷Irkeb mel goreb, “Gwahade kenem daniŋ geb Mose beleŋ igiŋ bere takira teŋ teŋ asaŋ kaŋ uneŋbe takira tiyayiŋ yiriŋ hi?” yeŋ gusuŋaŋ iramiŋ. ⁸Irkeb wol heŋbe, “Deŋbe tonanŋiŋ saŋiŋ wor po, mere ma nurtek goke teŋbe Mose beleŋ gwaha diniŋ. Goyenbe haŋkapy a wor po miŋde matbe gwahade moŋ. ⁹Niŋgeb al kura berem al hoy aŋya ma duwan teŋ hikeya takira teŋ bere hoy aŋ tiyyeŋbe Al Kuruŋ diliŋde mata buluŋ tiya yeŋ kinyeŋ,” yinyiŋ.

¹⁰Irkeb komatmiŋ beleŋ, “Be, gwahade kenem bere ma teŋ duliŋ heŋ heŋ gobe igiŋ,” yamiŋ. ¹¹Gwaha yekeb, “Al berem moŋ duliŋ hitek yaŋaŋ gobe al tumŋaŋ gwahade hitek moŋ. Al yuŋkureŋ igiŋ gwahade po hinayiŋ yeŋ yirtiŋ mar gore po gab gwahade hinayiŋ. ¹²Al kurabe bere niŋ ma wor po nurde haŋyen. Goyen mar gobe kurab gwahade po kawaŋ hitiŋ. Mun aŋ kurabe al beleŋ po miŋ miŋyaŋ gwahade yirtiŋ. Mun aŋ kura marbe Al Kuruŋ beleŋ yende alya bereya doyaŋ yirde hi gote meten po teŋ hiniŋ yeŋ bere ma yade haŋyen. Niŋgeb al gwaha titek mar po gab igiŋ gwaha teŋ hinayiŋ,” yinyiŋ.

Diriŋ mukŋeŋya Yesuya
(*Mak 10:13-16; Luk 18:15-17*)

¹³Be, diriŋ mukŋeŋ go Yesu beleŋ haŋiŋ yerde Al Kuruŋ gusuŋaŋ irke guram yirde saŋiŋ yiri yeŋ naniŋya miliŋya beleŋ yawayamiŋ. Irkeb komatmiŋ yago beleŋ yineŋ teŋ utaŋ yiramiŋ. ¹⁴Goyenbe Yesu beleŋbe, “Utaŋ yirde ma. Diriŋ mukŋeŋ go yubul tike ne hitte yawaŋaŋ. Al kura Al Kuruŋyen al hewe yeŋbe diriŋ beleŋ naniŋya miliŋya hitte kuŋ kuŋ niŋ kama ma heŋ haŋyen go gwahade hiyyeŋ gab Al Kuruŋ beleŋ yende alya bereya doyaŋ yird yird gobe yende hiyyeŋ,” yinyiŋ. ¹⁵Gwaha yineŋbe diriŋ mukŋeŋ go guram yirde yubul teŋbe hoy aŋde kuriŋ.

Al samuŋmiŋ budam
(Mak 10:17-31; Luk 18:18-30)

¹⁶Be, goŋ hikeb al kura gore Yesu hitte waŋbe, “Tisa, da mata igiŋ ten gab Al Kurunya hugiŋen hireŋ?” inen gusuŋaŋ iryiŋ. ¹⁷Irkeb, “Damiŋ geb det igiŋ niŋ gusuŋaŋ nirde ha? Al Kurun unŋkuren po ga al igiŋ geb. Yenya hugiŋen heŋ heŋ niŋ nurde ha kenem Moseyen saba goyen gama irde hayiŋ,” inyiŋ. ¹⁸Irkeb al gore, “Saba damiŋ damiŋ niŋ yeŋ ha?” inyiŋ. Irkeb, “Al ma gasa yirke kamnayiŋ, al berem yaŋbe bere hoyan duwan ma irde hiyeŋ, kawe ma tiyayiŋ, merere huwarde usi mat ma mere tiyayiŋ. ¹⁹Irde momkeya nanakeya palap yirde meremiŋ nurde hayiŋ. Irde gigeŋ ge amanen nurde hayen gwahade goyen po kadge hoyan niŋ wor amanen nurde hayiŋ,” inyiŋ. ²⁰Irkeb al gore, “Go ninha gobe tumŋande nurde gama irde himyen. Da mata wor po soŋ heŋ himyen geb, goyen tiyayiŋ yeŋ nineŋ ha?” yeŋ gusuŋaŋ iryiŋ. ²¹Irkeb, “Al Kurun diliŋde al huwak wor po hewe yeŋbe kuŋ samuŋge kurun goyen al yunke damu tikeb hora go yade yukuŋ al det niŋ amu heŋ haŋ mar goyen yunayiŋ. Irkeb Al Kurun beleŋ nere hihi yeŋ genke gab waŋ gama nirayiŋ,” inyiŋ. ²²Irkeb al foŋen gobe samunya detmiŋya budam wor po geb, Yesuyen mere nurdeb biŋde kandukŋen wor po nurdeya kuriŋ.

²³Gwaha tikeb komatmiŋ yago goyen, “Fudinde wor po dineŋ hime. Al samuŋmiŋ budam wor pobe Al Kurun beleŋ yende alya bereya doyaŋ yirde hi bana goŋ hurkuŋ hurkuŋ gobe metenen wor po geb. ²⁴Dapŋa kurun kamelbe det haraŋ heŋ heŋ kutum yamen dirŋen muŋ wor po goyen bana epte ma hurkuyeŋ. Gwahade goyen po, al samuŋmiŋ budam wor Al Kurun beleŋ alya bereyamiŋ doyaŋ yirde hi bana goŋ epte ma hurkunayiŋ. Niŋgeb det irawa goyen tumŋande metenen. Goyenbe damiŋbe metenen wor po yeŋ nurde haŋ? Al samuŋmiŋ budam gobe metenen wor po geb,” yinyiŋ. ²⁵Irkeb komatmiŋ yago beleŋ mere go kukuwamŋen wor po nurdeb, “Niŋgeb ganuŋ mar po gab Al Kurun beleŋ yawaryen?” inamiŋ. ²⁶Irkeb mel go yenenbe, “Mata gobe alyen tarenbebe epte moŋ. Goyenpoga Al Kurunyen tarenbebe det kura metenen miŋmoŋ,” yinyiŋ.

²⁷Irkeb Pita beleŋ, “Be, nenbe detniniŋ tumŋaŋ yubul ten gama girtiŋ. Niŋgeb kamebe da yawartek?” inyiŋ. ²⁸Irkeb gaha yinyiŋ: “Fudinde wor po dineŋ hime. Nalu funaŋde Al Kurun beleŋ megenya naŋkiniŋya gergen yiryen nalure goyenter ne Al Urmiŋ gabe saŋiŋne turuŋ yaŋya maroro gasuŋner keperde alya bereyane doyaŋ yiren. Irde den 12 gama nirde haŋ mar gayen manaŋ maroro gasuŋtiŋyaŋ keperde nere alya bereya tumŋaŋ, al miŋ 12 Israel yinen hinayiŋ goyen doyaŋ yirnayiŋ. ²⁹Irde al kura nere alya bereya niŋ ten yamiŋ, haymiŋ, babam, itiŋ, kuliŋ, naniŋ, miliŋ, diriŋmiŋmiŋyabe metenmiŋya yubul tinayiŋbe gote muruŋgembe

budam wor po yawarnayin. Irde Al Kurunya huginen hen hen goyen manan yende hiyyen. ³⁰Goyenpoga al kura yingen ge yen, 'Nebe gwaha gwaha timin geb, gote murungem kurun al hoyande gote folek wor po tewen,' yiyyen al gobe dirnen mun tiyyen. Munan al kura nebe hako hime yen nurde hiyen al gobe murungem kurun wor po al hoyande gote folek tiyyen. Ningeb al mehen de hiyen al gobe kame hiyen. Munan kame hiyen al gobe mehen de hiyen," yinyin.

Wain meten marte siraw mere

20 ¹Be, meremin goke tenbe siraw mere matbe gaha yinyin: "Al Kurun belej alya bereya doyan yird yird mata kurabe gahade: al denem yan kura wain metenner al yawarmeke wan meten tina yenge wampot mun po kuri. ²Kunbe, 'Hanka nan kahal meten tinayinbe denari" un kuren un kuren dunen,' yinyin. Irkeb igin yen nurde metende kwamin. ³Be, kun 9 kilok nana gwahade hekeb wain meten min al go gabu irde han yen gasunde gor kun al hoyan dulin meten min mon hinhan goyen yinyin. ⁴Irdeb, 'Den wor kun metenner meten tina. Irkeb hora gwahade igin dunen yen nurde hime goyen dunen,' yinyin. ⁵Irkeb kwamin. Al go sopte po nana ban kahalya 3 kilok wawunbanaya wor kun meten mar yad yerke metenminde kun meten tiyamin. ⁶Be, 5 kilok wawunbana wor po kunbe al hoyan kura meten min mon dulin hike yinyin. Irdeb, 'Dana dulin meten min mon wor po hike nana hubu hewen tiya?' yinyin. ⁷Irkeb, 'Mon, al kura belej meten kura ma dunkeb gago dulin hite,' inamin. Irkeb, 'Den manan kun wain metenner meten tina,' yinyin.

⁸"Be, numtuk urkeb meten min al goreb metenmin doyan ird ird al goyen gaha inyin. 'Meten tana mar goyen hoy yirde murungem yunayin. Funan wor po wan meten tana mar go wa damu yirayin. Irde kun kun funanbe wampot mun yen wa wayhan mar goyen damu yirayin,' inyin. ⁹Funan wor po wayamin mar gobe denari un kuren un kuren yawaramin. ¹⁰Ningeb go yenenbe wampot mat meten tiyamin mar gobe hora hende wor po tina tihit yen nuramin. Gega yen manan denari un kuren po yawaramin. ¹¹Horamin go yadeb meten min al goke igin ma po nurde bin ar yamin. ¹²Irde, 'Al gayamun ga wan metenge tana be nen hora tihit gahade po tana. Nenbe wampot mat nana misin ma yen meten kurun wor po tihit,' inamin. ¹³Gega meten min al gore huwarde kuramin kura goyen, 'Kadne, al hoyan po igin yirde, denbe bulun ma dirhem. Denbe igin denari un kuren goke meten titek ma yahan? ¹⁴Dufaynerbe al kamere meten ten nunhanya denyabe murungem

ⁿ 20:2 Denari: Al belej wampot mat meten tenbe wawunbana nana sul yeke bada henbe gote hora tiyyenge denari un kuren tiyyen.

tuŋande dunen yen nurhem. Ningeb horatiŋ yade kunaŋ. ¹⁵Horabe nigen geb daha wet kura ire yenbe gwahade po ireŋ. Gega daniŋ geb al buninen yirde faraŋ yurhem goke igiŋ ma nurhaŋ?’ yinyiŋ. ¹⁶Al Kurun belen yende alya bereya doyaŋ yird yird matabe gwahade geb, al kame hiyen al gobe mehenjde hiyen. Munan mehenjde hiyen al gobe kame hiyen,” yinyiŋ.

Yesu belen kamde kamdemiŋ ge sopte tagalyiŋ

(Mak 10:32-34; Luk 18:31-34)

¹⁷Be, Yesu go Yerusalem kun henyaŋ komatmiŋ 12 goyen po yapat yiryiŋ. ¹⁸Irdeb, “Neŋbe Yerusalem kun hite gago. Irde ne Al Urmiŋ gayen al kura belen tagal nunkeb Al Kurun doloŋ ird ird mata doyaŋ marte karkuwanŋa Moseyen saba marya belen nade fere nirnayiŋ. ¹⁹Yen belen mayke kami yenbe al miŋ hoyan Yuda mar moŋ hitte nad nerke kweŋ. Irkeb yen belenbe giwgiw nirde nusulak tenbe kuruse hende mununke kameŋ. Gega kameŋde mat kun yerenkek hekeb sopte huwareŋ,” yinyiŋ.

Sebedi beremde gusunaŋ

(Mak 10:35-45)

²⁰Be, Sebedi berembe urmiŋ waraŋ yade Yesu hitte wayamiŋ. Wanbe dokolhoŋ yugulun tenbe gwaha nirwoŋ yen Yesu gusunaŋ iryiŋ. ²¹Irkeb, “Daniŋ wor po nurde ha?” inyiŋ. Irkeb bere gore, “Igiŋ yen kenenbe ge belen alya bereya doyaŋ yirde hayinde gorbe urne waraŋ gayen ketalger heŋ tumnaŋde al doyaŋ yirde hinayiŋ,” yiriŋ. ²²Irkeb Yesu belen, “Miŋ gwahade niŋ gusunaŋ hihit yen nurdeya ma gusunaŋ hahan geb. Kanduk kurun tewen ten hime gayen epte tenayiŋ?” yinyiŋ. Irkeb, “Epte tetek,” inamiŋ. ²³Irkeb Yesu belen, “Fudinde kandukbe tiriryen gega, neya heŋ al doyaŋ yird yird niŋ gusunaŋ nirhaŋ gobe ne belen igiŋ ma bulun ma dinen. Ne ketalner kurhan kurhan heŋ denem yaŋ heŋ heŋ gobe Nanne belen hakot al basaŋa yirtiŋ haŋ gore yawarnayiŋ,” yinyiŋ.

²⁴Be, komatmiŋ hoyan 10 gore mere go nurdeb ire itiŋya goke biŋ ar yamiŋ. ²⁵Irkeb Yesu belen tumnaŋ hoy yirdeb gaha yinyiŋ: “Megen niŋ doyaŋ mar karkuwanbe al kafura yirkeb yen yufukde po hanŋyen. Irde yende meten marmiŋ manan deniniŋ yaŋ hihit yen nurdeya al kanduk yunen hanŋyen. ²⁶Gega denbe gwahade moŋ. Al kura den kahal bana gayen al kurun hewe yen nuryen gobe yingen ge ma nurde dende meten al po hiyyen. ²⁷Ningeb den bana al kura doyaŋ al hewe yenbe yingen ge ma nuryen. Irde den ge po dufay heŋ dende meten al po hiyyen. ²⁸Gwahade ningeb, ne Al Urmiŋ gayen wor al belen igiŋ igiŋ nirnan yen ma katmiriŋ. Ne belen po al igiŋ yire yen katmiriŋ. Irdeb alya bereya budam gote mata bulunmiŋ gote murungem yingen yawartek goyen ne belen yawaren goke ten darine wok irde kameŋ yen katmiriŋ,” yinyiŋ.

Al irawa diliŋ titmiŋ naŋkenaryum
(*Mak 10:46-52; Luk 18:35-43*)

²⁹Be, Yesuya komatmiŋya goya Yeriko taun tubul teŋ kuŋ hikeyabe al buda kurun gama irde kuŋ hinhan. ³⁰Goya goyenbe al irawa diliŋ titmiŋ kura beleŋ siŋare keperde hinaryum. Irde Yesu gago waŋ kuŋ hi yinke nurdeb, “Doyaŋ Al Kurun, Dewit Urmiŋ, bunineŋ nurd duneŋ faraŋ dura be!” yeŋ hokde po gwaha inaryum. ³¹Irkeb al buda gore nurde yineŋ teŋbe, “Balmiŋ hiri!” yinamiŋ gega, ug po, “Doyaŋ Al Kurun, Dewit Urmiŋ, bunineŋ nurd duneŋ faraŋ dura be!” inaryum. ³²Irkeb Yesu go tek yeŋ huwarde hoy yirdeb, “Daha dirwoŋ yeŋ nurde har?” yinyiŋ. ³³“Doyaŋ Al Kurun, naŋkenyewoŋ yeŋ nurde har.” inaryum. ³⁴Be, Yesu gob bunineŋ wor po yeneŋbe diliŋyaŋ sisaŋ yurkeb goyare po naŋkeneŋ gama irde yeŋ kuŋ hinhin beleŋ goŋ kwaryum.

Yesu Al Kurunyen ya balem bana hurkuriŋ
(*Mak 11:1-11; Luk 19:28-40; Yon 12:12-19*)

21 ¹Be, Yesuya komatmiŋya go Yerusalem binde binde hamiŋ. Tiyuŋ kura deŋem Betfage gobe Olip dugu dabayiŋ beleŋ hinhin. Be, Yesube gor forok yeŋbe komatmiŋ irawa kura hulyaŋ yirdeb, ²“Kuri. Kuŋ tiyuŋ iroyenter forok yeŋbe doŋki al diriŋ foŋeŋ kura gor miliŋya yeŋ titiŋ yeneŋbe yugu teŋ yade wayiryen. ³Al kura beleŋ goke daha wet kura dinkab, ‘Doyaŋ Al Kurun beleŋ goke yihi,’ inkeb yubul teŋ dunkeb yade wayiryen,” yinyiŋ. ⁴Yesu go tiyyiŋ gobe bikkeŋ Al Kurunyen mere basaŋ heŋ heŋ al beleŋ yiriŋ goyen fudinde forok yeŋ yeŋ ge tiyyiŋ. Merebe gahade:

⁵ “Yerusalem^o niŋ mar goyen gaha yinnaŋ.

‘Doyaŋ Al Kurunŋiŋ deŋ hitte waŋ hi.

Al gobe yiŋgeŋ ge turuŋ turuŋ ma teŋ hi.

Niŋgeb al gobe doŋki hende waŋ hi.

Doŋki gobe foŋeŋ,’ yinnayiŋ,” yitiŋ hi. *Aisaia 62:11; Sekaraia 9:9*

⁶Be, Yesu komatmiŋ go kuŋbe yinyiŋ gwahade po tiyaryum. ⁷Doŋki foŋeŋya miliŋya go yawakeb komatmiŋ beleŋ uliŋhormiŋ yugu teŋ go hende ugamkeb hurkuŋ kipiryiŋ. ⁸Al budam Doyaŋ Al Kurunniŋiŋ waya yeŋ uliŋhormiŋ yugu teŋ beleŋ yaŋ ugamamiŋ. Kurabe patila haniŋ yufuŋ tiyamiŋ goyen beleŋyaŋ sar irde tukamiŋ. ⁹Al kurabe meheŋ hekeb kurabe kame hamiŋ. Irdeb tumŋaŋ ala turuŋ iramiŋ.

“Dewit Urmiŋ turuŋ irniŋ ko.”

“Doyaŋ Al Kurunyen deŋemde waŋ hi gobe Al Kurun beleŋ guram irde saŋiŋ iryen!”

Tikiŋ 118:25-26

^o 21:5 Deŋem hoyanbe Saion.

“Al Kurun turun irnin ko.”

¹⁰Be, Yesu go kun Yerusalem forok yekeb taunde gor nin mar gob tumnan hurkunat wor po tenbe, “Al gab ganun?” yamin. ¹¹Irkeb al buda goreb, “Al gabe Yesu Al Kurunyen mere basan al. Yenbe Galili nana bana gon nin tiyun Nasaret nin al,” yinamin.

Yesu beleh Al Kurunyen ya balem haran hirin

(Mak 11:15-19; Luk 19:45-48; Yon 2:13-22)

¹²Be, Yesu go Al Kurunyen ya balem kaya beleh po milgu irtin bana gon gabu gasun kurunde hurkunbe al buda gor det damu ten hinhan go kwep kwep yirde yakira tiyyin. Irde hora kapyan hen hen mar beleh hora yirtin gasunya damure nin kalyin yawan yerdeb keperde hanjen gasunya goyen yade yabolon ten yunyin.^p ¹³irdeb, “Al Kurunyen mere asande katinbe gahade: ‘Ya gabe ne mere nird nird gasun. Gar wan gabu irde mere nird nird ya hiyyen,’ gwahade yitin hi. Goyenbe den belehbe ten ‘kawe marte gasun’ irde han,” yinyin.

¹⁴Be, Yesu go ya balem bana gon po hikeya al dilih titminya kahan simsimanya goyen yen hitte wake sope yiryin. ¹⁵Irkeb dirinbe bana gon, “Dewit Urmin turun irnin ko!” yen hewhow ten hinhan. Irkeb Al Kurun dolon ird ird mata doyan mar pris buda gote karkuwanminya Moseyen saba maryabe Yesu beleh mata tinen forok yiryin goyen kenamin, irde dirin beleh Yesu goyen Dewit Urmin yen turun iramin goyen nurdeb bin ar wor po yamin. ¹⁶Irdeb wan Yesu gusunan iramin. “Gebe dirin mere ten han gayen nurde ha?” inkeb wol henbe, “Gwaha, nurde hime. Denbe dirin beleh mata ten han goke Al Kurunyen asandeb, ‘Dirin kahanjan hitin ya dirin mamure nin ya beleh turun nird nird nin gitik yirtin,’ yitin gobe kapyan ma hen hanjen?” yinyin. ¹⁷Gwaha yinenbe yubul ten Betani taunde kun go wawun gobe gor hinhin.

Yesu beleh fik he karan uryin

(Mak 11:12-14,20-24)

¹⁸Be, fay urkeb wampot mun Yesu go mulgan hen Yerusalem kun hen yabe belen bing iryin. ¹⁹Irkeb fik he yuwalhen digula urtin goyen beleh sinare hike kenenbe iginen minyan daw yen kun kinyin. Kun minde mat kinyinbe iginen minmon, yuwalhen beleh po aw urtin. Gwahade kenenbe Yesu beleh he goyen, “Teban iginen ma hawayin,” inen karan uryin. Irkeb goyare po gwilgwil iryin.

²⁰Be, Yesuyen komatmin go fik he goyen goyare po kamtin heke kenenbe dilih fot yamin. Irdeb, “Dahade geb he gob bemel po gwilgwil ira?” yamin.

^p 21:12 Hora kapyan hen hen marbe Roma gabmanyen horaya Yuda marte hora goyen al beleh yen yunke Al Kurunyen ya balemde nin hora ten wolminen al go yunke gab Al Kurun galak irnin yen ya bana gon yerde hanjen.

²¹ Irkeb Yesu beleŋ wol heŋbe, “Fudinde wor po dinenŋ hime. Al Kurunŋ nin hekkeŋ nurde dufay irawam ma irnayinbe ne beleŋ fik he irhem gwahade igin tinayin. Irdeb dugu wor, ‘Kunŋ makanŋ alare kurka,’ inkeb gwaha po tiyyen. ²² Al Kurunŋ nin hekkeŋ nurde det kuraŋ gusunŋan irkeb tumŋan dunyenŋ,” yinyin.

Yesu tareŋminŋ ge gusunŋan iraminŋ

(Mak 11:27-33; Luk 20:1-8)

²³ Be, Yesu go Al Kurunŋyen ya balem kaya beleŋ po milgu irtinŋ bana sawsawa al gabu irde hanŋyende gor hurkunŋ al saba yirde hinhin. Irkeb pris buda gote karkuwanminŋya Yuda marte doyanŋ mar parguwakya beleŋ Yesu hitte wanbe, “Mata teŋ ha kurunŋ gayenbe da tarende teŋ ha? Ganunŋ beleŋ igin gwaha teŋ hayin ginunŋ?” inaminŋ. ²⁴ Irkeb, “Ne wor gusunŋan kura direnŋ tihim gayen wol henayin. Irke gab nebe goyen saŋinŋde teŋ hime yeŋ momonŋ direnŋ,” yinenbe gaha yinyin. ²⁵ “Yon Baptais beleŋ al baptais yirde hinhin gobe Al Kurunŋyen tarende ma alyen tarende? Momonŋ nirnanŋ,” yinyin. Irkeb mel goyen yinŋen ulin mere sege irdeb, “Daha intek? Al Kurunŋyen saŋinŋde intek gob, ‘Munanŋ daninŋ sabaminbe fudinde yeŋ gama ma irde hinhanŋ?’ dinyenŋ. ²⁶ Munanŋ alyen saŋinŋde yetek gob al buda kurunŋ gabe Yon Baptaisbe Al Kurunŋyen mere basanŋ al yeŋ nurde hanŋ geb, biŋ ar yeke mudunnayinŋ,” yaminŋ. ²⁷ Irdeb mel goreb, “Go ma nurde hite,” inaminŋ. Irkeb Yesu beleŋbe, “Ne wor al gore ok ninke teŋ hime ma dinenŋ,” yinyin.

Al kurat urminŋ waranŋ gote maya mere

²⁸ Irdeb Yesu beleŋbe, “Ga dinenŋ tihim gayen dahade nurnayin goyen tagalke nurenŋ. Be, al kura urminŋ irawam yanŋ hinhin. Kurarebe urminŋ kurunŋ hitte kunbe gaha inyinŋ. ‘Eke, hanŋkabe kunŋ wain metenŋde metenŋ tiyayinŋ,’ inyinŋ. ²⁹ Irkeb urminŋ kurunŋ goreb, ‘Badne,’ inyinŋ. Goyenbe kamebe dufayminŋ mulganŋ hekeb kunŋ metenŋ tiyyinŋ. ³⁰ Be, al gob urminŋ dirŋenŋ hitte wor kunbe urminŋ kurunŋ inyinŋ gwahade po inyinŋ. Irkeb urminŋ dirŋenŋ goreb, ‘Be, doyanŋ al, gwaha tiyen geb,’ inyinŋ. Goyenbe kunŋ metenŋ ma tiyyinŋ. ³¹⁻³² Ningeb dirinŋ daminbe naninŋde mere nurde gama iryinŋ?” yinyin. Irkeb mel gore wol heŋbe, “Urmunŋ kurunŋ gore,” inaminŋ. Irkeb Yesu beleŋ wol heŋbe, “Deŋbe Yon Baptais beleŋ wanŋ Al Kurunŋ dilinŋde huwak heŋ heŋ nin yekeb mereminŋ ma nuranŋ. Irde mataminŋ goyen yenanŋ gega, mereminŋ fudinde yeŋ ma nurdeb Al Kurunŋ nin bitinŋ mulganŋ ma hiyunŋ. Goyenbe teks yad yad marya bere belen ninŋyabe fudinde yeŋ nuranŋ. Ningeb fudinde wor po dinhem. Teks yad yad marya bere belen ninŋyabe deŋ fole dirde yeŋ wa Al Kurunŋ beleŋ alya bereyaminŋ doyanŋ yirde hi bana gonŋ hurkunayinŋ,” yinyin.

Wain metenŋ doyanŋ irde hinhan mar gote maya mere

(Mak 12:1-12; Luk 20:9-19)

³³ Irdeb Yesu gobe tebanŋ gaha yinyinŋ: “Maya mere hoyanŋ ga nurnanŋ. Al kura wain metenŋ harde kaya kerde milgu irdeb wain fiminŋ gilyanŋ

heŋ heŋ niŋ mete talde det gitik yiryiŋ. Irdeb ya kawan kura al gor heŋ wain metey go doyaŋ ird ird niŋ iryiŋ. Irdeb metey gobe metey mar hoyay haniŋde kerdeb naŋa gisaw kuriŋ. ³⁴Be, wain igineŋ yad yad nalu hekeb miŋ al gore metey marmiŋ karwo hulyaŋ yirkeb wain igineŋ kura yawarniŋ yeŋ kwamiŋ. ³⁵Goyenbe mel goreb gasa yiramiŋ. Uŋkurenj maydeb kurabe mayke kamiŋ. Irdeb funaŋbe horare mayamiŋ. ³⁶Be, al gob tebaŋ po metey marmiŋ kura budam hulyaŋ yirke kwamiŋ. Kukeb meheŋde yiramiŋ gwahade po yiramiŋ. ³⁷Irkeb funaŋ wor pobe, ‘Urne hulyaŋ ire. Gogab palap irde meremiŋ nurnayiŋ geb,’ yeŋbe urmiŋ teŋ kerke kuriŋ. ³⁸Gega wain metey doyaŋ irde hinhan mar gobe kadom momoŋ gird teŋbe, ‘Metey gate miŋ al gote urmiŋbe gago geb, mayteke kami. Gogab metey gayen naniŋ miŋmoŋ hekeb nende hiyyeŋ,’ yamiŋ. ³⁹Irdeb metey miŋ alyen urmiŋ go teŋ tukuŋ metey siŋare mayke kamiŋ. ⁴⁰Gwaha tikeb metey miŋ al gore waŋbe daha yiryen yeŋ nurde haŋ?” yinyiŋ. ⁴¹Irkeb Al Kurun doloŋ ird ird mata doyaŋ marya Yuda marte doyaŋ mar parguwakya beleŋ wol heŋbe, “Mata buluŋ tinayiŋ mar go gasa yirke kamnayiŋ. Irde meteymiŋ go teŋ al hoyay haniŋde kiryeŋ. Irkeb mel gore gab wain igineŋ yad yad nalurebe yeŋ untekebe uney hinayiŋ,” inamiŋ. ⁴²Irkeb Yesu beleŋ wol heŋbe, “Deŋbe Al Kurunyen mere gahade katiŋbe ma keneŋ hanjen? Merebe gahade:

‘Ya yird yird mar beleŋ igiŋ moŋ yeŋ nurde pel iramiŋ hora goyen al hoyay beleŋ teŋ go hende ya saŋiŋ wor po iryiŋ.

Go iryiŋ gobe Doyaŋ Al Kurun beleŋ iryiŋ.

Niŋgeb Al Kurun beleŋ iryiŋ gob dilniniŋdebe igiŋ wor po yeŋ keneŋ hite,’ yitiŋ hi.

Tikiŋ 118:22-23

⁴³“Niŋgeb fudinde wor po dineŋ hime. Deŋbe Al Kurun beleŋ alya bereyamiŋ doyaŋ yirde hi bana goŋ hitek gega, dakira teŋbe Al Kurun diliŋde mata igiŋ teŋ hinayiŋ mar goyen po gab yunyeŋ. ⁴⁴Niŋgeb Al Kurunyen asaŋde hora niŋ yitiŋ gobe ne gago. Niŋgeb al kura hora go hende takteŋ mayyeŋbe mugol niyyeŋ. Irde hora gore kateŋ hika tiyyeŋ al gobe umetek tiyyeŋ. Niŋgeb al kura neneŋ bebaŋ ma tinayiŋ mar hittebe kame mata gwahade forok yiyyeŋ,” yinyiŋ.

⁴⁵Be, pris buda gote karkuwaŋmiŋya Farisi marya go Yesuyen maya mere go nurdeb, “Neŋ ga po dineŋ hi,” yeŋ nuramiŋ. ⁴⁶Irdeb daha mat kura teŋ fere titewoŋ yeŋ nuramiŋ. Irdeb Yesube al buda gore yeŋbe Al Kurunyen mere basaŋ al yeŋ nurde hinhan geb, al buda goke kafura hamiŋ.

Bere teŋ teŋde niŋ dula mata gote maya mere

(Luk 14:15-24)

22

¹Be, Yesu go tebaŋ po maya mere mat al gaha yinyiŋ; ²“Al Kurun beleŋ alya bereyamiŋ doyaŋ yird yird goyen kurabe

gahade: doyaŋ al kurun kura urmin bere tewe yekeb dula mata kurun gitik tiyyin. ³Irdeb meten marmen hulyan yirdeb, ‘Kun dula mata gake al hoy yirmin mar goyen yinke wanaŋ,’ yinyin. Goyenbe kun yinkeb bada hamin. ⁴Irdeb meten marmen hoyan wor sopte hulyan yirdeb gaha yinyin. ‘Kunbe, “Doyaŋ al kuruninin belen bulmakaw firfurŋen gasa yirde det tumnan gitik ten ep ira. Irdeb wanayin yen den ge keya hihi geb wake kunin,” yinnayin,’ yinyin.

⁵“Be, meten marmen gore kun al hoy yirmin mar goyen yenenbe doyan almin belen yinyin gwahade po yinamin. Goyenpoga yende mere go ma nuramin. Irdeb dufayminde dufayminde kwamin. Al kurabe binde metenminde kurin. Munan kurabe hora metenminde kurin. ⁶Al kura marbe doyan al kurunde meten mar buda goyen yade bulun bulun yirde gasa yirke kamamin. ⁷Gwaha tikeb doyan al kurun go bin ar yekeb fulen marmen yad yerke kwamin. Kunbe al buda meten marmen gasa yiramin goyen gasa yirke kamkeb tiyunmin go manan kunga tiyamin.

⁸“Gwaha tenbe doyan al kurun go meten marmen yenya hinhan go hoy yirmin. Irdeb gaha yinyin. ‘Dawetbe tumnan gitik ten ep irtin gega, al watek mar wor pobe wan wan nin bada hahan. ⁹Ningeb kun belenyan alya bereya kura yenenbe mali po yinkeb dula mata tiyen tihimde gar wanayin,’ yinyin. ¹⁰Gwaha yinkeb meten marmen gobe taun bana gon nin belen hanin hanin gama yirdeb kun al bulunya ingin ya goyen yenenbe mali po yinke wayamin. Be, al go wan keperaminbe yabe makin wor po hirin.

¹¹“Irdeb doyan al kurun belen al gabu iramin go yene yen wanbe al kura dula matare nin umna ma titin goyen kinyin. ¹²Kenenbe, ‘Dula matare nin umna ma taha gega, daha mat bana gan wayha?’ inkeb al gob mere ma po tiyyin. ¹³Irdeb doyan al kurun goreb, ‘Ten kahan ya haninya fere ten sinare kidoma bana temeynan. Gorbe esen misin isen bana gon hiyen,’ yen meten marmen hulyan yirmin. ¹⁴Be, maya mere ga nurhan gwahade goyen po, Al Kurun belenbe al budam hoy yirde hi gega, yunkuren yunkuren po gab nigen yen basina yirtin han,’ yinyin.

Farisi mar belen teks kerd kerd nin Yesu gusunan iramin
(Mak 12:13-17; Luk 20:20-26)

¹⁵Be, Farisi mar go meremin nurde bin ar yekeb sinare katenbe Yesu go son hekeb merere kertek yen yingen ulin mere sege iramin. ¹⁶Irdeb yingen komatmin yad yerke Yesu hitte kwamin. Herot gama irde hanen mar manan yenya tumnan kwamin. Kunbe Yesu goyen, “Tisa, gebe mata fudinde po ga ten hayen. Irdeb Al Kurunyen merebe fudinde mat po saba ten hayen. Gebe al denem yan ya denem mon ya goyen mere ya matayabe tunande po yirde hayen. ¹⁷Ningeb gebe dahade nurde ha? Nen Moseyen saba gama irde hite mar gayen Roma gabmanen

doyan al kurun Sisar nin teks kertek gobe igin ma dahade? Igin momon dirayin?” inamin.

¹⁸ Goyenpoga Yesu gob dufaymin bulun gob bikken yenen bebak tenbe, “Usi mar wor wor, dani tujan nirde han? ¹⁹ Teks yerde hanjen hora go nikala nirke kene,” yinyin. Irkeb denari unken tawayamin. ²⁰ Irkeb al tonen hora hende gor kenenge, “Gabe ganun toneya denjema?” yinyin. ²¹ Irkeb mel gore wol henbe, “Sisaryen,” inamin. Irkeb wol henbe, “Gwahade nengeb, det kura nin Sisar beken dinyen gobe Sisar unnayin. Munan Al Kurun beken det kura nin dinyen gobe Al Kurun unnayin,” yinyin.

²² Be, Yesu beken mere tiyyin go nurdeb dinon kok yekeb tubul ten kwamin.

Sadusi mar beken al kamtin huward huward nin Yesu gusujan iramin
(*Mak 12:18-27; Luk 20:27-40*)

²³ Be, nana fay goyare goyen po Sadusi mar beken Yesu hitte wayamin. Go mar gobe al kamtinde mat epte ma huwarnayin yen hanjen. Be, mel go Yesu hitte wenge gusujan iramin. ²⁴ “Tisa, Moseyen sabarebe, ‘Al kura dirin minjon henya berem tubul ten kamkeb kulin kura hiyyen gore itinde beretap go tenbe itin nin dirin forok irde unyen,’ gwahade yitin hi. ²⁵ Be, al kura kulin 6 minyan goyen nenya hityen. Al gobe bere tirin gega dirin minjon henya kamiy. Irkeb kulin beken beretap go tirin. ²⁶ Goyenbe yen wor gwahade po dirin minjon henya kamiy. Irkeb yen kamekken gore wor beretap go tamin goyen dirin kura ma forok irdeya kamamin. ²⁷ Irke funenge bere go wor kamiy. ²⁸ Be, al goya kulin wenya gote berembe unken gogo po hinhin geb, kame al kamtin huward huward nalurebe bere gobe ganunde berem wor po hiyyen?” inamin.

²⁹ Gwaha inkeb Yesu beken wol henbe, “Denbe Al Kurunen tarenja meremja asande katin goyen kenen wuk ma yen hanjen. Gwahade geb son hen go ma kenen han. ³⁰ Al kamtin huwarnayin nalureb al beken bere yade bere beken al ma kunayin. Yenge Al Kurunen miyon yara po henayin. ³¹ Al kamtin huward huward matabe Al Kurun beken asanminde, ³² ‘Nebe Abraham, Aisakyabe Yekopyat Al Kurun,’ yirin goyen gobe kapyan ma hen hanjen? Mel gobe kamtin gega, tonenge wenya han geb, gogo yirin. Nengeb Al Kurunbe al dilin gergen han gote Al Kurun, al kamtin gote mon,” yinyin. ³³ Be, al buda gobe meremin nurdeb dinon kok wor po yamin.

Moseyen saba gote min wor pobe da?
(*Mak 12:28-34; Luk 10:25-28*)

³⁴ Be, Yesu beken Sadusi marte gusujan go kenkela po wol hekeb gwaha mat kura mere titek mon hamin. Irkeb Farisi mar beken go nurdeb

waŋ Yesu hinhinde gor gabu iramiŋ. ³⁵Irdeb unjkurenmiŋ kura Moseyen saba kenkela nurde hitiŋ al gore waŋbe tunjaŋ ure yeŋ gaha inyiŋ:

³⁶“Tisa, saba kurunŋ gabe nurde hite. Goyenbe damiŋbe saba kurunŋ gote folek wor po?” inyiŋ.

³⁷Gwaha inkeb Yesu belenŋ wol henbe, “Bubulkunŋe, tonge, dufaygeya tareŋgeya tumŋaŋ Doyaŋ Al Kurunŋe, Al Kurunŋ hitte po hugiŋeŋ kun hiyeŋ. ³⁸Gabe Moseyen saba kurunŋ gote folek wor po. ³⁹Gote kurhanbe gigenŋ ge amaneŋ nurde hayen gwahade goyen po kadge hoyan niŋ wor amaneŋ nurde hayiŋ. ⁴⁰Moseyen sabaya Al Kurunyen mere basanŋ marya belenŋ saba kayamiŋ kurunŋ gote miŋbe irawa gago po,” inyiŋ.

Yesu belenŋ Farisi mar go Mesaia niŋ gusuŋaŋ yiriŋ

(Mak 12:35-37; Luk 20:41-44)

⁴¹Be, Farisi mar go gabu irde hikeb Yesu belenbe gusuŋaŋ yiriŋ.

⁴²“Deŋ gayen Mesaiabe ganunde urmiŋ yeŋ nurde haŋ?” Gwaha yinkeb Farisi mar gore wol henbe, “Yeŋbe Dewit urmiŋ,” inamiŋ. ⁴³Irkeb Yesu belenbe, “Dewit urmiŋ yeŋ haŋ gega, dahade niŋgeb Holi Spirit belen Dewit ketal urkeb urmiŋ goyen, ‘Gebe Kurunne,’ inyiŋ? Dewit belen Mesaia niŋ gaha yiriŋ:

⁴⁴‘Al Kurun belenŋ Doyaŋ Al Kurunne gaha inyiŋ:

“Waŋ ketalner heŋ al deŋem yaŋ wor po hawayiŋ.

Irkeb asogo girde haŋ mar goyen bul yirde yawameke gasa yirde yufurka tiyayiŋ,” inyiŋ, yitiŋ hi.

Tikiŋ 110:1

⁴⁵Niŋgeb kapyan heŋ hanŋen gwahade po, Dewit belenŋ Mesaia goyen ‘Doyaŋ Al Kurunne’ inyiŋ. Niŋgeb dahade geb Mesaia gobe Dewityen urmiŋ hiyyen? Gobe epte moŋ geb!” yinyiŋ. ⁴⁶Be, gwaha yinkeb al kura belenŋ muŋ kura wol ma hiriŋ. Irde goyenter matbe al kura waŋ Yesu tunjaŋ urde merem yaŋ irniŋ yeŋ gusuŋaŋ irde hinhan gobe bada po hamiŋ.

Yesu belenŋ Farisi marya Moseyen saba maryat sikkenŋ tagalyiŋ

(Mak 12:38-39; Luk 11:43,46; 20:45-46)

23 ¹Be, Yesu gob komatmiŋya al buda kurunŋya goyen saba yirde henŋyabe gaha yinyiŋ: ²“Moseyen saba gote miŋ tagal tagal metenbe Moseyen saba marya Farisi marya belenŋ teŋ hanŋen. ³Niŋgeb mel gore saba dirkeb kenkela gama irde hinayiŋ. Goyenpoga yingenbe saba teŋ hanŋen goyen ma gama irde haŋ geb, matamiŋ po gab gama ma yirde hinayiŋ. ⁴Mel gobe mata gama irtek metenŋ wor po goyen budam forok yirdeb gama yiranyiŋ yeŋ tagalde hanŋen. Irkeb albe kandukŋen wor po nurde hanŋen. Goyenpoga biŋdebe muŋ kura gama irtek ma yirde hiyen. ⁵Mata teŋ hanŋen kurunŋ gobe al belenŋ dennanŋ yeŋ mata teŋ hanŋen. Al Kurunŋ doloŋ ird irdde niŋ bisi pelyenŋ wor po kura Moseyen

mere go hende katin goyen tonande yerde hanjen. Irde Al Kurun dolon ird irdde nin ulin umna murun belej nin sinsanen goyen ulyan wor po yirdeb hor yirde hanjen. ⁶Yenbe dula mata karkuwanya gabu yayan kun henbe al denem yan de gasunyan po kepertek nurde hanjen. ⁷Irdeb gabu gasunyan kunbe al belej yenen palap yirde ‘Tisa’ yinen yinen nin amanen nurde hanjen.

⁸“Goyenbe Doyan Al Kuruntinbe unken po, irde denbe tumnan yende dirnen wen nengeb, denbe danin ‘tisa’ ma dinhan yen ma nurde hinayin. ⁹Nantinbe Al Kurun sanin minyan yen unken gog po geb al kura ‘Ado’ ma inen hinayin. ¹⁰Tisatinbe Mesaia yen unken po geb, denbe danin ma ‘Tisa’ dinen han yen ma nurde hinayin. ¹¹⁻¹²Nengeb al kura yingen turun turun irde hiyen al gobe Al Kurun belej yenbe denem mon iryen. Irde al kura yingen nebe denem mon yen hiyen al gobe Al Kurun belejbe denem yan iryen. Nengeb den bana gayen al kura doyan al hewe yiyyen al gobe dende meten al hiyyen,” yinyin.

Farisi marya Moseyen saba marte mata bulun goke yirin

(Mak 12:40; Luk 11:39-42,44,52; 20:47)

¹³⁻¹⁴Irdeb al buda gor gabu irde hinhan goyen gaha yinyin: “Be, den Moseyen saba marya Farisi maryabe usi mar wor po. Denbe Al Kurunyen bearar bana han goke buninen wor po nurd dunen hime. Den belejbe Al Kurun belej alya bereyamin doyan yirde hire gor kun kun belejmin pet ten han. Dindikenbe bana gon ma hurkun han. Irde al hoyan goyen bana gon hurkun yen kurut yen han mar wor belejmin pet ten han.” ¹⁵Den Moseyen saba marya Farisi maryabe usi mar wor po. Denbe Al Kurunyen bearar bana han goke buninen wor po nurd dunen hime. Denbe, ‘Al yawarteke mataninin gama irnan,’ yenbe al unken mun kura goke wor kahaninde kurab hakwa hende kun nana kurun gayen pasi hen hanjen. Irdeb al gore matatin gama irdeb Al Kurunyen saba bulun irde hanjen. Irdeb al gote mata bulunminbe dende folek wor po kak alare kutek po yirde hanjen.

¹⁶“Denbe al dilin titmin belej al kadom belej ikala irde tukuyen go gwahade goyen ten han. Nengeb denbe Al Kurunyen bearar bana han goke buninen wor po nurd dunen hime. Denbe al saba gahade yirde hanjen: ‘Al kura Al Kurunyen ya balem den urde bin tiyyen goyen ma gama iryen goke kanduknen ma nuryen. Goyenpoga al kura ya bana gol hora hiyen goyen den urde bin tiyyen gobe gama po iryen,’ gwaha yen

⁹ 23:13-14 Asan hoyandebe gahade hi: ¹⁴ Den Moseyen saba marya Farisi maryabe usi mar wor po. Denbe beretapen samunya horaya komkom hen hanjen. Goyenbe al hoyan belej denen turun dirnan yen Al Kurun mere irhet yenbe mere ulyan wor po tulun ten hanjen. Nengeb denbe gote murungem bulun wor po Al Kurun belej yunyen.

hanjen. ¹⁷Diliŋ kukuwa! Diliŋ titmiŋ buda! Dabe det kurun? Gol hora ma ya goyen? Gol hora yen ulinbe det himam mon. Goyenbe ya goyen bana hi goke tenbe himam hiyyen. Ningeb ya gobe det kurun. ¹⁸Sabatin kurabe gaha yen hanjen: ‘Al kura alta deŋe urde biŋa tiyyen goyen ma gama iryen goke kanduknen ma nuryen. Goyenpoga Al Kurun galak ire yen alta hende kirtin goyen deŋe urde biŋa tiyyen gobe gama po iryen,’ yen hanjen. ¹⁹Diliŋ titmiŋ buda! Dabe det kurun? Alta ma det go hende hi goyen? Det go yen ulinbe himam mon gega, alta hende kerkeb himam hiyyen. Ningeb altabe det kurun. ²⁰Ningeb al kura alta deŋe urde biŋa tiyyenbe alta go mun po mon, det go hende Al Kurun galak irtin go manan deŋe uryen. ²¹Irde al kura Al Kurunyen ya balem deŋe urde biŋa tiyyenbe ya go mun po mon, det ya go bana hinayin kurun goyen manan gog po deŋe yuryen. ²²Irde nanŋinbe Al Kurunyen maroro gasun. Ningeb al kura nanŋin deŋe urde biŋa tiyyenbe maroro gasun go po mon, go hende keperde hi Al goyen manan gog po deŋe uryen. Ningeb biŋa tinayinbe go po gama irde hinayin.

²³“Be, deŋ Moseyen saba marya Farisi maryabe usi mar wor po. Deŋbe Al Kurunyen bearar bana han goke buninen wor po nurd dunen hime. Deŋbe binbe hapek yird yird det harde hanjen goyen yade buda 10 yirdeb unŋurenbe Al Kurun unen hanjen. Goyenbe deŋbe Moseyen saba kurun wor po goyen pel irde hanjen. Al kura deŋ nurd yunen han mar po ga igin igin yirde, go ma nurd yunen han marbe gwaha ma yirde hanjen. Kadtiŋ buninen nurd yuntek goyen buninen ma yirde hanjen. Irde Al Kurun nin hekken nurtek goyen go ma po gwaha ten hanjen. Goyenbe Al Kurun galak ird ird mataya kadtiŋ buninen nurd yunen yunen mataya gobe tumnan gama po irde hinayin. ²⁴Goyenpoga deŋbe Moseyen saba karkuwan karkuwanbe pel yirdeb muknen muknen goke po gabe ug po yen hanjen. Goke tenbe deŋbe fe ninin yen det muknen mun kirkida gwahade goyen goke kenkela yakkelayan ten yade siŋa yirde gab nene han gega, dapŋa kurun kamel netek mon wor go ma nurde henya yohogo ten han yara denen hime. Deŋbe al kura diliŋ titmiŋ gore al kadam belen ikala irde tukuyen go gwahade ten han.

²⁵“Be, deŋ Moseyen saba marya Farisi maryabe usi mar wor po. Deŋbe Al Kurunyen bearar bana han goke buninen wor po nurd dunen hime. Deŋbe al hoyan belen ultiŋ siŋare po denenbe al wukkek yen denen han. Goyenpoga bitiŋ banabe kudiŋ mataya megen nin mata bulun hapekyan ten ten ninya belen po makin hitin. Ningeb deŋbe gisuya koronya siŋare po haldeb bindebe tikiŋ yan yubul ten hanjen yara denen hime. ²⁶Ningeb deŋ diliŋ titmiŋ Farisi mar, mehenbebe bitiŋ bana mata bulun han go wa yade siŋa yirnayin. Irke gab siŋare wor wuk yiyyen.

²⁷“Be, deŋ Moseyen saba marya Farisi maryabe usi mar wor po. Deŋbe Al Kurunyen bearar bana han goke buninen wor po nurd dunen

hime. Denbe bempa kura sijarebe umja irtin han. Gega bin banabe al kinikinija det mormokya belej po makin hitin han go gwahade goyen. ²⁸Ningeb al belejbe al huwak yej denen hanjen. Goyenpoga bitin banabe usiya mata buluj tej tej dufayya belej po makin hitin han.

²⁹“Be, den Moseyen saba marya Farisi maryabe usi mar wor po. Denbe Al Kurujen bearar bana han goke buninen wor po nurd dunen hime. Denbe Al Kurujen mere basan mar asetin yago belej gasa yirke kamamin gote bempa gergej yirde haran hen hanjen. Irde Al Kuruj dilinde al huwak hinhan mar gote bempa umja yirde hanjen. ³⁰Irdeb, ‘Nen gayen asininij yago hinhan nalu goyenter hinhet manhan asininij yago belej Al Kurujen mere basan mar gasa yirke kamde hinhan matamin goyen yilwa yirtewon,’ yej hanjen. ³¹Gwaha yej hanjen gobe den gayenbe Al Kurujen mere basan mar gasa yiramin mar gote fonenmin goyen dindiken sikkenjin forok yirde han geb. ³²Ningeb asetin yago mata buluj go min uramin goyen den belej tukunbe sol irnayin.

³³“Denbe kunere duwi wor po! Al Kurujen beararbe daha mat busahartek yej nurde han? Kak alare po ga kunayin geb. ³⁴Ningeb Al Kurujen mere basan marya al dufay wukkek minjanja saba marya yad yermeke den hitte wanayin. Goyenbe go mar goyen kurabe gasa yirke kamnayin, kurabe kuruse hende gasa yirke kamnayin. Munan kurabe gabu yatinyan yukun yusulak tej, kurabe gasa yirnin yej taun kurar mat kurar gama yirde yukun hinayin. ³⁵Ningeb al huwak kuruj megen gar hike gasa yirke kamnayin gote kanduk goyenbe den gayenter nin manan tenayin. Gobe Abel mayke kamyinde mat wan wan Berekia urmin Sekaraia goyen Al Kurujen ya balem bana gasun himamya altaya kahalte asetin yago belej mayke kamyin gote kanduk. ³⁶Ningeb fudinde wor po dinen hime. Kanduk kuruj dinen hime gabe tumnan den gayenter nin mar gare tenayin,” yinyin.

Yerusalem nin mar goke buninen nuryin

(Luk 13:34-35)

³⁷Irdeb sopte po, “Awo, Yerusalem nin mar, buninen wor po nurd dunen hime. Al Kuruj belej den ge nurde mere basan marmin yad yerke wan hanjen. Goyenbe den belejbe kurab hora po gasa yirde, kurabe mali gasa yirde hike kamde hanjen. Tatirok milin belej dirnen yawan tapen belej po aw yurde hiyen go gwahade goyen po, ne belej den goyen dade doyan dirde himewon yej huginen dufay hen himyen. Goyenbe dindiken po merene pel irde yilwa nirde hanjen. ³⁸Ningeb ga nurnan. Al Kuruj belej tauntin tubul tiyyen. Irkeb nana hoyande nin mar belej wan tauntin goyen gwamun urkeb det kura bana gon ma hinayin. ³⁹Nebe dubul tej kumekeb epte ma nennayin. Irde kun kun kame sopte wayen. Irkeb ne nenenbe dindiken mohontinde wor wor, ‘Doyan Al Kurujen

degemde waya al gabe Doyan Al Kurun belen guram irde igin wor po iryen,' yen turun nirnayin,' yinyin.

Al Kurunyen ya balem bulun hen hen nin yirin
(Mak 13:1-13; Luk 21:5-19)

24 ¹Be, Yesu gob Al Kurunyen ya balem goyen tubul ten hoyande kun hikeyab komatmin yago belen wanbe, "Ya balem ga kena," inamin. ²Irkeb Yesu belen, "Ya kenhan kurun gayenbe fudinde wor po dinen hime. Hora ya irtin yenen han gabe unkuren mun kura epte ma gasunden hiyen. Tumhan pir irnayin," yinyin. ³Yesu go gwaha yinenbe kun Olip dondonde kipiriyin. Irkeb yen yunkuren po henyabe komatmin yago belen, "Da mata forok yeke yenen gabe nalu funan go wan wan nalube forok yewen tiya yen bebak titek?" inamin. ⁴⁻⁵Irkeb wol henbe, "Nalu funan binde hekeb al budam wan, 'Mesaiabe ne gago,' yinen al budam wor po usi yirnayin. Ningeb kenkela hen hinan ko. Monjo al kura belen usi dirnayin geb. ⁶Kurabe fulea karkuwan forok yeke nurde hinayin. Irde fulea forok yenayin mere momon wor nurde hinayin. Goyenbe goke kafura hen hurkunat ma tinayin. Mata gwahade gobe forok yen hinayin gega, nalu funanbe kame ga wayyen. ⁷Goyenterbe al min kura belen huwarde al min hoyanya fulea ten hinayin. Gabman kura belen gabman hoyanya fulea gird ten hinayin. Albe bingge nin kamde hinayin. Niniha karkuwan naha kurar kurar forok yen hinayin. ⁸Kanduk kurun gob bere kura dirin kawan kere yen mehende wor po ulin misin katyen go gwahade goyen po, nalu funan binde hen hikeb mata goyen forok yenayin.

⁹"Goyenterbe al belen merem yan dirde bulun bulun dirde mudunke kamnayin. Irde al min kurayen kurayen kurun gore ne nin igin ma nurde den haram dirde hinayin. ¹⁰Goyarebe al budam ne nin dufaymin sanin irde hinayin goyen yubul tinayin. Irdeb kadom haram gird ten asogom haniinde yerde hinayin. ¹¹Irde al budam belen, 'Nenbe Al Kurunyen mere basan mar,' usi tenbe wan al budam usi yirde hinayin. ¹²Mata bulun belen po naha tiyyen. Irkeb al kadom nin amanen nurd nurd mata gobe hubu hiyyen. ¹³Goyenbe al kura sanin hen kanduk go fole irde kun kun funandebe Al Kurun belen al go tiyyen. ¹⁴Mere igin Al Kurun belen doyan dird dird goyen go wa megen kurun ga tagalde tukuke al nurde hinayin. Irke gab nalu funan go forok yiyyen," yinyin.

Kanduk kurun wor po forok yiyyen
(Mak 13:14-27; Luk 21:20-28)

¹⁵Irdeb sopte yinyin. "Al Kurunyen mere basan al Daniel belen asande, 'Det kura Al Kurunyen ya balem bulun wor po irtek goyen ya bana gon forok yiyyen,' yitin goyen forok yiyyen. (Mere kayhem gayen kapyan hen

haŋ marbe keŋkela dufay heŋ gab bebak tinaŋ.) ¹⁶Be, mata goyen forok yekeb Yudia naŋare hinayiŋ marbe busaharde dugure kuŋ bana kunayiŋ. ¹⁷Goyenterbe al kura ya hende hiyeŋ goyen kateŋ yamiŋ bana hurkuŋ detne kura yade ga busahare ma yiyyeŋ. ¹⁸Al kura metenmiŋ tubul teŋ kuŋ amilne teŋ ga ma yiyyeŋ. ¹⁹Goyen nalurebe bere biŋ yaŋya bere diriŋ besare niŋ miŋyaŋyabe meteneŋ wor po yiryen. ²⁰Niŋgeb kanduk kuruŋ goyen naŋa nalu buluŋde, ma Sabat nalure forok ma yewoŋ yeŋ goke Al Kuruŋ gusuŋaŋ irde hinayiŋ. ²¹Goyen nalureb megeŋ ga kanduk kuruŋ wor po tiyyeŋ. Haŋkapa Al Kuruŋ beleŋ tikula kiryiŋde mat waŋ ga hitere, irde kame wor kanduk gwahade kura ma kentek. Go kanduk goyenbe baraŋ wor po duryeŋ. ²²Niŋgeb Al Kuruŋ beleŋ nalu goyen sobamde po tubul tike manhan al tumŋaŋ kamwoŋ. Goyenbe al nigen yiriŋ goke teŋbe nalu go wer irde dolfon iryeŋ. ²³Goyen nalure al kura beleŋ, ‘Mesaiabe gago hi,’ dinnayiŋ, irde hoyaŋ beleŋ, ‘Moŋ, iror hi,’ dinen iŋgogaha dirke goya go ma nurde gama yirnayiŋ. ²⁴Mesaia falkukya Al Kuruŋyene mere basaŋ mar falkukya beleŋ alya bereya Al Kuruŋ beleŋ basiŋa yirtiŋ goyen usi yirteke katwoŋ yeŋ mata tiŋeŋ karkuwaŋ kurayen kurayen forok yirde hinayiŋ. ²⁵Mere gabe nalu go ma forok yeŋ hikeya gago momoŋ dirde hime geb, keŋkela heŋ hinaŋ ko.

²⁶“Niŋgeb Al kura beleŋ, ‘Mesaiabe sawsawa po kuruŋ naŋare hi,’ dinke ga kuŋ kinniŋ kinniŋ ma tinayiŋ. Irdeb, ‘Mesaiabe gaŋ banare hi,’ dinke goya fudinde yeŋ ma nurnayiŋ. ²⁷Dagamel tikeb al naŋa waŋ waŋya naŋa kurkurya beleŋ tumŋaŋde keneŋ haŋyen gwahade po, ne Al Urmiŋ gayen wamekeb wawuŋ uŋkureŋde po megeŋ niŋ mar kuruŋ gayen tumŋaŋde nennayiŋ. ²⁸Det kamtiŋ hinayiŋdebe det bidak nen nen nu beleŋ waŋ haŋyen gobe bebakkeŋ wor po geb, goke epte ma kadam mohonde titek gwahade goyen po, ne Al Urmiŋ gayen wamekeb tumŋaŋ neneŋ nalu funaŋbe gago yeŋ bebak tinayiŋ.

²⁹“Kanduk kuruŋ goyen kamere po,

‘Naŋa kidoma hiyyeŋ, irde gagasi ma timiyyeŋ.

Naŋkiŋde mat dinambe suk yeŋ katnayiŋ.

Irdeb det kuruŋ hende haŋ gobe hambor yiryen,’ yitiŋ *Aisaia 13:10; 34:4* gwahade po forok yenayiŋ.

³⁰“Goyenterbe ne Al Urmiŋ wayeŋ timekeb mata kura naŋkiŋde forok yiyyeŋ. Irkeb ne Al Urmiŋ gabe tareŋne turuŋ yaŋ goya kigariŋkiŋ faykek hende kateŋ. Irkeb megeŋ niŋ mar ne niŋ ma nurde haŋ mar tumŋaŋ neneŋbe biŋ misiŋ nurde esinayiŋ. ³¹Miyonŋe yad yermeke beleŋ meheŋ heŋ ne waŋ waŋ niŋ bigul fu irkeb al tumŋaŋ nurnayiŋ. Irde kateŋbe alya bereya naŋa kuruŋ hike kwa bana goŋ niŋ basiŋa yirtiŋ goyen gabu yirnayiŋ.

³²“Fik hebe yeneŋ haŋyen gogo. Fik he go beda urke yeneŋbe kadila heweŋ tiya yeŋ haŋyen. ³³Gwahade goyen po, mere dirhem kuruŋ gayen

forok yeke yenenbe nalu funanbe binde gag po wer ira yey nurnayin.

³⁴Fudinde wor po dinen hime. Mata gobe forok yenayin geb. Irde mata go forok yenayin nalure al hinayin mar gobe mata goyen yennayin.

³⁵Irdeb megenya nanjinyabe hubu hiriryen. Goyenbe merenebe sanjin minyan geb, hubu ma hiyyen. Huginen alya bereya nurde fudinde wor po yey gama irde hinayin,” yinyin.

Nalu funanbe bebakken mon

(Mak 13:32-37; Luk 17:26-30,34-36)

³⁶Irdeb sopte yinyin. “Nalu funan goyen al kura bebakken ma nurde hi. Hubu wor po. Adone po ga nurde hi. Urminya miyonminya wor ma po nurde han. ³⁷Ne Al Urmin gayen wan wan nalurebe alya bereya bikken Noa hinhan nalure mata ten hinhan gwahade ten hinayin. ³⁸Go mar gobe dula nin po ten, kukuwa fe nene, al beken bere yade, dirnen wen yade al yertek nin po ten Al Kurun nin ma nurde hinhan. Irde kun kun nalu forok yekeb Noa hakwa binde hurkurin. ³⁹Mel gobe kame mata gwahade forok yiyyen yey ma nurde hinhan. Irkeb fe ala kurun forok yey gwamun yurin. Ningeb ne Al Urmin gayen wor al beken gwaha nana wayyen yey ma nurde hikeya wayen. ⁴⁰Goyen nalurebe mata gahade forok yiyyen: al iraw kura metenminde meten ten hiriryen. Irke Al Kurun beken unken tenbe kurabe tubul tiyyen. ⁴¹Irde bere irawa palawa irye yey wit bilmin hora po karka ten hikeya bere unkenbe Al Kurun beken tenbe kurab tubul tiyyen. ⁴²Goke tenbe kenkela hen ga hana ko! Doyan Al Kurun ten wan wan nalube bebakken mon geb. ⁴³Be, ga nurde ga hana ko. Ya min al kura wawun kurare kawo al beken wan yane upew uryen yey nurde hiyendebe yamin kenkela doyan irde hika kawo al beken epte ma wan yamin upew uryen. ⁴⁴Ningeb gwahade goyen po, ne Al Urmin gare wor nalu goyare wayen tiya yey ma nurde hikeya wayen geb, huginen ne nin pet ten doyan nirde hinayin,” yinyin.

Meten al iginya bulunyat maya mere

(Luk 12:42-46)

⁴⁵Irdeb maya mere mat gaha yinyin: “Be, ganun meten albe dufaymin wukken, irde gore doyan almin ge fudinde wor po meten ten unen hiyen? Meten al gwahade gobe doyan almin beken nana gisaw kwe yenbe meten almin goyen, ‘Meten mar kadge doyan yirde binde yuntek nalu hekeb yunen hayin,’ inen kuyen. ⁴⁶Be, doyan almin go mulan hen wanbe meten al gore meremin po gama irde meten ten hika kenenbe igin igin irkeb meten al gobe aman wor po hiyyen. ⁴⁷Fudinde wor po dinen hime. Meten al gobe doyan almin beken, ‘Samunne kurun gayen wor doyan irde hayin,’ inyen. ⁴⁸Goyenbe daha wet kura ten meten al goreb, ‘Doyan alnebe nana gisaw po kun ningeb, aranen ma wan hi,’ yenbe ⁴⁹meten

mar kadam alya bereya goyen, ‘Merene ma nurde haɲ,’ yinenɲ gasa yirde dulaɲ po teɲ wain nene kukuwa heɲ haɲyen marya wain nene hinayiɲ.
⁵⁰Irkeb doyaɲ almiɲ go nalu goyenter wayyen yeɲ ma nurde hiyenɲde gor mulgaɲ hiyyenɲ. ⁵¹Irdeb mata buluɲmiɲ gote muruɲgem kuruɲ wor po unyenɲ. Irdeb metenɲ al go tukuɲ kak ala bana esenɲ misiɲ yisenɲ haɲyende gor tukukeb usi marya gor hinayiɲm,” yinyiɲ.

Bere 10 gote maya mere

25 ¹Be, Yesu go sopte maya mere mat saba gahade yiryiɲ: “Nalu funaɲ goyenterbe Al Kuruɲ belen alya bereyamiɲ doyaɲ yird yird goyen kurabe gahade: metenɲ bere foɲenɲ 10 belenɲ, ‘Doyaɲ alniniɲde urmiɲ belenɲ berem teɲ wayyenɲ tiya go,’ yeɲ, ‘Kuɲ belen tupi teɲ waniɲ,’ yeɲ hulsimiɲ yusuɲ yurde kwamiɲ. ²Bere siptesoɲoɲbe dufaymiɲ wukkek moɲ. Munanɲ kurabe dufaymiɲ wukkek. ³Bere siptesoɲoɲ dufaymiɲ wukkek moɲ gobe hulsimiɲbe yawaramiɲ gega, femiɲ pet yeke sopte yunenɲ yunenɲbe kura ma yadeya kwamiɲ. ⁴Munanɲ bere siptesoɲoɲ dufaymiɲ wukkek gobe hulsimiɲ yade femiɲ kame yuntek mananɲ yalinɲ bana goya yade kwamiɲ.

⁵“Be, bere teɲ mulgaɲ heɲ watek al gobe aranɲ ma wakeb bere 10 gobe dukpu yirke tumɲanɲ feramiɲ. ⁶Irke kuɲ wawuɲ binde heke gab al kura gore kuware, ‘Bere tihi albe waɲ hi! Niɲgeb waɲ tupi tinaɲ!’ yiriɲ. ⁷Be, bere 10 gore go nurdeb huwarde hulsimiɲ ommok hinhan goyen sope yirke melak saɲiɲ hamiɲ. ⁸Goyenbe bere dufaymiɲ igiɲ moɲ goreb bere dufaymiɲ wukkenɲ goyen, ‘Hulsininiɲ kamniɲ tahaɲ geb, femiɲ kura dunnaɲ,’ yinamiɲ. ⁹Irkeb, ‘Moɲ geb, fe gabe denɲa nenɲa tumɲanɲde epte ma diryenɲ geb, dindikenɲ kuɲ al hitte damu tinayiɲ,’ yinamiɲ. ¹⁰Irkeb bere siptesoɲoɲ dufaymiɲ wukkek moɲ goyen fe damu niɲ kukeb goyarebe bere tiriɲ al go wayyiɲ. Irkeb bere siptesoɲoɲ gitik teɲ hinhan goyen al go wakeb tupi teɲ yare dula mata kuruɲ tiniɲ tiyamiɲde gor kwamiɲ. Irkeb yamebe tayamiɲ.

¹¹“Be, goyen kamereb bere siptesoɲoɲ hulsire niɲ fe damu tiniɲ yeɲ kwamiɲ go mulgaɲ heɲbe, ‘Doyaɲ al, Doyaɲ al, yame hol irde dunke hurkuniɲ,’ inamiɲ. ¹²Goyenbe al bere tiriɲ gore wol heɲbe, ‘Fudinde wor po dineɲ hime. Denɲbe ma nurde duneɲ hime,’ yinyiɲ. ¹³Be, maya mere dirhem gwahade goyen po ne Al Urmiɲ waɲ waɲ nalu funaɲbe ma nurde haɲ geb, gitik teɲ hinayiɲ,” yinyiɲ.

Al karwoyen siraw mere

(Luk 19:11-27)

¹⁴Irde sopte maya mere mat yinyiɲ. “Be, Al Kuruɲ belen alya bereya doyaɲ yird yird goyen kurabe gahade: al kura naɲa gisaw kwe yeɲbe detne doyaɲ yirde hinayiɲ yeɲ metenɲ marmiɲ hayhay yiryiɲ. ¹⁵Irdeb metenɲ al

un̄kuren̄be hora sipteson̄on̄ unyinj. Kurabe hora irawa, irde kurabe un̄kuren̄ unyinj. Meten̄ mar gobe al gwahade mat iginj meten̄ tinayinj yen̄ nurdeya gab hora goyen yuninj. Irdeb yubul ten̄ kurinj. ¹⁶Meten̄ al hora sipteson̄on̄ tirinj al gobe goyare po tukun̄ meten̄ unen̄be go hende hora sipteson̄on̄ iryinj. ¹⁷Meten̄ al hora irawa tirinj al goyen wor gwahade po, tukun̄ meten̄ unen̄be go hende hora irawa iryinj. ¹⁸Goyenbe meten̄ al hora un̄kuren̄ tirinj al gobe kun̄ mete taldebe doyan̄ almin̄de hora goyen gon̄ bana kiryinj.

¹⁹“Be, doyan̄ al go nāja gisaw kun̄ gon̄ sobamde po hen̄ hen̄ gab wayyinj. Irdeb wan̄ meten̄ marm̄in̄ hora yuninj goyen daha yiram̄in̄ yen̄ gusun̄an̄ yiryinj. ²⁰Irkeb meten̄ al hora sipteson̄on̄ unyinj gobe sopte hora sipteson̄on̄ yawan̄be doyan̄ almin̄ gaha inyinj: ‘Hora sipteson̄on̄ goyen doyan̄ irayinj yen̄ nunen̄ kwarinj geb, gore sopte 5 irmin̄ gago,’ inyinj. ²¹Irkeb doyan̄ almin̄ belēn̄ wol hen̄be, ‘Gebe meten̄ iginj wor po tiyan̄. Gebe meten̄ al iginj, merene nuran̄. Det ug ma gunmirinj gega, ken̄kela doyan̄ yiran̄ nin̄geb, det budam wor gunmeke doyan̄ yirayinj. Irdeb wake tum̄an̄ neya dula ten̄ aman̄ hen̄ hiren̄,’ inyinj.

²²“Be, al hora irawa unyinj al gore wor wan̄be gaha inyinj: ‘Hora irawa doyan̄ irayinj yen̄ nunen̄ kwarinj gobe gore po meten̄ unen̄be hora irawa teban̄ irmin̄ gago,’ inyinj. ²³Irkeb doyan̄ almin̄ belēn̄ wol hen̄be, ‘Gebe meten̄ al iginj, merene po nuran̄. Det ug ma gunmirinj gega, ken̄kela doyan̄ yiran̄. Nin̄geb det budam gunmeke doyan̄ yirayinj. Irdeb wake neya dula ten̄ aman̄ hen̄ hiren̄,’ inyinj.

²⁴“Be, meten̄ al hora un̄kuren̄ unyinj gore wan̄be gaha inyinj: ‘Doyan̄ al, gebe al misin̄en̄ yan̄ wor po nurde gunen̄ himyen. Binge ge ma hartinj goyen yawarde hayen. Irde ge ma tur irtinj wor kun̄ wasen̄ han̄yen. ²⁵Goke ten̄be kafura hen̄ horagebe tukun̄ mete talde gon̄ bana kirmirin̄. Nin̄geb hora gebe gago,’ inyinj. ²⁶Gwaha inkeb doyan̄ almin̄ belēn̄ wol hen̄be, ‘Gebe kumhaka al, meten̄ al bulun̄ wor po. Gebe detne belēn̄ ma hartinj goyen yawarde himyen, irde detne belēn̄ ma tur irtinj goyen wasen̄ himyen yen̄ nurde ha? ²⁷Gebe ne gwahade yen̄ nurdeb horanebe hora yerde han̄yen yare kerarin̄ manhan̄ horane tolok hitin̄de ga temewon̄,’ inen̄be meten̄ mar buda hoyan̄ hoy yirke wakeb, ²⁸‘Hora go goran̄ irde ten̄ meten̄ al hora 10 min̄yan̄ al go unnan̄. ²⁹Al det unke ken̄kela doyan̄ irde iginen̄ kurun̄ forok iryen̄ al gobe teban̄ det yawaryen̄. Irkeb detmin̄ budam wor po henayinj. Mun̄an̄ det unke kumhaka hen̄ iginen̄ ma forok yiryen̄ al gobe yende det mun̄ kura hiyen̄ goyen wor goran̄ irke det min̄mon̄ wor po hiyen̄. ³⁰Nin̄geb meten̄ al bulun̄ gobe tukun̄ sin̄are kidoma bana esen̄ misinj yisen̄ han̄yende gor temeynan̄,’ yinyinj geb,” gwaha yirin̄.

Doyan̄ Al Kurun̄ belēn̄ alya bereya matamde pota yiryen̄

³¹Be, Yesu go sopte gaha yirin̄: “Ne Al Urmin̄ gabe tarēne turnun̄ yan̄ hen̄be miyon̄neya tum̄an̄ kattek. Goyenterbe Doyan̄ Al Kurun̄yen̄

maroro gasun̄de keperen̄. ³²Irkeb al megen niŋ kurun̄ gayen ne hitte po gabu irnayin̄. Irkeb sipsipya memeya yewek belen̄ pota yirde hiyen̄ go gwahade yiren̄. ³³Ne belen̄be sipsip yadeb hanne yase belen̄ mat yerdeb memebe yade tapa belen̄ yeren̄. ³⁴⁻³⁶Irkeb ne Doyan̄ Al Kurun̄ gare al hanne yase belen̄ mat hinayin̄ goyen gaha yinen̄: ‘Ne binḡe nirkeyabe binḡe nunamin̄. Fe niŋ kammekeyab fe nunamin̄. Albak heŋ kuŋ himekeb gargar niram̄in̄. Uliŋhornem moŋ himekeb uliŋhor nunamin̄. Garbam himekeyab doyan̄ nirde faran̄ nurde hinhan. Koyare himekeb waŋ nenen̄ hinhan. Goke ten̄be Nanne belen̄ guram dira. Ningeb Al Kurun̄ belen̄ alya bereyamin̄ doyan̄ yird yird bana goŋ hurkun̄ hurkun̄ gobe tikula kiriyin̄ya deŋ gake gitik irtin̄ hiyen̄ geb waŋ tenan̄,’ yinen̄. ³⁷Gwaha yinkeb Al Kurun̄ diliŋde al huwak goreb, ‘Daha naŋa binḡe kamke genen̄ binḡe guntirin̄? Irde daha naŋabe fe niŋ kamke genen̄ fe guntirin̄? ³⁸Daha naŋa albak heŋ kuŋ hike gargar girtirin̄? Irde daha naŋa uliŋhorgem moŋ hike genen̄be uliŋhor guntirin̄? ³⁹Daha naŋa garbam heke doyan̄ girde faran̄ gurtirin̄? Irde daha naŋa koyare hike kuŋ gintirin̄?’ ninnayin̄. ⁴⁰Irkeb ne Doyan̄ Al Kurun̄ gare wol heŋbe gaha yinen̄: ‘Fudinde wor po dinen̄ hime. Nere al deŋem moŋ gayen kura gwaha iramin̄ kenen̄be ne gayen niram̄in̄,’ gwaha yinen̄. ⁴¹⁻⁴³Irdeb tapa belen̄ mat hinayin̄ mar gobe gaha yinen̄: ‘Deŋbe binḡe nirkeb binḡe kura ma nunamin̄. Irde fe niŋ kammeke fe kura ma nunamin̄. Albak heŋ kuŋ himeke gargar ma niram̄in̄. Uliŋhornem moŋ himekeb kura ma nunamin̄. Garbam himekeb faran̄ ma nuramin̄. Irde koyare himekeya wor waŋ ma nenen̄ hinhan. Goke ten̄be deŋbe Al Kurun̄yen bearar bana haŋ. Ningeb nubul ten̄ kuŋ kak ala Satanya miyon̄min̄ya niŋ gitik irtin̄ bana goŋ kunaŋ,’ yinen̄. ⁴⁴Gwaha yinmekeb al buda gore wol heŋbe, ‘Doyan̄ Al Kurun̄, daha naŋa binḡeya feya niŋ kamke genen̄ wasak titirin̄? Irde daha naŋa uliŋhorgem moŋ hike kura ma guntirin̄? Irde daha naŋa garbam heke doyan̄ ma girdeb faran̄ ma gurtirin̄? Irde daha naŋa albak genen̄ gargar ma girtirin̄? Irde daha naŋa koyare hike go ma kuŋ gintirin̄?’ ninayin̄. ⁴⁵Irkeb ne Doyan̄ Al Kurun̄ gare wol heŋbe gaha yinen̄: ‘Fudinde wor po dinen̄ hime. Nere al deŋem moŋ gayen kura gwaha ma iramin̄ kenen̄be ne gayen faran̄ ma nuramin̄,’ gwaha yinen̄. ⁴⁶Mel gobe mata bulun̄min̄ gote murun̄gem hugiŋen̄ kanduk kurun̄ ten̄ hinayin̄. Munan̄ Al Kurun̄ diliŋde al huwak gobe Al Kurun̄ya hugiŋen̄ hinayin̄,” yinyin̄.

Yesu mayniŋ yeŋ mere sege iramin̄
(Mak 14:1-2; Luk 22:1-2; Yon 11:45-53)

26 ¹Be, Yesu gob sabamin̄ kurun̄ goyen pasi irdeb tigiri ten̄ komatmin̄ yago gaha yinyin̄; ²“Pasoba dula nalu kurun̄ gobe molye go yeŋ nurde haŋ gogo. Go nalurebe ne Al Urmin̄ gayen

kuruse hende mununen mununen niŋ asogo haniŋde nernayiŋ,”^r yiriŋ.

³Be, goyenterbe pris buda gote karkuwaŋmiŋya Yuda marte doyaŋ mar parguwak yagoya beleŋ pris buda gote kurunŋmiŋ Kaiafasyen yare gabu iramiŋ. ⁴Irdeb daha mat kura Yesu go usi irde teŋ mayteke kamyen yeŋ mere sege iramiŋ. ⁵Goyenbe yingenŋ mere maydeb, “Dula nalu kurun gayenter ma gwaha titek. Moŋgo goke igiŋ ma nurde al beleŋ fuleŋa dirnayiŋ geb,” yamiŋ.

Bere kura beleŋ det fimiŋ hamiŋen igiŋ wor po goyen Yesu tonanŋde wok iryiŋ

(Mak 14:3-9; Yon 12:1-8)

⁶Be, Yesu go komatmiŋ yagoya Betani taunde Saimonyen yare hinhan. Saimonbe bikkeŋ busuka mananŋ hinhin. ⁷Be, Yesu go keperde hikeyab bere kura gore det fimiŋ hamiŋen igiŋ wor po alabasta hora beleŋ po irtiŋ yaliŋ kusamuŋ goyen bana hitiŋ go tawaŋ tonanŋde wok iryiŋ.

⁸Det fimiŋ damum hende wor po goyen bere gore Yesu tonanŋde wok irke keneŋbe komatmiŋ yago beleŋbe biŋ ar hende daniŋ buluŋ ira yeŋ gusuŋaŋ hamiŋ. ⁹“Go tukuŋ al yunke manhan hora kurunŋde po damu tike hora go teŋ al buniŋen faraŋ yurwoŋ,” inamiŋ.

¹⁰Be, Yesu go mere teŋ hinhan goyen nurdeb, “Deŋbe daniŋ bere go tagal unenŋ buluŋ irhaŋ? Yeŋbe mata igiŋ wor po nira. ¹¹Al buniŋenbe deŋya hugiŋen hinayiŋ. Goyenbe nebe deŋya hugiŋen ma hitek. ¹²Bere gare det fimiŋ ulner wok ira gabe ne kammeke mete nirnayiŋ goke gitik nira. ¹³Niŋgeb fudinde wor po diniŋ hime. Kame al beleŋ ne niŋ naŋa kurun ga tagalde tukuŋ heŋyabe bere gare mata tiya gake wor tagalde hinayiŋ, irde matamiŋ goke dufay heŋ hinayiŋ,” yinyiŋ.

Yudas Iskariot beleŋ Yesu asogo haniŋde kiryiŋ

(Mak 14:10-11; Luk 22:3-6)

¹⁴Be, Yesu komatmiŋ 12 bana goyen al deŋem Yudas Iskariot inen haŋyen gore pris buda gote karkuwaŋmiŋ hitte kuriŋ. ¹⁵Kuŋbe, “Yesu hantiŋde kermekeb murunŋembe dahade nunnayiŋ?” yinyiŋ. Irkeb silwa hora kapyan heke kuŋ 30 hekeb unamiŋ. ¹⁶Go kamereb Yudas go Yesu goyen daha mat kura asogom haniŋde kereŋ yeŋ beleŋ niŋ naŋkeneŋ hinhin.

^r **26:2** Bikkeŋ Israel mar Isip naŋa tubul teŋ Kenan kuniŋ tiyamiŋyabe Al Kurun beleŋ sipsip al diriŋ diriŋen gasa yirde darim yade yame kantayan sam yirnayiŋ yinyiŋ. Munan al kura gwaha ma tiyamiŋ marbe Al Kurunyen miyon beleŋ waŋbe mel gote urmiŋ mataliŋya dapŋamiŋ mataliŋya goyen tumŋan gasa yirke kamamiŋ. Gega meremiŋ gama iramiŋ marbe miyonmiŋ beleŋ yubul tiyamiŋ goke dufay heŋ heŋ ge dula mata teŋ hinhan.

Dula funaŋ*(Mak 14:12-21; Luk 22:7-13,21-23; Yon 13:21-30)*

¹⁷Be, Yesuyen komatmiŋ go haŋka wawuŋbe beret yis miŋmoŋ nen nen nalu hewerŋ tiya yerŋbe Yesu gusuŋaŋ iramiŋ. “Damde kuŋbe Pasoba biŋge gitik irde netek yerŋ nurde ha?” inamiŋ. ¹⁸Irkeb Yesu belem wol heŋbe, “Yerusalem taun bana kuŋbe al kura gor keneŋbe gaha inayiŋ. ‘Tisa belembe, ‘Nalunebe binde hihi. Niŋgeb neya komatneyabe gere yare Pasoba biŋge netek,” yihi,’ gwaha innayiŋ,” yinyiŋ. ¹⁹Irkeb komatmiŋ yago goyen Yesu yinyiŋ go po gama irde kuŋbe Pasoba biŋge nen nen gitik tiyamiŋ.

²⁰Be, wawuŋbana wor po hekeb Yesuya komatmiŋ 12 goya Pasoba biŋge niniŋ yerŋ keperamiŋ. ²¹Biŋge nene heŋyabe Yesu belembe, “Fudinde wor po dinerŋ hime. Deŋ gayen kuratiŋ kura belem asogoner haniŋde niryerŋ,” yinyiŋ. ²²Irkeb komatmiŋ yago gobe kandukŋerŋ wor po nuramiŋ. Irdeb kura kame yuŋkurenŋ yuŋkurenŋ, “Doyaŋ Al Kurunŋ, ne niŋ wet yerŋ ha?” yerŋ gusuŋaŋ iramiŋ. ²³Irkeb wol heŋbe, “Al kura neya tumŋaŋ haniŋ teŋ fe koronŋ bana kera gore asogo haniŋde niryerŋ. ²⁴Ne Al Urmiŋ gabe Al Kurunŋyen mere basaŋ mar belem bikkeŋ asaŋde kayamiŋ goyen po gama irde kameŋ. Goyenbe al kura asogoner haniŋde niryerŋ al goke buninerŋ wor po nurde unerŋ hime. Al go kawaŋ ma hirinŋ manhan kanduk buluŋ goyen go ma kenwonŋ,” yinyiŋ. ²⁵Irkeb Yesu asogomiŋ haniŋde kertek al Yudas belem, “Tisa, ne niŋ daw yerŋ ha?” inyiŋ. Irkeb wol heŋbe, “Gwaha, gobe ge po geb,” inyiŋ.

Yesu belem beretya wainya komatmiŋ yunyiŋ*(Mak 14:22-26; Luk 22:14-20; 1Ko 11:23-25)*

²⁶Be, biŋge nene heŋyabe Yesu belem beret teŋbe Naniŋ turuŋ irdeb ubala teŋbe, “Beret dunhem gahade gayen po nebe deŋ ge teŋ kameŋ. Niŋgeb goke teŋbe beret gabe gasoŋne geb, teŋ nenaŋ,” yinyiŋ. ²⁷Irdeb wain fimiŋ gisu bana hitiŋ go teŋbe sopte Al Kurunŋ turuŋ irde, “Deŋ tumŋaŋ ga teŋ nenaŋ. ²⁸Al megen haŋ kurunŋ gote mata buluŋ halde yunerŋ yunerŋ niŋ teŋ Al Kurunŋ belem biŋa tiyyiŋ goke teŋ darine wok irde kameŋ. Niŋgeb wain ga teŋ nenaŋ. ²⁹Fudinde dinerŋ hime. Wain fimiŋ gayen tebaŋ ma newerŋ. Kuŋ kuŋ Nanne belem alya bereyamiŋ doyaŋ yiryenŋya goyenter gab denŋa tumŋaŋ wain fimiŋ gergerŋ sopte netek,” yinyiŋ.

³⁰Be, go kamereb Yesuya komatmiŋ yagoya goyen tikiŋ heŋbe Olip doŋdoŋde hurkamiŋ.

Pita helwanŋ hiyyerŋ goke tagalyiŋ*(Mak 14:27-31; Luk 22:31-34; Yon 13:36-38)*

³¹Be, hurkuŋ gor heŋbe Yesu belem gaha yinyiŋ: “Haŋka wawuŋbe ne mununniŋ yerŋ fere nirkeb deŋbe tumŋaŋ nubil teŋ busaharnayiŋ. Mata goke Al Kurunŋyen asaŋde gahade katiŋ hi:

‘Sipsip doyanj al maymeke sipsipminjbe burgagaw kernayinj,’ yitiņ.

Sekaraia 13:7

³²Goyenbe kame sopte huwardebe ne wa meheņ heņ Galili naņare kweņ,” yinyiņ. ³³Irkeb Pita beleņbe, “Al hoyanbe tumņan gubul tinayinj. Goyenbe nebe epte ma wor po gubul tiyeņ,” inyiņ. ³⁴Irkeb Yesu beleņ wol heņbe, “Fudinde wor po gineņ hime. Haņka wawuņbe tatirok ma mere tikeyabe ge beleņ wawuņ karwore ne niņ yeņ, ‘Al gobe go ma nurde uneņ hime,’ yawayiņ geb,” inyiņ. ³⁵Goyenpoga Pita beleņbe, “Nebe al beleņ mununnayinj gega, ge niņ yeņ, ‘Yeņ ma nurd unhem,’ ma wor po yeweņ,” inyiņ. Irkeb kadom yago manaj tumņan gwaha ala inamiņ.

Yesu Getsemani heņ Al Kuruņ mere iryiņ

(Mak 14:32-42; Luk 22:39-46)

³⁶Be, gor mat kuņ naņa deņe Getsemani gor forok yeņbe komatmiņ yago, “Gar keperde doyanj nirde hike neb irar ira kuņ Al Kuruņ mere ireņ,” yinyiņ. ³⁷Irdeb Pitaya Sebedi urmiņ waraņ Yonya Yemsya yadeb gasuņ hoyande kwamiņ. Goyareb Yesube dufaymiņya biņyabe kanduk wor po hiriņ. ³⁸Irdeb mel karwo go yinyiņ. “Kanduk kuruņ wor po mununke kamtek nurhem geb, neya gar heņbe Al Kuruņ mere irdeya ga hinayinj!” yinyiņ. ³⁹Gwaha yineņbe gor mat muņ kura siņgir teņ kuņbe biņ tadam mat wulgurut yeņbe, “Ado, igiņ kenem kanduk kuruņ gayen teņ siņa irayinj. Goyenbe nere dufay ma gama irayinj. Gere dufay po gama irayinj,” inyiņ. ⁴⁰Gwaha teņbe mulgaņ heņ kuņbe komatmiņ karwo gob firtiņ yinyiņ. Irdeb Pita isaņ heņbe, “Mel, deņbe neya muņ kura hitneņ teņ Al Kuruņ mere irde ga ma fernayinj?” yinyiņ. ⁴¹Irdeb, “Ferde ma Al Kuruņ mere irde hinayinj. Gogab uņgura waņ tuņaņ durkeb epte ma katnayinj. Tontiņbe Al Kuruņ mere ird ird niņ wilakneņ nurde haņ. Gega ultiņbe piņeņ heņ haņ,” yinyiņ. ⁴²Irdeb sopte yubul teņ kuņ Al Kuruņ mere irdeb, “Ado, kanduk ga ne beleņ ma teweņbe kanduk gayen pasi irtek beleņ miņmoņ hiyeņ kenem nebe dufayge po gama irdeb teweņ,” yiriņ.

⁴³Be, Al Kuruņ mere irde pasi heņbe sopte mulgaņ heņ kuņ komatmiņ karwo gob diliņ kanduk hekeb firtiņde hike yinyiņ. ⁴⁴Yeneņbe yubul teņ sopte mulgaņ heņ kuņbe Al Kuruņ mere iryiņ gwahade po sopte mere iryiņ.

⁴⁵Be, mulgaņ heņ kuņbe komatmiņ yago goyen, “Deņbe usaņ heņ firtiņde po haņ? Ga kennan! Ne Al Urmiņ gayen mata buluņ mar haniņde nerd nerd nalu gobe bikkeņ gago forok yihi. ⁴⁶Huwarke kuniņ! Asogo haniņde nertek albe bikkeņ gago waya geb,” yinyiņ.

Yesu teņ fere tiyamiņ

(Mak 14:43-50; Luk 22:47-53; Yon 18:3-12)

⁴⁷Be, Yesu gobe gwaha yeņ hikeyabe komatmiņ kura Yudas gobe al yade wayamiņ. Al buda gobe fuleņare niņ bidilaya nukwaya yade

wayamiñ. Mel gobe pris buda gote karkuwañminya Yuda marte doyañ mar parguwakya beləñ yad yerke wayamiñ. ⁴⁸Yesu go asogom haniñde kertek al goreb tetek mar go gaha yinyiñ: “Kuñ forok yeñbe mata kura tiyeñ geb. Al kura amanñ amanñ irde ulunđe u irmeke keneñbe al gobe gog po yeñbe kuñ tenayiñ,” yinyiñ. ⁴⁹Be, Yudas go bikkeñ mere gwahade yinyiñde geb, kuñ forok yeñ Yesu hitte kuñbe, “Wawuñ, Tisa,” inenbe ulunđe u iryiñ. ⁵⁰Irkeb Yesu beləñ wol heñbe, “Kadne, gwaha tiye yeñ wayha go gwaha tiya,” inyiñ. Irkeb al wayamiñ mar goreb wañ teñ fere tiyamiñ. ⁵¹Irkeb Yesu komatmiñ kura yeñ binde hinhin goreb fuleñare niñ bidilamiñ marde pris buda gote kurunmiñde meten almiñ kura kirmin sapa iryiñ. ⁵²Irkeb Yesu beləñ, “Bidilage go gasuñenđe kera! Al kura bidila beləñ al gasa yiryen gob haniñ wol hekeb gwaha mat po mayke kamyen. ⁵³Adone gusuñan irmekeb goyare po miyoñmiñ budam wor po yad yerke katen faran nurnayiñ gobe ma nurde ha? ⁵⁴Goyenbe mata gwahade tiyeñbe Al Kurunyen asanđe mata gwahade gwahade forok yiyyen yitiñ goyen daha mat forok yiyyen? Epte moñ,” inyiñ.

⁵⁵Gwaha inenbe Yesu go yeñ teñ fere titek mar goyen, “Ne gayen kawə mar yad kuñ hime geb, gago fuleñare niñ bidilaya nukwaya manan wañ nawarniñ teñ han? Nebe nankahalmiñ nankahalmiñ Al Kurunyen ya bana saba tagalde himekeyabe ma nade hanjen. ⁵⁶Goyenbe Al Kurunyen asanđe mere basan marmiñ beləñ kame mata gwahade forok yiyyen yeñ kayamiñ goyen deñ beləñ gago teñ han,” yinyiñ. Be, komatmiñ yagobe tumñan Yesu tubul teñ busaharamiñ.

Yesu pris buda gote kurunmiñ diliñ mar huwaryiñ
(*Mak 14:53-65; Luk 22:54-55,63-71; Yon 18:13-14,19-24*)

⁵⁷Be, Yesube pris buda gote kurunmiñ Kaiafas hitte tukamiñ. Gorbe Moseyen saba marya Yuda marte doyañ mar parguwak yagoya gabu iramiñ. ⁵⁸Be, Pita go mel gore Yesu teñ kuñ hikeya gisaw yarham po heñ gama irde kuriñ. Kuñ kuñbe pris buda gote kurunmiñ Kaiafasyen ya koya beləñ po milgu irtiñ bana goñ al gabu irde hanjen sawsaware hurkuriñ. Hurkuñbe daha kura tike keneñ yeñ ya go doyañ irde hanjen mar keperde hinhande gor kuñ kipiryiñ.

⁵⁹Be, pris buda gote karkuwañminya Yuda marte doyañ marya goyen tumñan gabu irde da misiñde wor po Yesu go mayteke kamyen yeñ mere sege iramiñ. Goyenbe miñ kura ma keneñbe goke nankenamiñ. ⁶⁰Irkeb al budam wañ Yesu tagal unen unen niñ usi mere budam yad forok yiramiñ. Gega Yesu maytek meremiñ igiñ kura ma kenamiñ. Irkeb kuñ kuñ funan al irawa kura wañbe, ⁶¹“Al gareb, ‘Al Kurunyen ya balem goyen upew urde sopte gergen irde nanə fay karwore pasi ireñ,’ yeke nuraruñ,” yaryum.

⁶²Be, pris buda gote kurunmiñ Kaiafas beləñ huwardeb Yesu goyen, “Mere kurun ulger irhar gabe wol ma hawayiñ?” inyiñ. ⁶³Goyenbe Yesu go meremiñ ma

wol hej balminj po hinhin. Irkeb sopte, “Ne belej Al Kuruj gwahader hitinj gote sanjinde ginhem geb, gebe Mesaia Al Kuruj Urminj ma dahade goyen momon dira,” iniyin. ⁶⁴Gwaha inkeb Yesu belej wol hejbe, “Dindiken gog po yahan. Goyenbe ne belejbe denj kuruj gayen gaha dinen. Kame ne Al Urminj gabe Al Kuruj sanjin minyan Al gote haniy yase belej mat keperde nanjkinde gagap hende katenj himeke nennayin,” yinyin. ⁶⁵Irkeb pris buda gote kurujminj gore mere goyen nurdeb, “Al gabe Al Kuruj sukal ira,” yenj bin ar yeke ulinhorminj erek irdeb, “Ningeb daniy mere hoyan nin nanjentek? Al Kuruj sukal ira gobe denj tumjanj nurhanj gago. ⁶⁶Ningeb denjbe dahade nurde hanj?” yinenj gusujanj yiriyin. Irkeb wol hejbe, “Kamyen po!” inaminj. ⁶⁷Irdeb al gor hinhan goreb Yesu kiminde meyanj iraminj. ⁶⁸Irdeb kiminj mala tenjbe haniy mupi irde mayaminj. Kura belejbe palasi irdeb, “Mesaia, ganuj belej muguna? Momon dira!” inaminj.

Pita belej Yesu ninj helwanj hirinj

(Mak 14:66-72; Luk 22:56-62; Yon 18:15-18,25-27)

⁶⁹Be, goyarebe Pita go ya go bin bana sawsaware gor keperde hinhin. Irkeb metenj bere kura gore wanjbe, “Ge mananj Yesu Galili ninj al goya kunj hinaryum,” iniyin. ⁷⁰Irkeb Pita belejbe al tumjanj gor hinhan gote dilinj mar helwanj hejbe, “Neb goke kura yenj ha yenj ma nurde hime,” iniyin. ⁷¹Irdeb gasuj hinhin go tubul tenjbe kunj yamere huwarde hikeb bere kura gore wanj kenenjbe al buda gor hinhan goyen, “Al gabe Nasaret ninj al Yesuya kunj haryen,” yirinj. ⁷²Irkeb Pita gore tebanj po helwanj hejbe, “Fudinde wor po, nebe al gobe ma nurde unenj hime,” yirinj.

⁷³Be, hitjenj munj kura tenjbe al gor hinhan goreb Pita goyen, “Mere tike melakge nurhet gobe Yesu gama irde hanjen mar al kurabe ge gago yenj nurhet,” inaminj. ⁷⁴Irkeb Pita belejbe mere fudinde po tihim yenj binj tenjbe, “Fudinde wor po dinen hime. Neb al goke yenj hanj yenj ma nurde hime,” yinyin. Irkeb goyare po tatirok mere tiyyin. ⁷⁵Irkeb Pita go Yesu belej, “Tatirok ma mere tikeyabe ne ninj yenj wawuj karwore, ‘Al gob ma nurde unenj hime,’ yawayin,” iniyin goke binj bak yirinj. Irkeb sinjare katenj kunj mata tiyyin goke binj misinj wor po nurdeb esirinj.

Yesu go Pailat hitte tenj kwaminj

(Mak 15:1; Luk 23:1-2; Yon 18:28-32)

27 ¹Be, wampot munj wor pobe pris buda gote karkuwanjinjya Yuda marte doyanj mar parguwakya belej mere maydeb, “Yesube mayteke kamyen,” yaminj. ²Irdeb haniy fere tenjbe Pailat hitte tukaminj. Pailatbe Roma gabman al Yudia nanj doyanj irde hiyen.

Yudas kamyinj

(Apo 1:18-19)

³Be, asogo haniyde kiriyin al Yudasbe Yesu go merem yanj irde mayke kamtek heke kenenjbe mata buluj tiyyin goke buniyenj nuryin. Irdeb

silwa hora 30 damu iramiŋ goyen pris buda gote karkuwaŋminya Yuda marte doyaŋ mar parguwakya hitte yumulgaŋ tiyyiŋ. ⁴“Mata buluŋ miŋmoŋ al goyen kami yeŋ hantiŋde kirmiŋ. Ningeb mata buluŋ timiŋ,” yinyiŋ. Irkeb wol heŋbe, “Gobe nende samuŋ moŋ be. Gere kanduk geb,” inamiŋ. ⁵Gwaha inkeb biŋ ar yekeb hora go Al Kurunyen ya balem bana goŋ yemeyde kuriŋ. Kuŋbe beŋe teŋ kamiŋ.

⁶Be, hora yimiyyiŋ gobe pris buda gote karkuwaŋmiŋ beleŋ pilgaŋ heŋbe, “Hora gabe al kami yeŋ damu titiŋ. Moseyen sabarebe hora gahade gayen epte ma Al Kuruŋ niŋ unnayiŋ yitiŋ. ⁷Ningeb hora ga yade naŋa hoyanŋde niŋ mar Yerusalem waŋ kamke mete teŋ hitek yeŋ kuwe ird ird alyen megeŋ goyen damu titek,” yeŋ mere sege iramiŋ. ⁸Goke teŋbe naŋa tapum gobe “Al Kamtiŋde” inamiŋ. Gayenter wor gwahade po ineŋ haŋ. ⁹Ningeb Al Kurunyen mere basaŋ al Yeremaia beleŋ mere kayyiŋ gobe gwaha mat igineŋ kawan hiriŋ. Merebe gahade:

“Israel marbe yeŋ mayteke kami yeŋbe silwa hora 30 gore al damu tiyamiŋ.

¹⁰Irde Doyaŋ Al Kuruŋ beleŋ gwaha gwaha tiyayiŋ ninyiŋ gwahade po,

mel gobe hora go teŋbe kuwe ird ird alyen megeŋ damu tiyamiŋ,”
yitiŋ hi.

Sekaraia 11:12-13; Yeremaia 32:6-9

Gebe Yuda marte doyaŋ al kuruŋ we?

(Mak 15:2-5; Luk 23:3-5; Yon 18:33-38)

¹¹Be, mel go goŋ gwaha teŋ hikeyabe Yesu gobe Roma gabman al Yudia naŋa doyaŋ irde hiyen al Pailat diliŋ mar huwariŋ. Irkeb, “Ge gayenbe Yuda marte doyaŋ al kuruŋ we?” inyiŋ. Irkeb, “Gwaha, gigeŋ yaha gog po,” inyiŋ.

¹²Be, pris buda gote karkuwaŋminya Yuda marte doyaŋ mar parguwakya beleŋ tagal unamiŋ. Gega Yesube meremiŋ wol ma hiriŋ.

¹³Irkeb Pailat beleŋ, “Mel gare minge girde tagal guneŋ haŋ gabe kura ma wol hawayiŋ?” inyiŋ. ¹⁴Goyenpoga Yesu beleŋ mel gote mere go muŋ kura ma po wol hiriŋ. Irkeb Pailat beleŋ go keneŋbe diliŋ fot yiriŋ.

Pailat beleŋ Yesu tubul timeke kwi yiriŋ

(Mak 15:6-15; Luk 23:13-25; Yon 18:39–19:16)

¹⁵Be, goyenterbe damam damam Pasoba dula nalurebe Pailat beleŋ koyare hinhan mar goyen al kura teŋ siŋa irde hiyen. Al gobe Yuda mar beleŋ al gwahade inke gab gwaha teŋ hiyen. ¹⁶Be, goyenterbe al buluŋ wor po yeŋ nurd uneŋ hanŋen al Barabas goyen koyare hinhin.

¹⁷⁻¹⁸Be, Pailatbe yingeŋ dufaymiŋdeb, ‘Yuda marte doyaŋ mar gabe al budam Yesu gayen gama irde hike yeneŋbe daniŋ neŋ gwahade moŋ yeŋ nurdeb yeŋ ge igiŋ ma nurde mayke kami yeŋ gago tawayhaŋ,’ yeŋ

nuryiŋ. Ningeb al buda kurun goyen gabu irkeb, “Al damiŋ tubul timeke kuyen? Barabas ma Mesaia inen haŋ Yesu gayen?” yen gusunŋan yiryiŋ.

¹⁹Be, Pailat go mere nurd nurd gasunde keperde hikeyabe berem beleŋ mere gahade asande kaŋ teŋ kerke wayyiŋ: “Al go daha wet kura ire ire ma tiyayiŋ. Yenbe merem moŋ. Haŋka mite tihim. Ningeb bener ga yen ge kandukŋen wor po nurde hime. Tubul po tiyayiŋ,” inyiŋ. ²⁰Goyenbe pris buda gote karkuwanŋmiŋya Yuda marte doyaŋ mar parguwakya beleŋ al buda kurun gabu iramiŋ goyen hakot biŋ yawaramiŋ. Irde, “‘Barabas tubul tike kwi. Munan Yesube mayke kami,’ innayiŋ,” yinamiŋ.

²¹Be, Pailat beleŋ al buda go, “Al irawa gayen ganunbe tubul timeke kuyen?” yinen gusunŋan yiryiŋ. Irkeb, “Barabas,” yamiŋ. ²²Irkeb wol heŋbe, “Ningeb Mesaia inen haŋ al gab daha ireŋ?” yinyiŋ. Irkeb al buda kurun goreb, “Kuruse hende mayke kami!” yamiŋ. ²³Irkeb Pailat beleŋ, “Daniŋ? Al gabe da mata bulun kura tiyuŋ?” yinyiŋ. Gega uguŋ po, “Kuruse hende mayke kami ko!” yamiŋ.

²⁴Be, Pailat go gwaha kura titek ma hiriŋ. Irde al buda kurun go fuleŋa forok irniŋ tike yenenbe fe teŋ mel gote diliŋ mar haniŋ halyiŋ. Irdeb, “Al ga kamenŋ tiya gabe neya neya moŋ. Gabe dende samun po geb,” yinyiŋ. ²⁵Irkeb, “Igiŋ, yen kamyen gote merembe nenya diriŋniniŋ yago kame forok yenayiŋ gore tetek,” inamiŋ. ²⁶Irkeb Barabas go mel gote mere nurdeb tubul tike kuriŋ. Goyenbe Yesu go usulak teŋ kuruse hende maynan yenbe fuleŋa marminŋ haniŋde tubul tiyyiŋ.

Fuleŋa mar beleŋ Yesu giwgiw iramiŋ

(Mak 15:16-20; Yon 19:2-3)

²⁷Be, Roma gabmanyen fuleŋa mar go Yesu teŋ Pailatyen ya kurun bana goŋ tukamiŋ. Irdeb fuleŋa mar kadom goya tumŋan Yesu milgu iramiŋ. ²⁸Irdeb uliŋhormiŋ tumŋan yugu teŋ gab doyaŋ marte uliŋhor bukkeŋ yara goyen kerd unamiŋ. ²⁹Irdeb kaŋ hirwanen yaŋ goyen bili bili irde doyaŋ al kurunyen tonan umŋa irhet usi teŋ tonande keramiŋ. Irde doyaŋ alyen kutum kura teŋ haniŋ yase beleŋ kerde fuleŋa mar gore Yesu diliŋde waŋ dokolhonŋ yugulun teŋbe, “Fudinde wor po, Yuda marte doyaŋ al kurun,” inen giwgiw irdeb bak mayde iramiŋ. ³⁰Irde meyan irde kutum tanarde hinhin goyen po goran irde tonande mayde teban irde hinhan. ³¹Gwaha irde giwgiw irdeb uliŋhor bukkeŋ yara go tugu teŋbe yende uliŋhor wor po goyen yerde unamiŋ. Irdeb tukun kuruse hende maytek yen teŋ kwamiŋ.

Kuruse hende mayke kamyiŋ

(Mak 15:21-32; Luk 23:26-43; Yon 19:17-27)

³²Be, beleŋyan hako kun heŋyabe al kura Sairini taunde niŋ al denem Saimon kenenbe Yesuyen kuruse tawa inen pakku irke tiriŋ. ³³Be, kun

kuŋ naŋa deŋe kura Golgota gor forok yamiŋ. Golgota gote miŋbe “al tonan kininiŋde”. ³⁴Gorbe wainya he fimiŋ urekya suluk irtin goyen unke ninam uryiŋ gega, nen nen niŋ bada hiriŋ. ³⁵Yesu go kuruse hende kerde hikeb uliŋ umŋamiŋ ganuŋ beleŋ yawaryeŋ yeŋ yende matare tiliŋ tanardeb pota yiramiŋ. ³⁶Gwaha teŋbe daha kura tike kentek yeŋ keperde keneŋ hinhan. ³⁷Irde da misiŋde Yesu mayamiŋ goyen he parwek hende katiŋ goyen kuruse tonan beleŋ keramiŋ. Merebe gahade:

AL GABE YESU. YUDA MARTE DOYAN AL KURUŋ

³⁸Be, kawe al irawa kura goyen wor kuruse hende yeramiŋ. Kurabe Yesuyen kuruse yase beleŋ mat, munan kurabe tapa beleŋ mat keramiŋ. ³⁹Al kuŋ waŋ teŋ keneŋbe biriŋ biriŋ teŋ giwgiw irdeb, ⁴⁰“Ge gayen Al Kurunyen ya balem upew urde sopte gergeŋ irde naŋa fay karworeb pasi ireŋ yawaŋ al gobe ge gago? Irde geb Al Kurun Urmiŋ keneŋbe tarenger kuruse hende mat kata,” inamiŋ. ⁴¹Irde pris buda gote karkuwanminya Moseyen saba marya Yuda marte doyan mar parguwakya beleŋ wor gwahade po ineŋ ayaŋ keramiŋ. ⁴²“Al gabe al hoyanbe faran yurde hinhin gega, yingenbe epte ma faran uryeŋ. Yeŋbe Israel marte doyan al kurun go. Kuruse hende mat katke keneŋ gabe dufayniniŋ yeŋ ge sanj irniŋ be!” ⁴³Yeŋbe Al Kurun niŋ hekkeŋ nurde hiyen, irde ‘Neb Al Kurun Urmiŋ,’ yeŋ hiyen geb, tubul tike Al Kurun beleŋ faran ureŋbe faran uri,” inamiŋ. ⁴⁴Irkeb kawe al irawa kuruse hende hinaryum go wor gwahade po sukal iraryum.

Yesu kamiŋ

(Mak 15:33-41; Luk 23:44-49; Yon 19:28-30)

⁴⁵Be, naŋa baŋkahal wor po hekeyabe naŋa bana kurun gob tumnan kidoma beleŋ aw urtiŋde hike kuŋ kuŋbe wawunbana 3 kilok heweŋ tiyyiŋ. ⁴⁶Be, 3 kilok binde hekeb Yesu go ug po, “Eloi, Eloi, lama sabaktani!” yiriŋ. Mere gote miŋbe, “Al Kurunne, Al Kurunne, daniŋ nubil taha!”

⁴⁷Be, mere go al kura gor huwarde hinhan gore nurdeb, “Elaia deŋe urde hi,” yamiŋ. ⁴⁸Irdeb araŋ po al kura kup yeŋ kuŋ amil erek irde wain fimiŋ mukkuweŋ bana goŋ kerke uliŋ hekeb teŋ kutum ulyande giti irdeb Yesu unyiŋ. ⁴⁹Goyenbe al hoyan goreb, “Elaia wet waŋ faran urke kentek geb, tubul tike gwaha kura tiya yeŋ kinniŋ,” yamiŋ.

⁵⁰Be, sopte po Yesu go uguŋ po mere teŋbe biŋ sul yiriŋ. ⁵¹Goya goyenbe Al Kurunyen ya balem bana amil gasuŋ himam wor po diba irtiŋ hinhin goyen kahalte po hem beleŋ mat erek yeŋ bam beleŋ katiŋ. Megen manan diririt yeŋ hora karkuwan karkuwanbe gilgalan iramiŋ. ⁵²Al hakwam yirtiŋ bema goyen hol yeŋ tukamiŋ. Irkeb Al Kurun diliŋde al wukkeŋ heŋ kamamiŋ goyen budam sopte huwaramiŋ. ⁵³Irde bema sijare kateŋbe kame Yesu sopte huwariŋ nalureb Yerusalem taun kurunde kuŋ al budam hitte forok yeke yenamiŋ.

⁵⁴Be, Roma gabmanyen fuleŋa marte doyaŋ alya fuleŋa marminya Yesu doyaŋ irde hinhan goyen niniŋaya mata gor forok yiriŋ kurun go keneŋ kafura heŋbe, “Fudinde wor po, yeŋbe Al Kurun Urmin,” yamin.

⁵⁵Bere budam Galili nanare mat Yesu gama irde faraŋ urde kun hanŋyen goyen wor gor heŋ gisaw mat keneŋ hinhan. ⁵⁶Bere goyen kurabe Makdala niŋ Maria, Yemsya Yosepyat miliŋ Maria, irde Sebedi urmin waraŋ Yemsya Yonyat miliŋ.

Yesu mete tiyamin

(Mak 15:42-47; Luk 23:50-55; Yon 19:38-42)

⁵⁷Be, Yesu kamyin goyen kun wawunbana wor po hewen tikeb Arimatea taunde niŋ al samunmin budam kura goyen wayyin. Deŋembe Yosep. Yeŋ wor Yesu gama irde hiyen. ⁵⁸Be, al gore kunbe, “Yesu hakwam nunke mete tiye,” ineŋ Pailat gusunŋan iryin. Irkeb Pailat beleŋ, “Igin, gwaha tiyayin,” inyin. ⁵⁹Irkeb Yosep beleŋ Yesu hakwam goyen teŋ amil faykek gergeŋ beleŋ po mala teŋ ⁶⁰tukunbe yingen, “Kammeke nernayin,” yiriŋ bema goyen bana kiryin. Irde hora kurun miliŋ kura goyen yenya kwamin marya gore gilongilon irde tukun bema gote yamem pet teŋbe kwamin. ⁶¹Irkeb bere iraw kura horabok gote diliŋ mar siŋa hoyan beleŋ mat hinaryum. Makdala niŋ Mariayabe Maria hoyan kura goya beleŋ gwaha tiyaryum.

Bema doyaŋ irde hinhan mar

⁶²Be, Sabat nalu fay urkeb pris buda gote karkuwanminya Farisi marya beleŋ Pailat hitte kwamin. ⁶³Kunbe, “Doyaŋ al, usi al gar go hinhinyabe, ‘Kamenŋe mat kun yerenkek hekeb huwareŋ,’ yeŋ hinhin goyen bininiŋ bak yekeb gago wayhet. ⁶⁴Ningeb fuleŋa marge hulyan yirke hanŋka mat kun molye bana goyen bema go doyaŋ irde hinayin. Monŋo komatmin yago beleŋ wan hakwam goyen hoyanŋe tukunbe, ‘Kamtiŋde mat huwarun,’ yenayin geb. Irkeb al budam usi mere go nurde dufaymin bulun henayin. Gote kandukbe hanŋkapy, ‘Nebe Mesaia,’ yineŋ al usi yirde hinhin gote kanduk fole iryen,” inamin. ⁶⁵Irkeb Pailat beleŋ, “Fuleŋa marne kura yukun deŋ nurhan gwahade po kenkela yinke bema go doyaŋ irde hinayin,” yinyin. ⁶⁶Irkeb mel go kun bema yamere niŋ hora kurun goyen al kura beleŋ ma fegelnayin yeŋ bisam irde go hende diba iramin. Irdeb fuleŋa mar goyen, “Gar heŋ kenkela doyaŋ irde hinaŋ ko!” yinamin.

Yesu kamyinŋe mat huwaryin

(Mak 16:1-10; Luk 24:1-12; Yon 20:1-10)

28 ¹Be, Sabat nalu hubu heŋ kun wawun heŋ fay ureŋ tiyyin. Irkeb Makdala niŋ Mariaya Maria hoyan kura goya gore Yesu hakwam keramin gasun goyen kenye yeŋ kwaryum.

²Be, bembare gorbe niniņa kurun forok yirin. Gobe Doyan Al Kurun hitte mat miyonmin kura katen bempa gote yame hora kurun go kan kan irde hol irde go hende keperde hinhin geb, gogo tiyyin. ³Yenbe ulinņa dinsokyabe dagamel go gwahade epte ma kenkela kente hinhin. Ulinhormin manan faykek wor po.

⁴Be, fuleņa mar gor hinhan gobe miyon go kenenbe kafura wor po hej barbar yen kamtin hakwam yara hamin.

⁵Be, miyon gore bere irawa go yenenbe, “Kafura hej ma. Yesu kuruse hende mayke kamun al goke nankenen har yen nurde hime. ⁶Gega yenbe gar ma hi. Huwaren yen hinhin go gwahade po huwara. Iginge wan hakwam keran gasun ga kinyi. ⁷Irde aranen kun komatmin yago goyen, ‘Yesube kamunde mat huwara geb, yen wa mehen hej Galili nanare kwen tiya. Gon gab kun kennayin,’ yiniryen. Mere gayen momon dire yen gago wayhem geb,” yinyin.

⁸Be, bere iraw gob kafura haryum. Goyenbe mere go nurdeb aman haryum. Irdeb bempa go aran po tubul ten Yesuyen komatmin yago momon yirye yen kup yen kwaryum. ⁹Be, bere go mata gwahade forok yewen tiya yen ma nurde kun hikeya Yesu belen forok yenbe, “Wampot,” yinyin. Irkeb irem gobe kenen bebak tenbe kun kahan de tanarde dolon iraryum. ¹⁰Irkeb, “Kafura hej ma. Kun dine yago yinke Galili nanare kun gab nennayin,” yinyin.

Fuleņa mar belen usi ten hinhan

¹¹Be, bere irawa go hako ga mulgan hej hikeyabe fuleņa mar bempa doyan irde hinhan mar goyen kura belen taunde kunbe mata forok yeke yenamin kurun goyen pris buda gote karkuwanmin momon yiramin.

¹²Irkeb Yuda marte doyan mar parguwak hitte kun momon yirdeb mere kura sege iramin. Irdeb fuleņa mar go hora kurun yunenbe gaha yinamin. ¹³“Sinare kunbe mere gahade al momon yirde tukun hinayin: ‘Nenbe wawun ferde ug hetekeya komatmin yago belen wan hakwam goyen kawem ten kwan,’ gwaha yen hinayin. ¹⁴Munan mere momon gayen kun doyan altin Pailat hitte forok yekeb nen belen kun kenenbe igin mat mere irtek geb, denbe merem yan ma diryen,” yinamin.

¹⁵Gwaha yinkeb fuleņa mar gobe horamin go yadeb mel gore yinamin gwahade po tiyamin. Ningeb goyen mere gobe tagalkeb wan wan gayenter nin Yuda mar wor tagalde han.

Komatmin meten kurun yunyin

(Mak 16:14-18; Luk 24:36-49; Yon 20:19-23; Apo 1:6-8)

¹⁶Be, Yesu yirin gwahade po komatmin ¹¹ go Galili nana bana gon nin dugu kura gor kunayin yinyinde gor kwamin. ¹⁷Kun kenenbe dolon irde turun iramin. Munan kurabe dufay kura kura hamin. ¹⁸Irkeb Yesu go

bindere wanbe, “Naŋkina megenya kurun gayen doyan yird yird tareŋbe ne nunti hi. ¹⁹Ningeb den beŋ kun al megen hike kwa kurun gayen merene basan heŋ tagalde tukunayiŋ. Irde merene nurnayiŋ marbe Al Kurunya Urminyabe Holi Spiritiat deŋemde baptais yirde komatne yirde hinayiŋ. ²⁰Irde mata gwaha gwaha teŋ hinayiŋ dineŋ hinhem kurun goyen mel go wor gama yirnan yeŋ saba yirde hinayiŋ. Fudinde wor po, nebe dubul ma wor po tiyeŋ. Deŋya tumŋaŋ hiteke kun kun nalu funaŋ forok yiyyeŋ,” yinyiŋ.